


*image
not
available*








XXVIII. 1. 4.

K.S.



EXAMEN

Theſium Theologicarum.

IACOBI CAPELLI,

quas inſcripſit

DE


Controverſijs quæ Fœderatum Bel-
gium vexant

&

Satiuſne fuerit tolerari ſententiam Armi-
nij, quam damnari.

AVCTHORE

Minutio Aquilovicano Frieſio.



THLIBOCHORI,

Apud Homulum Plaſthum. Anno
MDCXXIX.

E X A M E N

Thesium Theologicarum

I A C O B I C A P E L L I,

quas inscripsit

D E

Controversijs quæ Fœderatum Bel-
gium vexant

&

Satiusne fuerit tolerari sententiam Armi-
nij, quam damnari.

Vi de causa aliqua rectè ju-
dicare vult, eum oportet ap-
primè gnarum esse rerum o-
mnium, quæ ad eam pertinent
& animum habere ita compo-
situm, ut sine offensa, sine gratia judicet.
Hoc imprimis est necessarium, cum de re-
bus facti quæstio est: De ijs enim statui nihil
certi potest, nisi primùm circumstantiæ
omnes, quæ ad eas quoquomodo faciunt,
ritè pervideantur, & ab eo, cujus nihil in-
terest, utrum hoc an alio modo habeant.
Quia verò earum rerum, quæ extra solum
nostrum inter partes gesta sunt, & ad nos
non nisi per famam aut ab altera partium

venerunt, circumstantiæ singulæ difficulter admodum pervideri possunt, utique necessum est, ut rectum de ijs iudicium admodum sit difficile. Prudens certè vir, qui novit, quam facilè erretur, cum ex incerto famæ aut partis alterius fide cognitio petitur, & quàm sit difficile animum iudicio integrum servare, qui gratia odiove partis alterius ducitur, non ante interponet iudicium suum, quàm omnia penitissimè ex utriusq; partis sententia & sine affectu perspecta habeat, nisi prudentiæ gloriâ excidere & temeritatis infamiam velit incurre. Hæc prudentia si ullos, certè Theologos imprimis decet, propterea quòd in rebus ad Religionem pertinentibus speciosius tegi soleant partium studia, & iudicantiũ affectus soleant esse acriores: Fit enim plerumque, ut partes non dicant scribântq; nisi quod è re sua esse credunt, & qui iudicant facilè inclinent fidem suam in illam partem, cui favent & quæ ut triumphet ipsorum interest. Hujus officij sui parum memor fuit *Iacobus Capellus*, Pastor & Professor Sedanensis, cum non ita pridem Theses Theologicas disputandas proposuit, quas *De Controversijs quæ Fœderatum Belgium vexant*, inscripsit: Simulatque eas mihi ante paucos dies exhiberet amicus qui-

quidam meus, suspicabar statim affectum non levem fuisse, qui Capellum impulerat, ut, quod insolens ac planè alienum à scholæ more est, quæstiones, quæ putè Facti sunt, & rerum earum, quæ extra Galliam acciderunt, in Gymnasio suo disputandas appenderet adolescentibus, qui de rebus istis fortè ne fando quidem audiverunt: Et quia affectus nihil moderati solent suadere, credebam fieri non potuisse, quin narrasset pleraque aut aliena prorsus ex partis fortè unius fide, aut pro affectu illo, quo in partem hanc & illam ferebatur. Nec fefellit me opinio mea: Vix enim primam paginam inspexi, quin dicerem protinus, *Ecce Cantharius in porta:* ubi perrexi, ubique pænè me hominis pœnituit & puduit: Inscitia earum rerum, quæ in Belgio acciderunt, tam ubique est obvia, tam palpabilis, ut qui eas oculis suis ipsi usurparunt, aut alioquin obiter tantùm Acta & Scripta publica utriusque partis inspexerunt, suspicari jure possint, Capello evenisse quod Cæsar Gallos in more olim habuisse dicit: Ex obvijs & advenis omnibus sciscitatum eum esse, quid ageretur rerum novarum in Belgio, & credidisse ijs, qui ad voluntatem ipsius ficta responderunt, Affectus verò adeò frequenter nar-

rationi miscuit, ut appareat magnoperè ipsius interfuisse, ne aliter narraret aut judicaret. Et sanè si rem rectè putemus, Sedani nec alia historia nec aliter scribi poterat; Interest Principatus istius, ut Fœderato Belgio arctissimè adhæreat & ad ipsius fortunam judicium suum componat. Hinc factum, ut simulatque Synodus Dordracena in Belgio sententiam dixerat de Controversijs ibi natis, quod sexdecim integris sæculis factum non fuerat, & pastores plusquam centum inclementer admodum exauthoraverat, protinus exemplum illius secutus sit, & Academiam simul atque Ecclesiam suam ad iustar illius composuerit. Nempe facessere statim à munere suo fecit fidissimum ac dilectissimum Ecclesiæ illius ministrum, *Franciscum Auratum*, quod ex occasione textus sui, *Deus neminem tentat etc. Iac. 1. 13.* prolixius disseruerat, Deum non esse authorem peccati, atque ex isto indicio prehensus fuerat non abhorrerè omninò à damnata in Belgio sententia. Nec multò post, simili donativo mactavit Virum Clarissimum *D. Danielem Tilenum*, scholæ istius, dum præfuit, lumen atque ornamentum, post viginti annorū expleta stipendia, nullam aliam ob causam quàm quòd cum Synodo illa Belgica non sentiret & quòd

Principatus

Principatus illius interesset ab ea seorsim non sentire : Atque ut testator fieret consensus, recepit in ejus locum *Petrum Molinaum*, Galliâ non ob religionem profugum, qui pro Synodo ista post damnatam causam fortiter scripserat, oppressosque atque afflictos crudeli præfatione animosè invaserat, adeoque magnis molitionibus effecerat, ut Synodus ista non tantum totidem verbis ac syllabis reciperetur per totam Galliam, sed ut & conscientiæ & linguæ omnium ac singulorum pastorum, solemnis juramenti religione (horresco referens) ad extremum usque vitæ halitum obligarentur. Ab hujus collega quid expectari aliud poterat, quàm quod eundem redoleret Spiritum? Nimirum operepretium erat, ut Antesignani isti in Repub. ista, non tantum, sicut olim in velabro olearij, consentirent; sed ut audaci aliquo facinore zelum suum testarentur & damnationibus præcedentibus atrum etiam suum calculum adjicerent.

Neque tamen id volo, quasi indignum aliquid se aut professione sua fecisset Capellus, si sententiam suam pro Synodo ista palam atque animosè sustinuisset & contrariam pro virili impugnasset. Absit. Scio arenam istam Professorum esse & eorum,

qui in schola docent: utinam tantum intra scholæ morem stetisset, & sententiam suam dixisset sine cujusquam læsione & injuria! Hæc enim est Christiani Professoris gloria, ita de veritate & pro veritate dicere, ut erranti non insultare sed errorem ejus solum damnare videatur. At Capellus non tam id egisse videtur, ut errorem, quem putavit, damnaret, quàm ut mortui Arminij manibus contumeliosè insultaret & famam eorum, quos sectatores ipsius vocat, infamibus ac diris convitijs laceraret. Quæ in re tantum abest, ut famæ atque existimationi suæ consuluerit, ut dignum se reddiderit, qui similibus modis tractetur ab alijs. Ego tamen vicem illi non rependam, ne simili culpæ me obstringam & LONDORIAS crimine cœlestis hereditatis meæ spem polluam. Christianus dignior est, quàm ut tam ignobili vindictæ genere pro innocentia sua pugnet. Alijs animis, alijs armis opus est, ut Christo Domino suo serviat & proximum suum servet. Tantum operam dabo, ut Capellus errorem & culpam suam intelligat, & ut, si fieri potest, sentiat, quàm gravem injuriam divinæ veritati ejusque discipulis intulerit.

In Principio *Capellus* prætexit limen The-
suum suarum præclaro caritatis elogio; sed

ut ne

*ut ne caritatis obtentu justitiæ & veritati divi-
næ fraus fiat*, monet. Rectè; Caritas jubet
nos aliquando cedere jure nostro, nunquam
alieno, nedum divino: Eadem jubet ut ve-
ritati necessariæ, sine qua salvi esse non
possumus, semper & ubique cum res po-
stulat intrepidè commodemus patrocini-
um nostrum; in ceteris omnibus rebus tole-
remus quicquid conscientiam non lædit
& eternæ salutis nostræ & proximi non
officit: hoc ubi fit, justitiæ & veritati di-
vinæ fraus fieri non potest: quia utrique
veritati, tum necessariæ tum non necessarię
suum tribuitur, quando necessaria veritas
precisè retinetur, ut salus nostra æterna
constet, & quando in ceteris toleratur quic-
quid tolerabile est, ut caritas vigeat: Quod
si non toleres, quicquid tolerabile est, su-
um cuique non tribuis & justitiæ fraudem
facis. Si etiam omnem veritatem eodem
loco habeas & pari severitate urgeas, veri-
tati necessariæ fraudem facis & vim caritati:
Non necessaria veritas necessariæ æquari
nullo jure potest. Libertatem ut astringas
ubi necesse non est, caritas non patitur.
Suum cuique rei justum pondus ac pretium
constare debet. Quietis ac tranquillitati ex-
ternæ consulit caritas, sed communi, sed
sine partium studio. Paci studet, sed libe-

ræ, sed spontaneæ, quæ non vi, sed animorum concordia constar. Nunquam in gratiam partis unius suadet damnare alteram, quæ pacem præfert & cum quâ pax & concordia innoxie coli potest. Qui caritatis interesse putant, ut externæ quieti ac tranquillitati vel Reipub. vel Ecclesiæ, vel plurium consulatur cum libertatis & tolerantie omnis proscriptione, cum damnatione eorum, quibuscum sine ullo salutis periculo aut veritatis necessarie detrimento concordia iniri aut retineri potest, næ ij parum intelligunt, quid caritas Christiana requirat, quæ nos jubet inimicum diligere & cum omnibus hominibus EIRENEVEIN EIDVNATON. Politicorum axioma, *Tranquillitas Reipub. suprema lex esto*, tanti faciendum non est homini Christiano, cui salus omnium ac singulorum hominum cordi est, ut eam injuriâ aut damno nedum sanguine vel unius innoxie animæ velit redimere. Nunquam facienda sunt mala, ut eveniant bona; quare nec unquam facienda est injuria cuiquam, vel minimo mortalium, ut alteri sive homini sive cœtui benè sit ac tranquillè: Misera & funesta est tranquillitas, quæ non nisi isto pretio emitur; Scio privata damna atque incommoda parvi fieri, quæ utilitate publicâ compensantur; sed & scio

& scio utilitatem Christianorum in quiete illa externa positam non esse & eidem nihilominus optimè consuli posse sine privata cujuspiam injuria. Sed hodie ita ferè comparatum est, ut imperturbata quies summa voti sit Christianorum. Quæque secta isti externæ quieti impensissimè studet, neminem dissentientem fert, nedum contradicentem. Nec refert necessaria sit veritas, circa quam dissensio est, nec ne; Quicquid quietem quovis modo turbat, id inimicum est, id propulsandum est: Atque ita vastitatem ubi quisque fecit, pacem vocat: Et juris species additur, quia pro veritate fit: Sed veritatis amor obtenditur, quietis & tranquillitatis externæ studium in causâ est: Ab horum opinione ego absum quàm longissimè. Si Capellus idem mecum sentiat, benè quidem: Sin minùs, sufficiat me ista occasione hæc obiter monuisse: In sequentibus hac de re latiùs aliquid dicendū erit.

Videamus quomodo Capellus ad rem accedat. *Vt, inquit, hæc utiliùs aptari possint Arminij controversijs, quæ Belgico-Germaniam fœdè lacerarunt, hodièque lacerant, priùs nobis aliquid dicendum est, de vitijs dogmatis illius & de ratione, qua fuit in Belgiam in vectum aut propagatum.*

Esto: Fruatur judicio suo Capellus, quod
Contro-

Controversiæ Arminij Belgium fœdè laceraverint, hodieque lacerent: Qui sine affectu rem videt, intelligit, non istas controversias turbasse Belgium, sed eos, qui controversias istas alio, quàm Christianos imò quàm bonos cives decet, modo sopitas voluerunt: Quod si turbas ex illis controversijs per accidens ortas esse velit Capellus, non refragabor. Sed & sic turbavit Evangelium orbem terrarum: utinam eodem modo turbasset & turbaret adhuc Religio Reformata, quæ dicitur, Galliam! Sequatur etiam ordinem Capellus, quem vult; Ego vestigia ejus premam:

Jacobum Arminium peracuto quidem & eximio, sed veteratorio ingenio fuisse docent ipsius actiones.

Audax assertio, sed parum pia, nedum Christiana. De ingenio hominis judicare poterat an peracutum & eximium esset nec ne: Sentit & utrâque manu palpat id, quisquis scripta ipsius vel leviter introspicit; Sed an veteratorium esset, judicare, uti non poterat, ita nec debebat. Animum hoc spectat, veterator sis nec ne: Istum solus Deus judicabit in die illa. Caritas tantum crimen suspicari sine indicijs Sole clarioribus non debet, imprimis de Christi servo, qui, ut se Deo probaret, ad mortem usque

usque maluit sustinere odia & contradictionem mundi totius, quam conscientiae suae vim facere.

Actiones ipsius docent id, inquit Capellus: At actiones non semper arguunt animum atque ingenium: Sæpe optimus optimo animo ac fine consilia sequitur malefana & agit ea, quæ minus recta sunt, uti pessimus pessimo animo ac fine nonnunquam optima sequitur consilia & agit ea, quæ rectissima sunt. Intentio non semper respondet consilio, & conatui, neque intentioni consilia & conamina. Quem probitas & Dei timor non sinunt à recti & boni Linea vel latum unguem discedere, eum quandoque vel infirmitas ingenij, vel zeli fervor abripiunt transversum, ut ab ea imprudenter excidat. Qui hanc humanitatis conditionem aut ignorat aut fugillat, nã is convitium facit mortalitati, & meretur ut cum suis ex actionibus suis semper estimetur. Sed videamus, quænam actiones illæ sint, ex quibus Arminium veteratorio ingenio fuisse colligit Capellus. Tres ab eo recenferi observo. *Prima* est, quod cum unitatem & concordiam Reformatarum Ecclesiarum spectare se diceret, contrariæ discordiæ ac dissociationi operam dederit. *Secunda* est; Quod cum veritatis, quæ secundum

cundum pietatem est, studiosissimus videri vellet, erroribus tamen contrarijs fuerit patrocinator. *Tertia* est; Quod cum candidè ac sincere omnia sua agere videri vellet, nihil minus tamen, quam candidè egerit. Crimina hæc sunt atrocia & quæ singula probationes solidas requirunt: videbo, quas adferat Capellus: Si illud præmonuero, optare me ut à personalibus abstinuisset Capellus & à persona ad rem se convertisset. Personalalia enim ad rem multum non faciunt. Nec enim si veteratorie, si callide omnino egisset Arminius, propterea recte concluditur, falsum esse quod docuit. Deinde, Qui vitia personæ exaggerat, facile in suspicionem venit, quod doctrinæ odio in personam sit iniquior: Qui etiam solícite omnia personæ obiecta vitia excusat, facile in suspicionem incidit, quod quia personam amat impensius, doctrinæ ipsius patrocinium suum lubentius commodet. Hæc si ad animum revocasset Capellus, iudicium suum sapientioribus probasset, & nostram responsionem suspicionis istius macula atque infamia liberasset. Sed quia aliter ipsi visum fuit, nos eum vel inviti sequemur. Merentur pij & eruditi viri manes, ut quæ falso famæ ipsius obijci scimus, sine cuiuspiam iniuria confute-

confutemus, & quæ vera ac certa esse oculis, auribus ac manibus nostris pæne palpavimus, obrectatoribus totique adeo mundo ad honoris ipsius vindicias ob oculos ponamus. Nemo id ægre ferre potest, nisi cui animus odio aut livore æger est, aut qui aliud credere non vult, quam quod semel sibi persuasit verum esse:

Videamus itaque singulas actiones.

Prima est hæc:

Arminius dicebat, hoc potissimum à se spectatum, ut omnes Reformatas Ecclesias, quæ nuntium Papæ dixerant, ad concordiam vocaret.

Propositum Arminij si recte proponere voluisset Capellus, generale illud fecisset. Toti Christiano orbi facem concordiae ac pacis præferebat: Ejus initium fieri optabat inter Ecclesias Reformatas: Nimirum videbat vir prudens & mitis anima eas multis modis à se invicem divulsas distractasque, & secessionum hodieque nec modum nec finem esse: Multas sine justis & gravibus causis factas esse, & quæ factæ erant, pari potius odij pertinacia, quam validis rationibus retineri: Animorum divortia maiora ad tam tristes dividias momenta adferre, quam sententiarum bella. Plagam & hiatum tam ingentem non nisi moderatione

tione opinionum & animorum sarciri posse. Operam itaque dandam, ut animi primum ponantur utrimque, & odijs litibus ac rixis non necessarijs epicedium scribatur: Deinde ad laborandum omni ope, ut dogmatum, quæ præcise necessaria sunt, accurata ratio ineatur intraque eorum limites utrimque consistatur. In reliquis omnibus tolerandum, quicquid tolerabile esset, aut salutem non offenderet: Unam Prudentiæ & Caritatis regulam isti fini sufficere. Absque his æternas futuras lites & immortalia odia, unde omnes in Ecclesiam lachrymæ fluant necesse est. Hoc fuit propositum Arminij, & in eo stetit ad finem usque vitæ, nihil æque dolens ac suspirans, quam quod ij, qui proposito isti favere maxime debuissent, tam inimiciter illi obisterent. An propositum hoc ipsius laudabile fuerit, judicent quos Christianismi in minutissimas particulas divisi commiseratio tangit; Ego quin pium fuerit nullus dubito. Capellus, quid de eo sentiat, non declarat hoc loco; Non obscure tamen Thef. 42. & 43. contrarium sibi probari indicat. Ego metuo referri in numerum eorum, quos, **ΑΣΥΝΘΕΤΟΥΣ, ΑΣΠΟΝΔΟΥΣ ΑΝΕΛΕΜΟΝΑΣ** vocat Apostolus ad Rom. cap. 1. vers. 31. Videat Capellus, ne eum in numero

numero istorum censeat Deus.

*Unitatem, inquit, si sibi proposuisset Arminius, dedisset operam, ne dum ea, quæ nunquã in unum coaluerant, unire studet, ea dissociaret, quæ felicissimo coagulo consociata videbat, &c. Impri-
mis autem duo spectasset. 1. Ne quem ex ijs, qui-
bus Deus usus fuerat ad Ecclesiarum Reforma-
tionem, odiosum redderet. 2. Confessiones omnes
Ecclesiarum Reformatarum habuisset in pretio,
&c. Vide Theſ. 5.*

Major hæc est propositio, & conceditur.
Subsumit Capellus hanc minorem. *Armi-
nius ejusq; schola, quid designavit? 1. Eos,
quibus Deus usus potissimum fuerat ad Refor-
mationem cis Rhenum, aut Mosam, & Rhodanum
invehendam aut propugnandam, pridem in Do-
mino defunctos, quam acerbissimè potuit, traduxit
ac omnibus odiosos & infames reddidit, ut jam
Papæ Ministrorum laudari possit moderatio, si
cum Arminianorum acerbitate comparetur. 2.
Vtriusq; Confessionis, Belgicæ & Gallicæ, quas
unanimes consensione receptas videbat, articulos,
quibus reliquarum Confessionum nulla contradi-
cebat, labefactavit, adeoq; funditus evertit.*

Schola Arminij huc non pertinet. Si
quid omninò ab ea peccatum fuisset, ex ea
Arminij ingenium veteratorium fuisse nul-
lo jure colligere posset Capellus. Sed de
ea postea. De Arminio negatur assumptum.

B

Nullam

Nullam ejus, non dico. demonstrationem, sed vel verisimilem probationem adferet unquam Capellus. Arminium nunquam novit, neque scripta ejus legit, quisquis ei ista, quæ Capellus adfert, tribuit. Nimirum ille amabat & spirabat illud Pauli : *Moderatio vestra innotescat omnibus*: quam ut isto aut loquendi aut scribendi genere uteretur. Nunquam deprehendet eum Capellus, non dico traduxisse, nedum in superlativo gradu (quo admodum in convitiando delectatur Capellus) acerbissimè traduxisse, multò minus omnibus odiosos atque infames reddidisse, sed vel verbulo lēsisse Reformatores, quos vocat. Verum quia Capellus hæc audacter dixit, neque tamen ullum, vel levidense, indicium fecit, unde id liqueat, age videamus, quæ dicto ipsius possit subesse species. Si Arminius acerbissimè traduxit, & omnibus infames, atque odiosos reddidit Reformatores Gallos, Germanos, Helvetios, Belgas, necessum est, ut id fecerit, vel quia simpliciter ab illorum opinionibus dissensit; vel quia eos, à quibus dissensit, irreverentiùs tractavit, quàm debuit. Neutrū dicere potest Capellus. Non prius.

1. Quia simpliciter dissentire ab ijs non est eos traducere, nedū acerbissimè traducere.
2. Quia pudendū foret, ejusmodi authorita-

tem


tē Calvinō, Bezæ, Zanchio, Zuinglio, Iunio, &c. tribuere, ut ab ijs sine tam ingenti crimine nemini liceat dissentire. Istū honorē ipsis deferre, propè abest ab idololatriâ.

3. Quia ipse Capellus prohibet charitatem eò usque extendi, *ut iustitiæ ac veritati divinæ frâus fiat*; imo Th. 42. affirmat: *nunquam concordiam quæri debere cum hominibus veritatis divinæ dispendio*. Non posterius. Quia si iniquè aut irreverenter illos tractavit, necessum est ut unum horum fecerit; vel, ut detexerit quædam eorum errata, quæ ipsi occultata maluissent; vel, ut, cum detecta jam essent, mala fide ea recitaverit, aut enormibus consequentijs atque absurditatibus ea gravaverit; vel denique ut non contentus errata ipsa damnasse, in authores eorum acrius, quam decet Christianum, fuerit invecus. Nihil horum in Arminium competit. Errores, quos Calvinus, Bezæ, Zanchius, alijque circa articulum de Prædestinatione errârunt, Arminius non detexit. Ipsi authores publicârunt eos primi, & non uno volumine: Nec publicârunt tantum, sed eos, tanquam certissimæ veritatis, agnosci & credi voluerunt, adeoque contrâ adversarios suos, non sine acribus eorum insectationibus, adseruerunt; tanquam si in ijs prora & puppis penè fidei ac

Religionis ipsorum posita esset. Beza certè in ijs constituit summam Religionis Christianæ: & si quis rem benè ponderet, revera in ijs basis sita est Theologiæ Calvini, Beze & cæterorum. Nota hæc & pervulgata erant, antequam Arminij nomen innotuerat, & jam pridem notata ab omnis ferè generis scriptoribus. Neque verò malâ fide eos errores recitasse dici potest Arminius. Noverat optimè quales essent: ipse eos ex ore Bezæ, Faji, aliorumque non semel audiverat: ipse animitus eos probaverat longo tempore: Nec causam habebat, cur eos aliter, quam ex vero et ex mente authorum recitaret: imo causas gravissimas habebat, cur aliter non recitaret. Ex ipsis enim libris eorum revinci protinus potuisset, magno suo pudore & damno, & pro mercede infelicitis navatæ operæ infamiâ justam reportasset: At benignè, inquiet Capellus, interpretatus fuisset sententiam eorum. Atqui, inquam, facere id non poterat, nisi contrâ ipsorum authorum mentem, contrâ conscientiam suam, & ad veritatis contrariæ noxam. Neque certè quicquam est, quod æquè suspectam reddit istorum authorum sententiam, quàm quòd ij, qui pro ea remis velisque contendunt, de mente eorum adhuc disputant.

Ne-

Neceſſum enim eſt, ut aut ità obſcurè de ea ſcripſerint authores iſti, ut intelligi non poſſint; aut ſi clarè ſatis ſcripſerint, ut eos, qui eam propugnant, pudeat eam nudam atque apertam proponere, utque diſſenſione ſuà eam, veluti honeſto aliquo mantelo, tegere malint, ne fœditas ac turpitudine ejus omnibus pateat: ut enim ex animi ſui ſententia id faciant, quia rem ita ſe habere ſtatuunt, fieri vix poteſt. Nimium tribuunt authoribus iſtis & ſententię eorum, quàm ut vel obſcurè de ea ſcripſiſſe, vel in ea incertos illos fluctuaſſe, credere poſſint. Et certè, ita clara ſunt & aperta, quę ea de re ſcripſerunt, ut, qui ea vel negare, vel fucare velit, effugere non poſſit vel ſtupiditatis infamiam, vel ineptè affectatę interpretationis culpam. Neque verò traduxiſſe Reformatores, dici poteſt Arminius, quando eorum placita enormibus conſequentiis atque abſurditatibus gravavit. Nam, nec primus, nec ſolus ille id fecit. Deinde, conſequentiæ illæ aut veræ ſunt, aut falſæ. Si veræ; non traduxit eos, ſed argumentis juſtis ſententiam eorum confutavit. Si falſæ; non iſtos, ſed ſeipſum traduxit. Qui enim conſequentias facit, aut abſurditates alicui per conſequentiam impingit, ille iſtas ei non tribuit, tanquam ſi is eas ipſe faceret; ſed



tanquam si eas facere deberet, si sententiam
 suam tueri velit: imò, quia ea, quæ conse-
 quentijs continentur, absurditates esse
 agnoscit, & ab eis toto animo se abhorrere
 profitetur; idcirco eas format, ut à sententia
 sua eum dimoveat. Quare si quis in faci-
 endis consequentijs istis erret, non ad eum,
 cui eæ impinguntur, sed ad authorem, qui
 eas facit, redit infamia. Neque verò tam
 putidum fore Capellum credo (aliter certè
 sentire videtur Thes. x i v. Dispu. 2.) ut
 consequentias & argumenta omnia ab ab-
 surdis dampnare velit: uti hodie mortales
 quosdam, præposterâ eruditione & magno
 cum veritatis præjudicio, contendere vi-
 deo, qui, ubi se justissimis consequentijs
 & absurditatibus palpabilibus premi ac
 constrictos teneri sentiunt, unico ictu se ex-
 pediunt, & argumenta omnia, ex absurdis
 petita, mutila esse clamant, nisi probetur
 primum sententiam eorum falsam esse: cum
 alioquin iidem isti, quando ita usu venit, ad-
 versarios suos consequentiarum, ab absurdis
 petitarum, & sæpe frigidissimarum, non tam
 pondere, quàm numero, lapidare atque ob-
 ruere soleant. Periculosa est hæc opinio,
 qua homines isti sibi ipsis alijsque obicem
 non exiguum ponunt, quo minus ad verita-
 tis cognitionem perveniant. Populare est
 argu-

argumentum, quod ex absurdis petitur: sentiunt pæne eius vim, qui rationum momenta non capiunt. Et ea est principiorum omnium claritas, ut, si quis ea neget, clarioribus rationibus convinci nequeat: adeò ut isto casu ex absurdis argumenta petere omninò necesse sit. Et quis sapiens aut verius studiosus argumenta hæc respuat, cum ex veris nil nisi verum sequatur, ac proinde veritas nulla absurditate unquam gravari possit? Quod si enim ex vera doctrina per se absurdum aliquod possit fluere, necessarium est ut dicatur, inanem fore omnem probationem falsitatis, quæ ex absurdis petitur. Nam si prius rationibus directis probaveris doctrinam aliquam falsam esse, non necessaria erunt argumenta ab absurdo: quod si verò prius non eviceris justis rationibus, doctrinam aliquam falsam esse, frustra erunt argumenta, quæ ex absurdis petentur. Absurdus itaque si gravavit Arminius Sententiam Calvinii, aliorumque, non traduxisse eos, sed argumentis legitimis eos oppugnasse videri debet.

Tertio, Authores ipsos quod attinet, tantum abest, ut in eos acerbè aut acerbissimè invectus unquam fuerit, ut nemo modestius unquam ab ijs dissenserit. Legantur Scripta ipsius, & verum esse comperietur

quod dico. Neque scio quenquam hætenus
 fuisse præter Capellum, qui Arminio hoc
 nomine litem moverit. Et erat sane ea viri
 pij atque eruditi modestia, ut errores, im-
 primis quos pietati noxios putabat, fortiter
 & ex mente Authorum oppugnandos, er-
 rantes verò blandè & ex mente Iesu Christi
 tractandos esse judicaret. Noverat quàm
 facile sit hallucinari, quàm iniquum erranti
 convitium facere, quàm turpe pio maledi-
 cere, quàm necessarium Christiano, & im-
 primis Episcopo, AMACHON, ANEXIKA-
 KON KAI EPION EINAI PROS PANTAS,
 KAI EN PRAOTETI PAIDEVONTA TOVS
 ANTIDIATITHEMENOVS. 1. *Tim.* 3. 3, 2. *Tim.*
 2. 24. Ita sensit, ita egit, alienissimus ab illis
 probrosis artibus, quibus Capellus in hisce
 Thesibus suis utitur, ut damnatam hæresin
 alicui, pro suo arbitrio, docendi tantum
 causa adfingeret. Non pugnabat ejus-
 modi fictionibus contra adversarios suos.
 Ficulnea putabat argumenta ista, & indigna
 viro erudito, ijsque quibus cordi est veri-
 tas. Quare quod eum infames atque odi-
 osos reddidisse omnibus primos Refor-
 matores Capellus dicit, verum esse non
 potest, nisi infamem aliquem reddere idem
 esse velit, quod non posse in sententiam a-
 licujus pedibus ire, aut dissensionem ab
 aliquo

aliquo apertè profiteri: quod ita absurdum est, ut refutari non mereatur. Videat igitur Capellus, quo jure dixerit, *ut iam Papæ ministrorum laudari possit moderatio, si cum Arminianorum* (Arminij dicere debuisset) *acribitate comparetur*. At ne effugium forte hic quærat Capellus in voce *Arminianorum*, addo. 1. Iniquum simul atque ineptum esse ut ex eorum actionibus æstimetur ingenium Arminij. 2. Nec de ijs verum esse, quod ijs Capellus tribuit. Legantur Scripta, quæ eorum nomine edita sunt: Nec vola nec vestigium in ijs deprehendetur, unde convitio huic color peti possit. Citant Authores, sed sine convitijs, & suis ipsos verbis loquentes faciunt. Quid possunt facere moderatius? Videatur Collatio Hagienfis, Acta & Scripta Synodalia, Epistola ad Walachros, &c. Quod si tamen quidam eorum propriâ sponte sua acerbius quædam in eos scripserint, quod factum esse non nego, id profectò immeritò ijs, aut toti Scholæ Arminij vitio vertitur, quæ sæpe, id sibi displicere, ex animo professæ est. Sed & cogitandum erat Capello. 1. an, quæ scripserunt, falsa sint. 2. quo tempore & qua occasione ista scripserint. Fieri enim potest, ut ea scripserint diu multumque acerbioribus atque atrocioribus longe modis irritati. Et

revera ita factum est. Cum enim multo tempore in trivijs, in convivijs, ex pulpito, ex ambone, clam, palam, vocibus, scriptis, ubique gentium, atque imprimis apud promiscuam plebem, traducti essent, quod malâ fide Sententiam Calvinî, Bezæ aliorumque referrent; coacti fuerunt fidem suam liberare Authorum ipsorum citationibus. Id ubi fecerunt, protinus in eos omni convitiis & probrorum genere itum fuit: Nulli injuriæ parcitum: concionibus plusquam Tribunitijs armabatur quotidie plebs in capita eorum: quod Chamî instar verenda Patrum suorum revelassent, quod sanctissimos illos heroes toti mundo ridendos propinassent, quantum in ipsis erat, quod cineres & ossa eorum impuris unguibus refodissent ac vellicassent. In hoc calore & æstu animorum mirumne alicui jure videri potest, si ingenia aliqua, licet alioquin satis modesta, justo dolore, & tot injuriarum stimulis exasperata, acerbiora quædam in adversarios regesserint? Accedebant ad convitia ista immodicæ Calvinî, Bezæ, aliorumque laudationes demerendę plebi. Authoritate eorum, tanquam divino aliquo oraculo, pugnabatur. Merita Calvinî adeo extollebantur, ut parum abesset, quin idolum ex eo fieret. Sententia ipsius de Prædesti-

destinatione non propugnabatur tantum,
 sed præconijs efferebatur, tanquam Reli-
 gionis totius Christianæ medulla, corcu-
 lum pietatis, anchora salutis, portus spei ac
 fiducia nostræ, alijsque similibus. Quod si,
 qui, ut enormibus istis encomijs, & super-
 bis istis præconijs obviam irent, atque ido-
 lalotriæ isti, quam vocabant, serpenti obfi-
 sterent, acrius quædam in Calvinum scrip-
 serint, si vitia & nævos ipsius, non aliunde,
 quam ex ipsius proprijs libris collectos, to-
 ti mundo conspiciendos dederint, si sen-
 tentiam ejus, quam tanto laudum cothurno
 extolli videbant, contrarijs atque immodi-
 cis vituperijs deprefferint, id nec novum,
 nec insolens videri debet. Partium studia
 fervent istis animorum & linguarum æsti-
 bus, & ubi semel intumuerunt, nullis
 prope terminis continentur. Rarò intra
 mediocritatem consistitur. Ad extrema
 itur. Oprandum sanè esset, ut sedatior
 Spiritus Christianos ageret: sed sacra Reli-
 gionis, nisi vim nobis ipsis faciamus, aliter
 vix constant. Quisque gloriosum putat, pro
 causâ, quam Dei esse credit, turbare ac
 prope insanire. Capellus ipse docet ex-
 emplo suo, quam difficile sit animi clavum
 in istis motibus rectum tenere, quàm grave
 sit affectibus fibulam imponere. **Quic-**
quid

quid enim probrorum ac contumeliarum congerere potuit, ut famam ac manes defuncti Arminij macularet, & omnibus mortalibus exosam redderet, id omne coacervavit; tanquam si injuriam, quam Calvinio, Bezæ, alijsque illatam putavit, pari injuriâ, odijque pertinaciâ pensare ac vindicare voluisset. Idem forte ab alijs factum credat, quod in seipso experitur; & si justo dolore se motum putet, idem alios de se ipsis credere sibi persuadeat. Quod si etiam Calvinii & Bezæ Scripta attentius legat, videbit, nec eos istâ modestiâ & æquanimirate contra adversarios suos usos fuisse, qualem ab ijs, qui placitis ipsorum adversantur, requirit. Siqui enim alij, certè hi in adversarios suos, alioquin optimos viros, maledicentissimi fuerunt, quo certè nomine & aliorum in se justam bilem concitarunt, & Reformationis suæ gloriam non parum obscurarunt.

Videamus nunc secundum membrum Theseos Sextæ, quod de Confessionibus ab Arminio labefactatis agit: *Videbat* (inquit) *Arminius, in Belgio duas Confessiones, Gallicam & Belgicam, tam unanimi consensu receptas, ut Galli Belgicam, Belgæ Gallicam non minoris facerent, quàm suam. Tantò vehementius in id incubuit Arminius, ut utriusque multos Articulos, quibus*

quibus reliquarum Confessionum nulla contradicebat, labefactaret, adeoque funditus everteret.

Nunquam probabit Capellus, quod hîc tam fidenter asserit. Contrarium tam est notoriè verum, quàm verum est, bis duo esse quatuor. Confessionem Belgicam (Gallica enim quid statueret, ipsius non intererat) religiosè semper propugnavit, ex eâ Sententiam suam adstrui posse credidit, & non paucis argumentis adstruxit. Nullos ejus articulos labefactare, nedum funditus evertere, unquam studuit, paratus è vestigio cedere Ministerio & professione sua, si vel hilum contradixisset. Observabat quidem, esse in ijs nonnulla, quæ contrariæ sententiæ favere videbantur, & quæ commodius pro sua sententia dicta voluisset, sed ejus rei judicium ad Synodum Nationalem pertinere judicabat, cum formularum Revisio instituenda esset: Interea in terminis ijsdem manere se posse, & benignæ interpretationis beneficio phrasium quarundâ asperitatem leniendam esse sentiebat. Neque verò est quod hac in re Sophisticen objiciat Arminio, nisi seipsum & non paucos Calvini sectatores ejusdem culpæ reos agere velit.

1. Seipsum quia hac eadem Thesi affirmat, *Nullam reliquarum Confessionum, quæ in Harmonia exstant, Articulis Belgicæ Confessionis contra-*

contradicere: Quomodo enim hoc adferere auderet Capellus, nisi similis Sophistices aut potius benignæ interpretationis beneficio id sibi alijsq; persuaderet? Tā enim manifestę sunt cōtradictiones inter illas & Augustanam (ne de alijs jam dicam) ut Genevenses ipsi consultum non duxerint eas, si ne interpretationum & cautionum suarum amuleto, in lucem dare. Nec obscurè Capellus ipse id fatetur, cum Thes. v. ait, *Omnes Confessiones non magno negotio in omnibus aut plerisq; capitibus conciliari posse*. Cur enim non simpliciter *in omnibus*, dixit, sed se ipsū corrigens addidit, *aut in plerisque*? Sed vide sis verba Confessionis Augustanæ, & causam intelliges. Art. vi. ita sonant: *Qui obtemperant pravis cupiditatibus, & agunt contra conscientiam, versantur in peccatis mortalibus, nec fidei justitiam nec justitiam operum bonorum retinent, juxta illud Pauli, Qui talia agunt, Regnum Dei non possidebunt*: Articulo verò xi. clarius adhuc damnant & *Anabaptistas, qui negant, semel justificados iterum posse amittere Spiritum Sanctum*. Hoc autem caput tanto magis considerandum est, quia in eo Religionis præcipuum apicē collocat Capellus Disput. Secunda. Calvini Sectatores omnes in Imperio necesse est ut ejusdem culpæ reos faciat, quia ij toti Confession

fioni

fioni Augustanæ omnibusq; ac singulis ejus Articulis bonâ conscientia subscribere se posse credunt, quod tamen absque benigne interpretationis beneficio fieri impossibile est. Si dicere pergat Capellus, Articulos, qui in Confessione Belgica exstant, tam esse claros, ut fucus interpretationis non possit non patere; cogitet, Articulos Augustanæ Confessionis multo clariores adhuc esse, quibus tamen Calviniani in Imperio subscribunt, & clarissimam omnium esse Scripturam, quam tamen omnes sectæ, quæ de Prædestinatione sunt, licet toto, quod ajunt, cælo à se distantes, beneficio interpretationis suam faciunt.

Quod subjicit, *Arminium contendisse, ut plurimos consociaret, qui tandem, antiquatus Belgij Confessionibus, novam substituerent*; Hoc totum pure pute imaginarium est & confictum, ex eo solum, quod nuper Remonstrantes, qui Arminium sequuntur, Confessionem propriam ac peculiarem ediderunt. Ex facto isto (aliunde enim non potest) colligit intentionem eorū; tanquam si receptas Confessiones antiquare & in lucem edere Novam ac propriam Confessionem statim ab initio propositum sibi habuissent. Nihil enim minus

minus verum est. Arminius tam alienus erat à nova Confessione, quàm à schismate. Quæ desiderabat in Ecclesia, ea ab ipsa Ecclesia & intra ipsam corrigi optabat, & tutius simul atque efficacius ibidem ea emendari posse putabat. A novis Confessionibus non sperabat remedium, sed periculosiores paroxysmos metuebat. Multò præstare credebat, ut soli Scripturæ adhæreatur, aut, ubi Confessio aliqua locum habet, incommodè quædam phrasès, solius schismatis odio, tolerantur, & vel benignæ interpretationis beneficio cum Scriptura concilientur, vel legitimæ Revisionis auxilio corrigantur, quàm novis Confessionibus opera impendatur, quæ schismati fovendo serviant. Nempe videbat vir prudens, hoc rixarum litiumque ferace sæculo ita comparatum esse, ut, ubi novæ Confessiones cuduntur, ibi una cum opinionibus animi etiam divellantur ac distrahantur. Et certè, quot Confessiones, totidem ferè signa æternarum litium & odiorum immortalium vexilla erigi videmus. Ad ea magnis animis partiumque studijs hinc inde accurritur, tanquam ad unica & certa salutis asyla, extra quæ nil, nisi Anathema maranatha, locum habeat. Idem fuit semper animus cæterorum omnium, quibus Arminij Sententia

tentia placuit. Nunquam illi de edendâ Novâ Confessione cogitaverant ; neque unquam novam edere in animum induxissent , nisi invitis ipsis schisma factum fuisset, & factò jam schismate, eo nomine potissimum per aliquot annos ubique locorum fuissent traducti, quod hæreses quamplurimas in sinu suo foverent , quod veteres omnes errores novo paxillo suspenderent, quod nullam integram fidei suæ Confessionem in lucem edere aut possent , aut auderent. Deinde, tantum abest , ut id à principio in animum induxerint , ut inter ipsos etiam tum , cum Confessio jam scripta erat, non leviter velitarum fuerit de eo: An necessarium aut utile , imo an non noxium sit Orbi Christiano , Confessiones aut formulas fidei separatas edere , cum Scriptura plenè ac perspicuè contineat omnia , quæ credenda, speranda, ac facienda sunt. Ac licet plerisque eæ , si non absolute necessariæ , perutiles tamen esse videbantur ; omnes tamen à novâ cudendâ potius abstinuissent , nisi necessitas legem ipsis posuisset. Nolo , ut Capellus mihi credat , Præfatio Confessioni ipsorum præfixa , quæ omni exceptione major est, verbis meis fidem faciet. Hactenus ergo de primâ Actione.

Secunda Actio est. *Quod Arminius Veritatis, quæ secundum pietatem est, studiosus videri voluerit, cum tamen erroribus contrarijs patrocinatus fuerit.* Argumentum Capelli hoc est;

Si veritatem, quæ secundum pietatem est, quæsiuisset, ut obtendebat, eos potissimum errores impugnasset, qui profluunt ex vitio, quod nobis maximè est naturale, id est, ex philantiâ.

At verò non tantum non fecit hoc, Sed ea docuit, quæ cum vitio isto maximè conspirant. Ergo.

Major hujus Syllogismi non procedit, nisi hoc pacto concipiatur: Si veritatē, quæ secundum pietatem est, quæsiuisset, tum potissimum impugnasset errores, qui non nisi ex vitio philautias, & quidem per se, fluunt, ità ut in nullo sint, aut esse possint, nisi ab & una cum vitio philautias. Nam si illa, quæ errores sunt, eo ipso, quod ex vitio illo philautias profluunt, aliam possint habere causam, quàm vitium istud, & in illis subjectis aliquando reperiantur, in quibus vitium istud locum non habet, tum major non procedit. Pone enim, quod illa ipsa, quæ errores sunt, quando, & eo ipso quia ex philautia profluunt, ex causâ aliâ oriuntur, quàm ex philantiâ; imò ex causâ planè

planè contrariâ oriantur, tum sanè fieri potest, ut quis veritatem, quæ secundum pietatem est, quærat, etiamsi ista potissimum nō impugnet, sed ad ea conniveat, eo quòd errores non sint, propterea quòd ex vitio isto philautias non profluant, vel saltem si errores sint, quòd non sint tales errores, qui veritati, quæ secundum pietatem est, officiant. Major, si hoc pacto limitetur, tum apparet, Minorem probatione indigere. Vitia enim vel errores, *quos spirituales errores* Capellus vocat, & quos ex philautia profluere vult, duo sunt: Primus; Quòd homo Deum sibi similiorem facit, quàm par sit: Alter; Quòd Deo non satis, sibi verò plus, quàm par sit, tribuat. Hæc enim ex philautiâ profluere posse, ac non rarò profluere, nemo sanus facilè negabit. At eadem non nisi ex vitio isto profluere, nemo sanus etiam facilè concedet Capello. Etenim primum errorem quod attinet; quis negare audebit, fieri posse, ut quis Deum sibi similiorem faciat, quàm par sit, nullo cæco sui amore, sed solâ judicij infirmitate adductus, quòd non rectè aut conceperit divinæ Majestatis excellentiam, aut sequius de eâ instructus sit, aut quòd in eo, quod de Deo concepit, divinæ Majestatis excellentiam ab ipso Deo in verbo

ipsius statui sibi persuadeat ; aliter libenter crediturus , si aut judicio acriori polleret , aut doctorem accuratorem nactus esset , aut sensum Scripturæ alium esse intelligeret ? Inclemens admodum est judicium , quod errorem istum non nisi ex philautia derivat. Quotusquisque enim est , imprimis in vulgo Christianorum , qui de Deo ita prorsus sentit , uti par est , qui ita abstrahit in conceptu ejus omnes imperfectiones , ut non eum sub similitudine aliqua humana sibi repræsentet , errore potius imperceptibili , quàm amore sui ? Vix inter eruditissimos & subtilissimos hodieque ea de re convenit. Deinde , quod ad secundum errorem attinet , quis paulò æquior negare auserit , fieri posse , ut homo sibi tribuat plus , quàm par est , non quia se impensius amat , sed quia aliter faciendum esse sibi non potest persuadere , imò peccare se crederet , si aliter faceret , dum sc. credit , ad gloriam Dei majorem id facere , & se Deo propterea pluribus nominibus obligari ? Dicam amplius. Fieri potest , ut quis Deo non satis , sibi verò plus , quam par sit tribuat , non quia se ipsum impensius amat , sed quia se ipsum minus amat. Mallet enim Deo plus , sibi vero minus tribuere , solo amore sui , si modo id rectè ac jure se facere posse crederet.

deret. Ita fieri potest, Ex: gr: ut quis Deo tribuat, quod non velit servare homines, nisi sub conditione dura ac gravi, imò sub conditione tali, quæ planè amoris naturali, quo homo se ipsum amat, contraria est; & ut sibi tribuat, quod conditionem illam duram ac gravem præstare teneatur, & præstare etiam divino beneficio possit, quia Deum id ita revelasse sibi persuadet, qui tamen mallet Deo tribuere, si amorem sui naturalem sequi vellet, quod omnes homines, aut saltem se & alios quosdam paucos servare velit, sine ulla conditione gravi ac molesta; sibi verò, quòd conditionem talem præstare nec possit, nec debeat. Nec mirum: Mallet enim Deo tribuere honorem istum generalis salvationis longè excellentiorem, vel specialis omnipotentis conversionis longè sibi gratiorem: Sibi verò minus virium, ut majori debito & oneri se eximeret. Itaque si Capellus animum advertat, videbit, hac in re PHILAVTIAN & cæcum nostri amorem potius locum habere, quam in istis, quæ ipse recenset; ac proinde per BIAION retorqueri posse optimo jure argumentum, Arminium eo ipso, quòd vitia ista impugnaverit, in quibus tam manifestè PHILAVTIAS crimen apparet, veritatem, quæ secundum pietatem,

tem est, magis quæsiuisse videri debere, quàm non quæsiuisse. Et revera ita est. Quisquis vel Deum similiorem sibi facit, quàm par est, ut tantò liberius sibi atque animo suo indulgere possit; vel sibi, plus quàm par est, tribuit, ut Deo minus acceptum ferre opus habeat, aut ut se Deo minus obligatum credat, atque ita liberius peccet, is verà *philantiâ* laborat. At qui Deum sibi similiorem facit, quàm par est, quia errore fortean aliquo adductus id ad gloriam Dei magis illustrandam facere credit: & qui sibi plus, quàm par est, tribuit, non quia id se ex aut à se ipso habere, sed ex divinæ liberalitatis beneficio credit, eoque nomine se Deo ad plura & molestiora, quàm vellet, officia obligatum putat, ei *philantias* crimen nullo jure impingitur. Quod si Capellus hîc fortè dicat, non esse necesse ad *philantias* crimen constituendum, ut quis Deum sibi similorem faciat, aut ut sibi plus, quàm par est, tribuat, eo fine atque animo, ut amoris sui ipsius indulgeat, sed sufficere rem ita se habere; ineptior erit, quàm ut refutari mereatur. Ut enim quis amore sui moveri dicatur tum, quum, omnibus diligenter perpensis, non tantum non sentit se amore sui duci; sed contra cum amore sui se duci crederet, si aliâ, imò, contrariâ ratione,

ne,

ne, quæ ipsius carni multò gratior faciliorque est, ageret, ineptum est. Sed nec rei natura talis est, ut opiniones istæ non nisi ex *philantiâ* proficiscantur; quia, credere Deum sibi similiorem, quàm par est, sibi verò plus justo tribuere, non necessariò est Deo aliquid detrahere, quod suum est, aut sibi arrogare, quod suum non est: Quid enim detrahit Deo, qui id, quod Deo tribuit, non aliter tribuit, nisi quia maiorem perfectionem esse credit, habere id, quod tribuit Deo, quàm non habere? Et quia Deo id tribuit eâ tantum de causâ, quòd Deum id sibi ipsi tribuere sub ratione perfectionis majoris credat? Etsi enim in eo fortè erret, quòd Deo tribuat id, quod perfectio non est, in eo tamen non errat, quòd Deo illud tribuere nollet, nisi perfectionem esse crederet, aut quòd Deo tribuere nolit, nisi quod perfectissimum esse credit; sive accadat, Deum eâ ratione ipsi similiorem reddi, sive dissimiliorem. Hoc enim præter intentionem ejus est. Quid verò etiam sibi arrogat, qui id omne, quod sibi tribuit, non sibi tribuit, tanquam si à se id habeat, sed totum Deo & divinæ gratiæ acceptum refert? Hoc enim quomodo fieri potest ab eo, qui se ipsum amat? Amaret enim talis se ipsum, & simul non amaret.

Atque hæc quidem sufficere possent solvendo huic argumento. Verum ut Capellus ejus infirmitatem clarius intelligat, retorquebo argumentum contra ipsum, an non majori jure, ipse judicet, & tu Lector. Qui errores duos impugnandos sibi sumsit, quos veritati, quæ secundum pietatem est, vel pietati & sanctimonix vehementer, imò potissimum videbat officere, ille censendus est, veritatem, quæ secundum pietatem est, seriò quæsiisse. Arminius impugnavit errores tales duos. Ergo. Minorem sic probo. Errores duo erant. 1. Quod quidam Deum homini dissimiliorem facerent, quàm par sit. 2. Quod Deo non satis, homini verò plus quàm satis, tribuerent. Primum sic evinco: Deum homini dissimiliorem faciebant, quàm par est: Quia Deo eximebant affectus illos, qui sunt perfectiones, partim simpliciter simplices, partim simplices, quos ipse Deus sibi passim tribuit; ita ut in ijs, tanquam in gloriosis proprietatibus suis, gloriatur, quos ipse sibi inesse dicit perfectius, quàm ulli creatæ rei inesse possunt, quos ipse homini, tanquam perfectiones indidit, cum eum ad imaginem sui crearet; qui, cum ab homine excoluntur, homini insunt per modum virtutum, quæ Deo ita gratæ sunt, ut eas præmio æterno remu-

remunerare velit: Contra, quia attribuebant affectus, vel potius actiones tales Deo, quæ homini insunt per modum vitiorum turpissimorum, quas Deus in homine odit atque averfatur, & propter quas hominem gravissimè punire vult: Ex:gr: Eximebant Deo amorem naturalem erga creaturam suam, ad imaginem ipsius conditam; quia statuebant, Deum posse odio proprie dicto odisse, id est, æternis cruciatibus destinare creaturam suam, quâ talem, antequam ullius culpæ aut inobedientiæ rea sit, aut rea esse cognoscatur; tanquam si gloria divina in eo sita sit, ut dissimilis hac in parte reddatur hominibus & animantibus ceteris, quæ factus & liberos suos naturaliter amant. Neq; obstat, quòd Deum dicant amare electos suos: Amor enim hic non est actus affectûs naturalis in Deo, sed voluntatis liberæ: Eo ipso enim quòd electas quasdam creaturas dicunt, reprobata alias fatentur; & quia reprobationem faciunt actum odij, quo Deum odio habere posse, imò actu odisse volunt creaturas quasdam suas, quâ tales, fatentur Deum naturaliter non esse affectum affectu amoris erga creaturam suam: Hic enim affectus non permetteret ut odio simul eandem haberet: non potest enim simul amare & odisse. Hic error autem idcirco peior

C 5

est,

est, quod odium hoc Dei extendant ad longè plures creaturas, quàm amorem: Dicunt .n. Deū multò maximā hominū partē odisse, & æternis cruciatibus destinasse; elegisse .a. paucissimos; nempe ut Deum hominibus dissimillimū faciant, volunt Deū non tantū posse odio habere creaturā suā, quum homo liberos suos non possit nō amare, sed magis ad odium earū, quàm ad amorē, propensum esse. Multò .n. plures odit, quàm diligit. Et sunt inter eos, qui homines, ita reprobos atque exosos, Deo laudes & gratias debere asserunt: Credo, ut tantò dissimiliorem hominibus faciant Deum, qui non nisi gratias agere solēt pro beneficijs, quę effecta amoris sunt; cum reprobi isti etiā pro maleficio, & quidem summo, quod cogitari potest, ad gratias agendas obligentur. Sed aliter, credo, sentirent Authores isti, si in medijs flāmis Halelujah & Carmē epiniciū Deo damnatori cum reprobis istis canendum ipsis esset. Deinde, eximebant Deo affectus verę ac sincerę Bonitatis, Misericordię & Commiserationis, qui tamen Deo verè, licet *kat' analogian*, competunt; quia dicebant, Deum creaturas suas plurimas, culpā Adami primi parentis ipsarū miseras redditas, non dico, in miseria istā relinquere, hoc enim speciē aliquam æquitatis adhuc habet, sed speciosis

sis etiam benevolentiae & affectatae misericordiae ac commiserationis gestibus, signis & vocibus invitare ad contrariam felicitatem, tanquam si eas ex miseria ista eruere cupiat; cum nihil minus cogitet, cum nulla earum compassione duci velit, imò cum eas ad gloriam suam in miseria ista miserissima æternum jacere velit: quod quid aliud est, quàm homini miserrimo crudeliter illudere, & ex optimo Deo pessimum (horreo cogitans) facere? Tertiò, ut homini Deum dissimiliorem redderent, quàm par est, tribuebant Deo, quòd creaturas suas, quas ipse puniverat impotentia præstandi, quod ab ipsis postulare veller, ad præstandum tamen obligaret sub majoris poenae comminatione: Tanquam si justitiæ gloriam mereatur apud Deum id, quod crudelitatis summæ apicem habet inter homines. In hos errores non inciderent, si Deum homini similiorem facerent, quam faciunt: quippe qui per istam divinæ cum homine dissimilitudinis imaginationem ex Deo monstrum reddunt quovis Tyranno deterius.

Eadem est ratio alterius membri: Attribuebant, hodieque attribuunt ejusmodi affectus, vel potius actiones, Deo, quæ homini insunt per modum turpissimorum vitiatorum, & quæ Deus ipse odit. Ex: gr:
Tribue-

Tribuebant Deo, quod inter creaturas suas liberas distinctionem faceret, nullâ ratione habita ejus, qui in ipsis est, sive boni sive mali usus arbitrij istius: Quod has diligeret, istas odisset, quia ita vellet; quod parentum stultorum est, & qui parentum nomine inter homines indigni sunt; quod illas amaret immutabiliter, has odisset, implacabiliter: quod in illis ipse arcana quadam vi efficeret, quod ipsas facere præcipit: his præciperet, ad quod faciendum ipsas reddidit impotentes: quod illis omnia peccata remittat, neque unquam propter ea, licet gravissima & frequentissima, eas odio habere velit: his nulla remittere, sed minima quæque ad majorem ipsarum condemnationem imputare, imo æternos & inexhaustos tandem cruciatus, sine ulla gratia aut commiseratione, velit infligere. Quæ omnia Deo nunquam tribuissent, si ipsum homini dissimiliorem, quàm par est, non fecissent. Quis enim homo est, Schyra licet sit ac Barbarus, qui ab ista agendi ratione non toto animo abhorret? Imo, quis homo est, qui non videt, ineptè Scripturam locutam fuisse, cum Deo tribuit viscera, non paternæ tantum miserationis, sed *kat' exocheen* patriarum commiserationum, imo plus, quam maternas: cum eum cle-

clementem , misericordem , tardum ad iram pronunciat? Fieri non potest, quin credat; aut dicis tantum causâ has Virtutes Deo tribui, & à Deo hominibus commendari; aut eum, qui contraria Deo tribuit, viscera sua paterna Deo crudeli manu evellere, ex Patre Tyrannum, belluâ & fera quavis immaniore, ex tardo ad iram pronum ad odiû, imo pronioré ad odium, quàm ad clementiam, quantum in ipso est, reddere. Sed plura de his postea. Sequamur Capellum nostrum.

Ut hæc, quæ credit vitia esse, exaggeret, non satis ipsi est, quòd ea errores apellet, *Hereses* vocat, & quidem *tetras*. Quales igitur? *Prior*, inquit, *Anthropomorphitarum*; *Altera Pelagianorum dicetur à nobis, docendi gratiâ*. Nimirum infami nomenclatura opus erat, ut non sine gravi causâ damnari crederentur. Horror incutiendus erat, & fulmine percellendi erant animi. Ita fit: Nominibus & titulis odiosis imperitæ plebis odia excitantur. Istis armis pugnant multi, non rarò fælicius & fortius, quam validis rationibus. Stupet populus in titulis: Si opinioni alicui nomen tantum hæreseos, olim damnatæ, præfigas, etiamsi cum ea nihil commune habeat; imò etiamsi non hæresis, sed ipsissima veritas sit, ab ea, tanquam

tanquam à Gorgonis capite, refugit; solius
 nominis odio. Nempe, vel puerorum in-
 star larvis & ΜΟΡΜΟΛΥΚΕΙΟΙΣ istis terre-
 tur: vel, si forte contingat, opinionem ali-
 quam jure titulo hæreseos damnatæ infi-
 gniri, stultorum instar ab ea abhorret; non
 quia falsa est, aut quia falsam eam esse soli-
 dis rationibus persuasa est; sed quia illam,
 ut falsam, ab alijs damnatam esse audit. Et
 hinc natum est, quòd videamus Doctores
 non paucos, quia istis nominibus tam fæli-
 citer apud populum pugnari vident, si in-
 tegræ hæreseos nomen aut titulum affricare
 alicui nequeant, dimidiæ aut simili hæreseos
 nomine digladiari, tanto cum successu, ut
 ad alienandos animos aliâ re opus ferè non
 habeant. Indigna hæc sunt ijs, qui Reformationem
 profitentur. Catholicorum Romanensium, qui
 Ecclesiæ aut Concilijs tribuunt judicium,
 quod falli non potest, alia est ratio. Sentiunt
 ij & loquuntur consequenter conscientiæ &
 opinioni suæ. Sed eos, qui credunt, Con-
 cilia omnia errare posse, qui eo nomine etiam
 à Romanensibus secesserunt, qui de istâ agendi
 ratione toties ipsi conquesti sunt, qui ex Scrip-
 turis solis convinci se cupiunt, pudere meritò
 debet talium artium: idque eo magis, quòd
 ne quidem Catholicorum Romanensium
 fidem

fidem atque ingenuitatem hac in parte imitentur. Solent Romanenses id religiosè operam dare, ut non damnent aut infament sententiam hæreseos damnatæ titulo, nisi eam, quæ ipsissima illa hæresis est: Nunquam suo animo tantum indulgent, ut nomen heretici damnati tribuant ei, qui heresin illam ipsam, quæ in terminis olim damnata est, non tenet: Minima quæque discrepantia apud eos novo Ecclesiæ judicio opus habet, ut intelligant an hæresis sit. At ij, qui se Reformatos profitentur, plus sibi indulgent: Si quam opinionem damnare volunt, quam falsam esse statuunt, ut speciosè illud faciant, hæreseos titulum, veluti atrum THETA ei præscribunt; etiamsi opinio cum hæresi istâ nihil habeat commune, & is, qui opinionem illam suam profitetur, heresin illam, cujus nomen opinioni ipsius induitur, paratus sit ostendere ex Actis & Decretis veteribus cum opinione suâ nihil habere commune; imò, quod plus est, etiamsi is paratus sit eam apertè damnare, aut factè olim damnationi subscribere: Sufficit ipsis, si tantum aliquid cum ea commune habere videatur; imò, quod pejus est, hæresin illam pro arbitrio suo fingent in eo sitam esse, in quo hæresis sita non est; sed quod

è re

è re & usu ipsorum est : Fædo sanè & de-
 testabili more. Nā si illa eadem hæresis est,
 quæ olim damnata est, cur id non ostenditur
 in terminis ? Si non est eadem , sed nova
 hæresis , cur non damnatur novis rationi-
 bus , sed veteris hæreseos nomine infama-
 tur ? Levissima quæque differentia mutat
 sæpe totum Quæstionis statum. Docent id
 Massilienses , qui, eo quod accedere non-
 nihil videbantur ad Pelagij hæresim, Semi-
 pelagiani dicti quidem sunt; sed quia hære-
 sim eandem in terminis non tenebant, nun-
 quam hæreticorum nomine fuerunt infa-
 mati. Hæc si cogitasset Capellus, pro ea,
 qua debuerat , æquitate abstinuisset à pravo
 isto , & à suis olim damnato more. Quid
 enim ineptius dicere potuit , quam , *Prior*
Anthropomorphitarum ; Altera Pelagianorum
hæresis dicetur à nobis, docendi gratia ? Si do-
 cendi gratia, revera non sunt ipsissimæ illæ
 hæreses : aut si sunt ipsissimæ illæ hæreses,
 cur vocat eas, docendi gratia, istorum hære-
 ticorum hæreses ? Quid enim hoc ad rem
 facit , utrum ante istos hæreticos hæreses
 etiam illæ eedē fuerint , nec ne ? Sive enim
 eæ fuerint , sive non fuerint ante illorum
 tempora , dici utique non debent illorum
 hæreses, nisi ea propter quæ illi ut hæretici
 suis temporibus damnati fuerunt. Sed vo-
 luit

luit fortasse Capellus nova hac Formula sua, *Docendi gratiâ*, declinare certamen illud, An reipsa Pelagiana sint Dogmata illa, quæ impugnat, ut effugio locum haberet; quia vidit fortasse invalidis rationibus hætenus pro Affirmativa à suis pugnatum esse. Id si fecit, magnum certæ fecit causæ suæ præjudicium, nec minorem animo suo vim, ut dedecus Ecclesiarum Gallicarum, quæ Arminij opinionem Pelagianæ hæreseos titulo audacter incæstaverant, colore aliquo tegeret, aut diversum ab illis sentire non videretur. Prudentius fecisset, si omninò quæstionem hanc totam præterijssset. Etenim tam clarè, tam solidè & breviter evicit, meo judicio, Vir Clariss. D. Hugo Grotius, quem meritò doctissimum & disertissimum Remonstrantium patronum vocat, & prolixius Polyhistor ille Gerardus Vossius, quod Dogmata Remonstrantium Pelagiana dogmata non sint; ut non nisi cum novâ infamiâ contrarium sustinere posset Capellus. Sed ne deessent Capello latebræ, *Docendi gratia* Pelagiana ista Dogmata, &, quod facetum est, Anthropomorphitica facere maluit, quam quod reipsa essent eadem. Audiamus ergo Capellum nostrum, *docendi gratia* hæc adlerentem, dignum certe, qui non alio genere

D armo.

armorum , quàm fœdis hæresium nomini-
bus vicissim maculetur, *docendi gratia.*

Anthropomorphitarum hæresin appello, in-
quit , *non quæ humana membra tribuit Deo.*
Atqui hæc tamen est propria vocis Etymo-
logia. Quam igitur ? *Quæ adfectus humanos*
subtiliores quidem illos, sed tamen Deo indignos,
imò fœdos, verè Deo tribuit, ut iram, furorem,
pænitentiam, &c. Libet hic obiter tria quæ-
rere, antequam Capellum falsi manifestum
faciam. 1. Cur Capellus iram , furorem,
pænitentiam adfectus appellet subtiliores?
Quis enim non intelligit illos esse crassi-
ores , & fortè omnium , qui recenseri so-
lent, crassissimos ? 2. Quid intelligat per
adverbium, *verè ?* An idem, quod *proprie;*
ita ut adfectus hi statuatur in Deo esse eo-
dem prorsus modo , quo sunt in homine,
involverentes in suo conceptu formali eas-
dem alterationes & imperfectiones : An
prout opponitur tò *falso;* ita ut in Deo esse
dicantur absque falsitate , propter veram
quandam analogiam, quam habent cum ad-
fectibus humanis, seclusâ omni passione &
inordinatione ? Si prius dicat, speciem ali-
quam habet id, quod dicit; sed ineptè eos,
qui adfectus ita proprie Deo inesse vo-
lunt , Anthropomorphitas vocat *subtiliore*
modo. Qui enim ita proprie in Deo ad-
fectus

fectus esse statuunt, ij revera sunt Anthropomorphitæ crasso, imo crassissimo modo. Si posterius, jam necessum est, ut Theologos non paucos Veteres ac Novos Anthropomorphitas faciat subtiliore modo, & adfectus ne quidem secundum veram analogiam Deo competere dicat. Ex: gr: Quæro, quid Capellus intelligat per *Iram*, quam Deo verè competere non vult? An bullitionem sanguinis circa cor, qualis in homine locum habet; an nudum depulsiois adfectum, justitiâ temperatum, qui sine omni alteratione corporeâ est, & quem sine initio & peccato esse posse, docet Apostolus? Prius, credo, non dicet se intelligere Capellus, nisi sibi ipsi velit contradicere. Qui enim iram talem Deo tribuit, is est Anthropomorphita, non subtiliore, sed crassissimo modo. Tribuit enim Deo corpus, cor & sanguinem, qualis in homine est. Posterius si dicat, necessum est, ut doctores non paucos Veteres, ac nominatim Lactantium subtilem Anthropomorphitam faciat. 3. Quid per suum, &c. velit? nec enim sine causa adjecit illud postea illos crassissimos adfectus. Nempe, non putavit è re suâ esse alios adfectus nominare, in quibus apparet ratio perfectioris excellenti modo, & quidem vel propriè,

priè, vel *kat' analogian*, quique propriè ad materiam Prædestinationis rectè intelligendam faciunt, quales sunt, Amor, Odium, Bonitas, Gratia, Misericordia, Longanimitas, Desiderium, Spes, Tristitia, quos omnes Deo, non modò non propriè, sed ne quidem verè *kat' analogian* competere dicat necesse est Capellus, omnesque ij, qui Sententiam Calvinì de Prædestinatione sequuntur, & homini liberum inesse negant arbitrium, cùm Deus ab eo postulat obsequium. De Amoris adfectu evicimus hoc certum esse in præcedentibus. De cæteris res est similiter plana. Quæ enim vel mica imò species naturalis bonitatis, gratiæ, misericordiæ, longanimitatis Deo tribui potest ab ipsis, respectu reproborum; Cum tamen Scriptura eas Deo tribuat in ordine ad ipsos? Odit enim illos implacabiliter Deus, ut ajunt, & actus omnes bonitatis, gratiæ, longanimitatis, quos circa illos exercere videtur, tantum abest, ut adfectus veri vera signa sint, ut contra odij, amoris specie velati, effecta sint, & ad eorum condemnationem aggravandum faciunt: Ita enim disertè ait Calvinus lib. 3. Institut. Cap. 24. nu. 13. *Ecce vocem ad eos (reprobos) dirigit, sed ut magis obsurdescant; lucem accendit, sed ut reddantur cæciores; Doctrinam*

*Etrinam profert, sed quâ magis obſtupescant; re-
medium adhibet, sed ne ſanentur.* Eadem est
ratio deſiderij, ſpei, triftitiæ, reſpectu re-
proborum. Quod enim deſiderium, quæ
ſpes, quod votum, ut reprobi officium
ſuum faciant? Ecquis enim ſanus deſide-
rat, ut cæcus, cæcus manens, videat aut le-
gat? Optatne ſapiens, ut mutus, mutus
manens, loquatur? Imò verò ſperatne quiſ-
quam, ut veniat, quem venire non vult,
imò quem, ut venire non poſſit, impoten-
tem ipſe reddidit? Quæ itaque triftitia, vel
kat' analogian, Deo verè tribui poteſt, quan-
do reprobi officium non faciunt? Certè
non alia Deo tribui poteſt, quàm quòd
Dæmon ipſe ſe non convertat, id eſt, nul-
la. Et ne reſpectu reproborum tantum ad-
fectus iſtos Deo adimi ab ipſis putemus, re-
ſpectu etiam Electorum omnes Deo adi-
mant neceſſe eſt. Obſecro enim quæ lon-
ganimitas, quæ patientia, quæ ſpes, quod
deſiderium, quis dolor, reſpectu eorum,
Deo verè *kat' analogian* tribui ab ipſis po-
teſt? Si nemo eorum plus boni poteſt face-
re, quàm facit, nemo plus mali omittere,
quàm omittit, nulla longanimitas, nulla
patientia circa ipſos locum habet. Tantum
ab ipſis fit & non fit, quantum Deus ijs
dat, aut ſubtrahit. Nihil itaque tolerat Deus

in ipsis aut ab ipsis, nisi suam ipsius actionem aut subtractionem, quæ à voluntate ipsius solâ dependet: Deinde, quæ analogia spei tribui potest Deo, respectu Electorum, cum ipse in Electis efficiat omnia per eam vim, quæ non potest non effectum sortiri? Quæ vicissim tristitiæ analogia potest tribui Deo, quum fieri non possit, ut electi non faciant id, quod Deus ab ijs fieri vult, quia Deus ipse id in ijs efficit, vel, si id non faciant, quum id fiat propterea quòd Deus ipse id in ijs effectum dare nolit, & ipsi ea propter ne hilum quidem Deo minus sint dilecti? Hos omnes itaque adfectus, non modò non propriè, sed falsò Deo tribui vult Capellus, cum ait, *Anthropomorphitas docendi gratia vocari posse eos, qui Deo adfectus verè, N. B. tribuunt.* Omnes enim cæteros adfectus per suum, *Et Cætera*, designare voluit, etsi callidè eos non expresse- rit. Sed dicet fortasse Capellus, se per adverbium, *Verè*, intelligere idem quod *propriè*, & non *kat' analogian*. Esto: quanquam hæc ipsius mens esse nullo modo possit, si consentaneè sibi loqui velit. Esto, inquâ. Quid tum?

Tales adfectus Deo tribuere non verecundantur Arminiani, inquit.

Hic pedem fige, Capelle, & dic, ubi? Cedo locum vel unicum, ubi Arminius vel

vel Arminiani furorem Deo verè , id est, propriè tribuere non verecundantur. Mirum , ni brevi eisdem Deo etiam insaniam verè competere asserentes facias. Deinde, cedo locum , ubi pænitentiam verè & non *kat' analogian* Deo tribuunt. Imò adedò cedo locum , ubi iram Deo propriè & non *kat' analogian*, aut *kat' anthropopatheian* competere asserunt. Denique , cedo locum, ubi cæteros omnes adfectus, etiam crassissimos, siquos crassiores voluisti per tuum, &c , designatos , Deo aliter , quàm per *anthropopatheian* & *analogian* , cum Theologis & Philosophis omnibus, tribuunt. Non facies. Et ut videas , perperam & per calumniam hæc ipsis impingi, en propria Arminij & Remonstrantium verba, ex quibus contrarium, Sole clarius, liquet. Arminius in Thesisibus suis de Naturâ Dei, quas pro gradu Doctoratûs publicè ventilandas proposuit Thes. 73. ita disertè loquitur: *Hosce adfectus Deo tribuim⁹ propter effectus nonnullos ipsius illis analogos, citra ullam passionem, utpote simplici & immutabili: & citra ullam inordinationem & rectæ rationis repugnantiam.* Ut autem videas, eundè non docuisse aliter in occulto , quàm in publico, en verba privatarum Disputationum, Disput. xx. Thes. 12. *Horum adfectuum nonnulli Deo competunt, ut simpliciter*

pliciter perfectionem in se continentes: alij, qui videntur imperfectionis quippiam habere, illi tribuuntur anthropopathôs, propter effectus non-nullos ipsius, analogos adfectibus creaturarum, citra ullam tamen passionem, &c.

Remonstrantes etiam in Actis & Scriptis suis Synodalibus pag. 102. In defensione Sententiæ suæ, circa. 1v. Articulum, de Gratia operatione, eodem modo loquuntur. Cum enim quæritur, Quomodo Deo expectatio tribuatur, respondent illi hoc pacto: *Habent quidem tria ista* (quæ videlicet ante allegata sunt, ut quis possit rectè dici expectare) *locum, cum à se mutuo aliquid expectant homines; & fatendum est, eodem plane modo Deo spem tribui non posse, eamque, quando Deo tribuitur, theoprepoos explicandam esse. Sed tamen ita explicanda est, ut ad humanam spem ea, quæ Deo tribuitur, analogiam aliquam habeat.* Plura non allego, quia opus non est, & quia libris destituor in hoc exilio meo. Sexcenta alioquin addere possem. Hæc loca si non vidit Capellus, næ oscitanter admodum legit Arminij & Remonstrantium Scripta, quod parum decet eum, qui tam audacter hæresin tam atrocem, qualis est ANTHROPOMORPHITON, ijs impingit. Si videre noluit, tanto est pejor, quod contra animi sui dictamen calumnie-

lumnietur Christi servos. Sed dato etiam, at non concesso ; quod Arminius adfectus hos verè tribuisset Deo, uti Capellus vult, an propterea merebatur odioso isto titulo, Anthropomorphita, appellari ? Æquissimum quidem est, ut Deo summa tribuatur perfectio. Id meretur Majestas ipsius & excellentia ΤΕΕΣ ΜΕΓΑΛΟΠΡΕΠΟΥΣ ΑΥΤΟΥ ΔΟΞΕΕΣ, ut Petrus ait 2. Epist. cap. 1. Nunquam satis digne quisquam de eâ aut sentire potest, aut loqui : Quicquid conceperis aut dixeris, id infra illius sublimitatem est : Sed si quis fortè in eâ concipiendâ imprudenter erret, aut Deo tribuat quædam, quæ non satis digna divinæ & gloriose ipsius Majestati sunt ; sed quæ tamen Deo non tribuit, nisi quia ea Majestatem Dei maximè decere credit, an eum statim, cætera licet ab Anthropomorphitarum sectâ abhorreat, enormis illius hæreseos postulabimus ? Certè perfectio cognitionis divinæ, quæ nobis hîc necessaria est, ut salvemur, in eo non est posita, ut distinctè sciamus, aut sollicitè scrutemur, quid propriè, quid impropriè in essentiâ divinâ sit, vel quid Deus sit in seipso ? Nemo id novit, nisi Deus ipse, & quibus ille se videndum præbet in gloriâ suâ. Notitia hæc præmium erit nostræ obedientiæ in futuro

illo sæculo ; Ibi *videbimus eum, sicut est.* Quotquot eâ de re confidenter pronunciant, videant, ne, dum subtilitatem suam in concipiendo nimis acunt, vani fiant, & HYPERONGKA MATAIOTETOS, ut Petrus ait, loquantur, MEE NOOVNTES METE HA LEGOVSI, METE PERI TINOON DIABEBATIOVNTAI. 1. Tim. 1. 7. *Nescire velle, quæ Magister Optimus Nescire nos vult, erudita inscirta est.* Perfectio divinæ cognitionis illius, quam nos habere hic oportet, in eo præcipuè versatur, ut sciamus, qualé Deus sese nobis revelaverit : hoc enim necessarium est, ut eum rectè colamus, ei obediamus, & in eo fiduciam nostram colloceamus. An verè an metaphoricè quædam ei competant, necessarium non est ut sciatur, si id ipse nobis revelare dignatus non est. Nostra obedientia, cultus & fiducia non dependent ex eo : neque fieri potest, ut indubitato persuasi simus de eo, nisi Deus ipse id nos scire velit : Cum autem Deus in Scripturis ita se revelaverit, ut nullus fermè sit adfectus rationalis in homine, quem Deus sibi passim non tribuat, nihilque tamen dixerit, unde colligi possit propriè an impropriè id intèlligi velit ; utique si quis sub ijsdem Scripturæ terminis adfectus illos Deo tribuat, atque ita Deum sibi similio-

rem

rem fortè faciat, quàm par est, si quis præcise rem trutinare velit, indignus profectò est, qui Anthropomorphita vocetur. Nec enim, cum id affirmat, revera id ita in Deo eodem prorsus modo esse, quo in homine est, affirmat; sed à Deo id ita revelatum sibi affirmat, tanquam si in Deo revera esset. Qui autem adfectus istos negant Deo verè tribui, videant, ne dum Anthropomorphitæ fieri, docendi gratia, metuunt, Deum faciant, non dico homini dissimilem, sed veris omnibus, quæ in homine sunt, perfectionibus destitutum; & dum adfectus, quos Deus sibi ipsi tribuit, & qui revera nullam imperfectionem in suo conceptu involvunt, propriè ac verè Deo inesse negant, occasionem sibi aut alijs dent pejora cogitandi de Deo, quàm si adfectus verè ipsi tribuerent. Multò forte minora & pauciora incommoda habet, si concipias Deum, adfectibus propriè præditum, quàm si eum, nescio quod, immobile & ASTORCON Numen facias, in quo non modò non propriè, sed ne verè quidem, adfectus ullus locum habeat: Certè cum gloriam suam Mosi videndam dabat Deus, clamasse dicitur ex nomine Iehovæ, *Dominus Dominus, fortis, misericors & miserator, tardus ad iram, & multus miseratione.* Exod. 34. In Adfectuum

Etium horum pulchritudine & cumulo vult Deus, veluti in speculo, conspici gloriam & bonum omne suum. *Ostendam enim tibi*, dixerat Deus Mofi, *omne bonum meum*. Sed de hac re satis. Progrediamur ad secundam hæresin.

Hæresin alteram, & ipsam PHILANTIAS filiam, Pelagianismum, docendi causa, appellamus eam, quæ Deo non satis, homini verò nimium tribuit, si ve quæ beneficium extenuat, quo Deus Electos suos ex iræ Filijs, peccati servis, facit lucis filios, &c.

Hic, quia docendi gratia hanc opinionem Capellus Pelagianismum nuncupat, liceat mihi, discendi gratia, quærere ex ipso, quid in terminis sit *tò*, *non satis*, & *tò Nimium*. Hoc quamdiu explicatè & peculiariter non docet, nihil docet; nulla est ipsius in docendo gratia. Fieri enim posse non negabit, opinor, ut quis Deo non satis tribuat, homini autem nimium, & is tamen propterea hæreticus non sit, nedum Pelagianus: Sicut contra fieri posse non negabit, ut quis Deo nimium, homini verò non satis tribuat; & interim hæreticus propterea censendus non sit. Exemplo utrumque clarum faciam. Primum. Fieri potest, ut quis tribuat Deo, quòd Electos omnes per solam illuminationem intellectus, absque
ulla

ulla formali immediatâ aut directâ actione in voluntatem, ex iræ filijs, peccati servis, faciat lucis filios & justitiæ servos. Non negabit hoc, opinor, Capellus aut si neget, videat, quid Camero, Professor Salmurien- sis, in Thesibus suis & Collatione, cum Tilenno habitâ, sentiat. Procedo. Qui hoc facit, is non tribuit Deo satis, juxta Capellum & Canones veteres, ac novos Synodi Dordracenæ & Alezianæ. Vult enim Capellus Thes. xv. ut credatur, non intellectum tantum cæcitate, sed & voluntatem ingenitâ pravitate laborare: Ac proinde in conversione hominis requiri actionem immediatam, tam in voluntatem, quàm in intellectum: Quod Camero, & qui ipsum sequuntur, ineptum statuunt necesse est, si velint THESIN suam PHYLATTEIN. Deo itaq; non satis tribuunt, & quia voluntatem ingenitâ pravitate laborare negant, homini etiam ut nimium tribuant necesse est. Quid? An horum opinionem Capellus appellabit etiam hæresin, docendi gratia, & quidem Pelagianismum, PHILAVTIAS filiam? Videat itaque, quid de Camerone alijsque, imò de collegâ suo Molinæo, statuendum sibi sit. Secundum exemplum esto. Fieri potest, ut quis tribuat Deo, quòd Electos suos per vim physicam & irresistibilem ex iræ filijs

filijs, peccati servis, faciat lucis filios, justitiæ servos. Nec hoc negabit, opinor, Capellus, aut si neget, videat quid Gomarus, qui Synodi Dordracenæ membrum fuit, in Declaratione sua Pag. 20. Calvinus, Zanchius, Perkinsius, alijque complures eâ de re dicant. At, qui hoc facit, is tribuit nimium Deo, per consequens, is non satis tribuit homini. Quid? An hoc negabit Capellus? Scire aveo: Si non negabit, an & hunc propterea hæreticum Pelagianum dicet? Videat itaque quot hæreticos & Pelagianos in sinu suo foveat Ecclesia Reformata. Hæc cum ita sint, discendi gratia iterum quero ex Capello, quâ in re positum sit illud *Non satis*, & illud *nimum*, quod Capellus vocat. Hæreseos crimen atrox admodum crimen est: Per eam enim Articulus necessarię veritatis evertitur. Qui de eo statuit, necesse est, ut punctum illud, in quo hæreseos forma consistit, accuratè designet. Alioquin facilè & graviter errari potest. At nihil minus, quàm hoc, egit Capellus. Ita generaliter de eâ loquitur, ut, quid velit, distinctè sciri impossibile sit. Generalibus quibusdam verbis contentus dirum illud carmen canit Thes. xvi. *Quacunque ratione gras-*
seris

seris ad extenuationem beneficii illius, quo Deus Electos suos ex iræ filiis, peccati servis, facit filios lucis, servos justitiæ, quantumvis in speciem, vel, N. B. - reapse aliam viam ineas, quàm Pelagius, Pelagianus vocari potes, docendi gratia. Esto: Ita sit. At quid illud est, quo pæcisè extenuatur beneficium Christi? Hoc exprimendum erat clarè & in terminis. Nam Capello ne sufficit quidem, si quis, ne beneficium Christi extenuet, subscribere paratus sit omnibus sanctionibus, contra Pelagium constitutis. Id enim Arminium paratum fuisse facere, agnoscit ipse Thes. x v i i i. Hoc circulo itaque includes te, Capelle. Noli extravagari & intra generales terminos te abdere: ambagibus & circumlocutionibus abstinendum est: Rhetorum istæ sunt propriæ & Sophistarum, qui causæ suæ diffidunt. Disputator, veri studiosus, rem acu tangit. Uno verbo dicendum erat, quid illud sit, quod desideratur, ut *Deo satis* tribuatur; & quid illud sit, quod superest, in quo *homininum* tribuitur. Alioquin, si generali isto axioma, *Quisquis Deo non satis, homini verò nimium tribuit*, jure alicui Pelagianismum impingi posse credis, vide sis, an non multo majori jure te Pelagianum imò Anthro-

Anthropomorphitam, esse evincam. Deinde, an non juxta illam ipsam generalem tuam hypothesin Arminium ab isto Pelagianismi crimine sim vindicaturus.

I. Argumentum meum, ut probem, Capellum non tribuere satis Deo, imò tribuere Deo indignas ac fœdas affectiones, tale est:

Qui tribuit Deo voluntatem & intentionem salvandi paucos, etiam ex ijs, quos ad salutem vocat, is non tribuit satis Deo, sed multum gratiosæ ipsius voluntati detrahit. Ratio consequentiæ est, quia Apostolus expresse dicit, *Deum omnes* (quos vocat saltem) *velle salvari & ad agnitionem veritatis pervenire* 1. Timoth. 2. & Petrus 2. Epist. 3. *Deum non velle, ut quisquam pereat, sed ut omnes ad resipiscentiam veniant*: cujus contrarium est, Deum velle, ut plurimi pereant, & ut non nisi pauci quidam electi ad resipiscentiam & cognitionem veritatis perveniant: quod indignum divinæ gratiæ, & fœdum est. At Capellus cum sua Synodo Dordracenâ & Alezianâ voluntatem ejusmodi Deo tribuit. Ergo, ex vi suæ propriæ hypotheseos, est Pelagianus & Anthropomorphita.

II. Argumentum, Qui tribuit Deo non nisi voluntatem externam, sive signi tantum, & ex primâ Dei intentione inefficacem, quando reprobos vocat ad salutem; imò

imò qui tribuit Deo voluntatem planè simulatam, quâ videri vult velle salvare, quos ex professo ad gloriam suam reprobare, id est, perdere voluit, ille non tribuit satis Deo, & tribuit Deo, quod indignum ac fædum in homine est. Ratio majoris per se patet, & alibi contra omnes possibiles exceptiones adserta est. Vide Acta & Scripta Synodalia Remonstrantium. Atqui Capellus cum sua Synodo Dordracenâ & Alezianâ tribuit Deo non nisi voluntatem talem. Ergo est Pelagianus, aut, si malis, Anthropomorpha, ex propriâ suâ Confessione.

III. Argumentum. Qui tribuit Deo voluntatem, quâ vult, ut ij, quos ipse propriâ suâ voluntate ad gloriam nominis sui reprobavit, credant in Iesum Christum, & si credere nolint, majoris condemnationis rei fiant, ille tribuit Deo id, quod Deo indignum, & fædum in homine est. Ratio majoris est: quia Deum velle, ut ij, pro quibus Christum mori noluit, credant, Deum voluisse, ut pro ipsis moreretur, & de facto pro ipsis mortuum esse; aut clarius, Deum velle, ut ij credant, sibi remissa esse peccata sua propter Christum, quibus absolutè peccata remittere noluit, est Deum velle, ut credant verū esse id, quod falsum est, quod indignum est Deo, & fædum in homine.

E

Deinde

Deinde, Deum velle, ut, si isti non credant, rei fiant majoris condemnationis, est Deum velle punire aliquos, propterea quod non crediderint mendacio, quod non minus indignum Deo & fædum est. Utrumque hoc tribuit Capellus cum suis Deo. Ergo est Anthropomorphita suo pte judicio.

Quod verò Capellus tribuat homini Nimum, his argumentis evinco.

I. Qui tribuit homini, quod non possit non obedire, quando Deus ipsi sub promisso vitæ & comminatione mortis mandat, ut obediat, ille tribuit homini nimium. Ratio est: Quia tribuit homini id, per quod promissio & comminatio divina prorsus & in totum enervatur & evacuatur. Promissio enim & comminatio sunt argumenta suadentia, ut homo sponte ac liberè faciat id, quod jubetur. At argumenti suasiui vis omnis eliditur, quando is, qui jubet, in eo, cui jubet & argumentum illud proponit, id ipsum quod jubet, efficit per aliam potentiam & motionem arcanam, & quidem ita, ut is, cui jubet, non possit non illud facere, quod jubet. Præterquam quod contradictionem implicet, mandare ut ipse facias, & efficere arcanâ vi, ut id à te fiat: Velle enim ut alius faciat, & velle ut alius non faciat, contradictionem involvit. Deinde, promissio-

missionis & comminationis vis eliditur in totum, quia ei, in quo per talem gratiam efficitur id, quod jubetur, promitti præmium non potest, neque id, quod promittitur, sub ratione præmij, mercedis aut coronæ conferri. Adde, quod comminatio mortis planè ridicula fiat: Deum enim comminari mortem ei, quem mori non vult, aut eum, qui à Deo electus est, & qui se electum esse certâ fide persuasus est, movere argumento, à comminatione mortis æternæ sumto, tam est ineptum, quàm reprobum promisso vitæ æternæ movere, ut credat & non pereat. Atqui Capellus cum Synodalibus suis hæc tribuit homini. Ergo est Pelagianus suo pte animo.

I I. Qui tribuit homini Electo, quem vocat, quòd semper maneat in gratiâ Dei, etiam cum in medijs sceleribus, contra conscientiam suam perpetratis, vivit, cum exercet adulterium, homicidiû, Sodomiam, idolatriam, proditionem, Regicidium, rebellionem; & breviter, quæcunque tandem peccata sint (solam excipe infidelitatem: in hanc enim incidere nō potest, juxta Capellum, quia credit semper omnia sibi peccata remissa esse, tam quæ facturum est, aut facit, quàm quæ fecit) is tribuit homini nimium. Major hæc per se plana est. Qui

enim hoc tribuit homini, is tribuit ei, quòd peccata nulla vim in illum habeant ad eum condemnandum, quo majus & pejus dici nihil potest. Atqui Capellus tribuit illud homini. Ergo est Pelagianus suo proprio testimonio.

Minores horum syllogismorum non probavi, quia id toties & tam dilucidè factum est in diversis scriptis, & nominatim in Aëtis & Scriptis Remonstrantium Synodalibus, ut soli lucem fàneraturus essem; si aliquid adderem. Et res per se ita certa est, ut, qui Sententiam Capelli & Synodi Dordracenæ vel leviter intelligit, de veritate horum dubitare non possit.

Pergo itaque cum Capello. Dicit ille Thef. xii. duo extrema esse fugienda, ne Pelagianus fias. Primum est, ne peccatorem excusabilem reddas. Alterum, ne quid gratiæ Christi suffureris. Vtrumque generaliter satis. Sed esto. Vtrumque fieri à Capello, ac proinde Capellum suopte judicio Pelagianum esse, sic evinco: Prius quidem.

I. Qui asserit, Deum punire hominem, propter primi sui parentis peccatum, impotentiam credendi & obediendi, &, post inflictam impotentiae pœnam, actum fidei & obedientiae ab eodem postulare, qui sine
potentiâ

potentiâ novâ præstari non potest, is facit hominem excusabilem, ac proinde Pelagianus est, juxta Capellum: Atqui Capellus cum suis hoc facit, quia reprobos impotentia credendi, propter Adami peccatum, punitos à Deo asserit, & ab iisdem nihilominus actum fidei postulari dicit, qui sine novâ potentiâ præstari ab ipsis non potest. Ergo Capellus facit hominem excusabilem, & sese ipsum suo proprio ore Pelagianum facit. Ratio utriusque Propositionis per se clara est.

II. Qui dicit, neminem, nec electum nec reprobū à peccatis abstinere posse, nisi speciali internâ & ex intentione solâ Dei efficace gratiâ singulis momentis à peccando contineatur, is hominem, quando peccat, excusabilem reddit. Ratio est, quia excusatio ipsius nititur defectu divinæ gratiæ illius, qui à solâ Dei voluntate dependet, & quem impedire non est in potestate hominis. Atqui Capellus cum suis hoc dicit. Ergo Capellus Pelagianus est, juxta suam ipsius sententiam.

Posterius hoc pacto evinco:

I. Qui dicit, Christum reconciliare Deo eos solos, quos jam ante amavit amore immutabili & peremptorio, ille suffragatur gratiæ Christi universam vim suam: Ratio est,

E ;

quia

quia tribuere Christo, quod eos, qui reconciliatione opus non habent, reconciliet, idem est, atque negare, quod eos reconciliet. Atqui Capellus hoc facit cum suis: Quia dicit Christum reconciliare eos Deo, quos Deus ipse antea elegit: At quos antea elegit Deus, eos amat et diligit amore æterno & immutabili: Qui autem amantur, reconciliari opus non habent: Reconciliare enim est efficere ut amentur. Ergo Capellus suo proprio testimonio est Pelagianus.

I I. Qui dicit, Christi gratiam non pertinere nisi ad Electos & qui reprobis, qui à Christo vocantur, gratiam sufficientem dari negat, ut Christo vocanti credere & obedire possint, & nihilominus ob spretam gratiam non sufficientem, quam non poterant non spernere, reos eos fieri à Christo dicit majoris condemnationis, is suffragatur gratiæ Christi plurimum. Atqui Capellus hoc facit cum suis. Ergo sua confessione est Pelagianus.

Plura hîc non allegabo, ne prolixior sim. Sufficit, si ostendero, quàm latum campum adversarijs suis Capellus dederit, cum generalibus istis suis axiomatis hæreses tam enormes ijs affricare studet. Dum enim id facit, & quidem nullo jure aut consequentia solida, occasionem præbet illis argumentum

mentum suum retorquendi contra se, atque ita seipsum suo pte gladio jugulandi.

Sed libet jam etiam ostendere, Capellum nullā justā ratione Arminio crimen Pelagianismi impingere, hoc Argumento:

Qui paratus fuit omnia ista, quæ Patres à Pelagio requisiverunt, ad gratiæ divinæ beneficium perfectè explicandū, lubens agnoscere, & qui sanctiones omnes, quæ contra Pelagium, beneficium istud extenuantem, constitutæ olim fuerunt, paratus fuit probare & manu suā signare; ille non potest dici, Deo non satis, homini verò nimium tribuisse, aut beneficium gratiæ divinæ extenuasse. Arminius autē id paratus fuit facere, ut ipse Capellus fatetur Thef. 18. ubi ipsius Arminij testimonium citat. Ergo. Ratio consequentiæ est, quia alioquin dicendum foret, aut Patres beneficium gratiæ Iesu Christi nō satis perfectè definiisse, ac proinde nō satis plenè Pelagij Doctrinā damnaſſe, aut Arminium nō ex animo, sed contra conscientiam suā subſignationem Canonū obtulisse. Utrumcunq; dixerit Capellus, ulcus tanget. Ergo.

Verumenimverò etsi non apertè audeat, tacitè tamen satis indicat Capellus Thef. 16. sibi non sufficere ea, quæ à Patribus, imò à Synodis tam multis & tā solemnibus contra Pelagiū cōstituta olim fuerunt. Ita enim inquit:

E 4

Ista-

Istarum verò Synodorum doctrinam, ut plenius N. B. solidiusque confirmarent Augustinus, Prosper, alijque, deinceps docuerunt, gratiam illam regenerationis non esse omnibus communem, sed electis particularem.

Magna hæc est confidentia, & quæ merito magnis rationibus niti debebat. Quàm ægrè ferret Capellus, si quis Synodo Dor-
dracenzæ, Alezianæ, aut Charentonensi tantum detraheret, quantum ille hic detrahit tot Synodis & Concilijs antiquis, Provincialibus & Nationalibus? Sed nos rem videamus. Esto, demus verum esse, quod Capellus videtur cupere, nihil tamen effecerit. Nam 1. Ad summum non fuit hæc sententia communiter approbata, nec Synodice ullis constitutionibus confirmata; quod ut probem opus non est, quia ita clarum est, ut ipse Capellus id ultrò fateatur Thef. xvi 11. Privata ergo fuit Sententia Augustini & Prosperi, aliorumque, à quâ tum temporis, cum maximè ferveret conflictus cum Pelagio, seorsim quis sine ullo periculo aut suspitione Pelagianismi sentire ac docere poterat. Quod sanè quantum præjudicet causæ Capelli, quis non videt? 2. Gratiam regenerationis ita peculiarem non fecerunt Augustinus, Prosper, ac cæteri omnes istius ævi, quin & priorum omnium

E 5

velit,

velit, adeat tantum doctissimam Disquisitionem Clar. Viri D. Hugonis Grotij, *An Pelagiana sint ea Dogmata, quæ nunc eo nomine traducuntur.* 3. Gratiam regenerationis ita peculiarem electis non fecerunt, ut communem & sufficientem gratiam cæteris vocatis dari negarent. Contra Hieronymus lib. 3. adversus Pelagianos ait: *Etiam his, qui mali sunt futuri, dari potestatem Conversionis & Penitentiae.* Et ad Esa: Cap: 1. *Liberum servat arbitrium, ut in utramque partem, non ex præjudicio Dei, sed ex mentis singulorum vel pœna vel præmium sit.* Augustinus Quæstionum lib. 85. Quæst. 68. sic ait: *Nec illi debent sibi tribuere, qui venerunt, quia vocati venerunt, nec illi, qui noluerunt venire, debuerunt alteri tribuere, sed tantum sibi, quia ut venirent vocati, in liberâ erat voluntate.* Similiter Prosper alijque. Hæc res adeo certa apud Veteres fuit, ut non tantum crediderint omnibus ijs, qui Evangelium audiunt, gratiam istam sufficientem; id est, credendi facultatem dari, sed ijs etiam, ad quos Evangelij fama & lux non pervenit, ejusmodi quædam dona dari à Deo asseruerint, quibus rectè uti possent, & rectè utendo ad majora, atque ita porro ad salutaria dona pervenire possent. Si quis dubitat, adeat eandem, cujus paulò ante
mentio

mentio facta est, Disquisitionem, & lucernam se in sole quærere intelliget. 4. Electionem denique ipsam ab Augustino clare traditam fuisse, *ut puram & nullius boni, quod in nobis futurum sit, prævisione subnixam*, non usquequaque certum est; Capellus pro more suo adfirmat id satis confidenter, cum ipse Prosper, qui omnia Augustini diligenter legerat, ea de re dubitarit, ut ex Epistola ipsius apparet. Nec video, qua ratione solvi possit evidens Argumentum, quod in contrariam partem est: Quod Augustinus Sententiam suam autoritate Patrum omnium, qui usque ad ætatem ipsius scripserant, tueatur, & Pelagij, tanquam novam & recentem præsumptionem, damnet. At omnes ferè Augustino vetustiores Scriptores Electionem non tuentur aliã, quàm quæ præscientiã veræ fidei subnixa est. Ita enim disertè Prosper ait: *Panè omnium parem inveniri & unam Sententiam, quã Propositum & Prædestinationem Dei secundum præscientiam receperunt, ut ob hoc Deus alios vasa honoris, alios vasa contumeliæ fecerit, quia finem uniuscujusque præviderit, &, sub ipso gratiæ adjutorio, in quã futurus esset voluntate & actione præscierit.* Ita est. Ambrosius, quem nominatim pro se stare profitetur Augustinus, disertè ita loquitur lib. 5. de fide

Cap.

velit, adeat tantum doctissimam Disquisitionem Clar. Viri D. Hugonis Grotij, *An Pelagiana sint ea Dogmata, quæ nunc eo nomine traducuntur.* 3. Gratiam regenerationis ita peculiarem electis non fecerunt, ut communem & sufficientem gratiam cæteris vocatis dari negarent. Contra Hieronymus lib. 3. adversus Pelagianos ait: *Etiā his, qui mali sunt futuri, dari potestatem Conversionis & Pœnitentiæ.* Et ad Esa: Cap: 1. *Liberum servat arbitrium, ut in utramque partem, non ex præjudicio Dei, sed ex mentis singulorum vel pœna vel præmium sit.* Augustinus Quæstionum lib. 83. Quæst. 68. sic ait: *Nec illi debent sibi tribuere, qui venerunt, quia vocati venerunt, nec illi, qui noluerunt venire, debuerunt alteri tribuere, sed tantum sibi, quia ut venirent vocati, in liberâ erat voluntate.* Similiter Prosper alijque. Hæc res adeo certa apud Veteres fuit, ut non tantum crediderint omnibus ijs, qui Evangelium audiunt, gratiam istam sufficientem, id est, credendi facultatem dari, sed ijs etiam, ad quos Evangelij fama & lux non pervenit, ejusmodi quædam dona dari à Deo asseruerint, quibus rectè uti possent, & rectè utendo ad majora, atque ita porro ad salutaria dona pervenire possent. Si quis dubitat, adeat eandem, cujus paulò ante

mentio

mentio facta est, Disquisitionem, & lucernam se in sole quærere intelliget. 4. Electionem denique ipsam ab Augustino clare traditam fuisse, *ut puram & nullius boni, quod in nobis futurum sit, prævisione subnixam*, non usquequaque certum est; Capellus pro more suo adfirmat id satis confidenter, cum ipse Prosper, qui omnia Augustini diligenter legerat, ea de re dubitarit, ut ex Epistola ipsius apparet. Nec video, qua ratione solvi possit evidens Argumentum, quod in contrariam partem est: Quod Augustinus Sententiam suam autoritate Patrum omnium, qui usque ad ætatem ipsius scripserant, tueatur, & Pelagij, tanquam novam & recentem præsumptionem, damnet. At omnes ferè Augustino vetustiores Scriptores Electionem non tuentur aliã, quàm quæ præscientiã veræ fidei subnixa est. Ita enim disertè Prosper ait: *Panè omnium parem inveniri & unam Sententiam, quã Propositum & Prædestinationem Dei secundum præscientiam receperunt, ut ob hoc Deus alios vasa honoris, alios vasa contumeliæ fecerit, quia finem uniuscujusque præviderit, &, sub ipso gratiæ adjutorio, in quã futurus esset voluntate & actione præscierit.* Ita est. Ambrosius, quem nominatim pro se stare profitetur Augustinus, disertè ita loquitur lib. 5. de fide

Cap.

Cap. 3. *Non enim ante prædestinavit, quàm præsciret, & quæ sequuntur.* Et in Commentarijs ad 8. cap. ad Rom. quæ sub Ambrosij nomine leguntur, etsi certè non ejus ætatis sunt, legitur; *Istos, quos præscijt futuros sibi devotos, ipsos elegit ad promissa præmia capeßenda.* Item: *Ei misericordiam dabo ei, quem præscij, post errorem, recto corde reversurum ad me:* Cui adde, quòd Hieronymus ipso, acerrimus Pelagij oppugnator, expressè eandem sententiam tenuerit. Ita enim ad Gal. 1. loquitur: *Ex Dei præscientiâ evenit, ut, quem scit justum futurum, priùs diligat, quàm oriatur ex utero.* Imò, quod magis est, ad 1. caput Malach. ait, *Dilectio & odium Dei vel ex præscientiâ nascitur futurorum, vel ex operibus.* Et ad Rom. 8. Proposuit, solâ fide servare, quos præsciverat credituros. Imò, in ipso adversus Pelagianos conflictu lib. 3. *Eligit* (inquit, Deus) *quem bonum cernit.* Adde denique, quod ipse Augustinus. Quæst. 2. ad Simplicianum loquatur hoc pacto: *Nemo eligitur nisi jam distans ab illo, qui rejicitur: unde quod dictum est, quia elegit nos Deus ante mundi constitutionem, non video quomodo sit dictum, nisi de præscientiâ fidei & operum pietatis.* Mox de Iacobo: *Non electus est, ut fieret bonus, sed bonus factus eligi potuit.* Quicquid sit, de men-
te

te Augustini, de qua adhuc sub iudice lis est, illud certum est, Augustinum voluisse sententiam suam autoritate omnium Patrum antecedentium tueri: Vnde efficitur verisimiliter ac pænè ΑΠΟΔΕΙΚΤΙΚΟΟΣ, Augustini sententiam, qua contra Pelagium pugnavit, non fuisse aliam, quàm fuit antecedentium Patrum: Aut, si fuit alia ac diversa, falsi manifestum eum teneri, & dum Pelagium oppugnare voluit ex isto Capite Prædestinationis, uti Capellus vult, oppugnasse eum non Pelagium tantum, sed totam Antiquitatem, quod absurdum meritò videri debet. Hæc cum ita sint, fieri non potest, ut Capellus, ex hypotheseos suæ vi, Augustinum, Prosperum, aliósque, quos Pelagium optimè oppugnasse & gratiam regenerationis melius, quàm Canones omnes, contra Pelagium sancitos, definivisse vult, Pelagianos docendi causa faciat. Qui enim objectum Electionis statuerunt credentem sive crediturum; aut qui Electionem aliam non agnoverunt, quàm quæ ex præscientia fidei est, illi non satis tribuerunt Deo & gratiam divinam reipsa sustulerunt, quin & meritum reposuerunt: Ita enim disertis verbis colligit Capellus Thes. 21. Deinde: Qui, se liberum arbitrium homini salvum relinquere, protestati sunt, ij ni-

ij nimium tribuerunt homini: Utrumque fecerunt Augustinus, Prosper, alijque, ut ex præcedentibus liquet. Ergo reipsa fuerunt Pelagiani. Si hanc contumeliam Augustino alijsque Patribus facere non audebit Capellus, videat ergo, quo jure eam facere possit Arminio & ejus Scholæ, si eandem, quam illi, sententiam teneant.

Sed regeret fortasse hic Capellus, se non apertè nec præcisè ex illo capite Pelagianismi crimen arcessere. Hoc quanquam regerere nullo jure possit ei, qui Thesium Capelli filum & scopum videt; tamen esto. Videamus ergo ex quo capite crimen illud arcessat. *Satanæ, inquit, mens fuit, Pelagianismum, novo testorio incrustatum, instaurare; Gratiam Christi, subtiliore quidem, sed tanto probabiliore ratione, quàm olim, extenuare. Esto. Pelagius, cum dixit, hominem tam non peccare, quàm peccare posse, satis docebat, se nulum agnoscere Peccatum originis.* Ita est. Non necesse erat per consequentiam id impingere Pelagio, quod ipse apertè fatebatur. *Hæc si diceret, inquit, Arminius, nemini fidem faceret: Ut igitur fidem inveniret, probabilior fuit instituenda ratio.* Atqui Thesi præcedente dixerat Capellus, mens Arminij quænam fuerit, definire non est nostrum: At quid est mentem Arminij definire, si hoc non

non est? Ne imputet ipsi Deus audaciam & temeritatem tam enormem : Quod antea satanæ mentem esse dixerat, id hic nunc aperte mentem & scopum Arminij fuisse dicit. Sed ad rem.

Agnoscit igitur Arminius, saltem in speciem, Peccatum Originis. Ergo hætenus Pelagio dissimilis, qui aperte illud negabat. Sed ait, inquit, *Christi Satisfactione reconciliatum & sanatum fuisse genus humanum.* Bonam fidem tuam Capelle ! Nunquam dixit Arminius, Satisfactione Christi simul reconciliatum & sanatum fuisse totum genus humanum: accuratior erat, quàm ut ita loqueretur. Satisfactione Christi reconciliatum genus humanum dixit: At sanatum fuisse quis, nisi vecors, dicat? Ad sanandum alià re opus est, quàm satisfactione. Mirum quod id Capellus non consideraverit; qui pro electis satisfactum à Christo statuit, imò qui electos justificatos actu facit, quos tamen eo ipso actu sanctificatos, id est, à peccatis sanatos esse non vult. Sanationem autem ejusmodi à Capello intelligi patet, quia addit, *ut jam mortis æternæ reus peccati servus nemo sit, nisi novo facinore novam servitutem sibi contrahat.* Vult itaque Arminium credere, omnes homines per satisfactionem à servitute peccati non minus sanari, quàm à pænæ

pænæ reatu liberari. At nuspiam id docet Arminius: Tantum docet ijs, qui reconciliati sunt Deo per Christum, potentiam novam à Deo propter Christum dari, quando per Evangelium vocantur, ut à servitute illâ expedire se possint, si modò operam diligentem navent, & sibi ipsis divinæque gratiæ non desint. At qui hoc docet, ille contrarium docet ejus, quod eum docere vult Capellus: Docet enim eos, qui reconciliati sunt, esse ad huc sub servitute peccati, sed auxilio gratiæ, quod de novo ipsis à Deo datur, ab illâ servitute paulatim sanari posse. Aliud enim est potentiam alicui reddere, quâ ex servitute possit exire; Aliud, actu ex servitute exire, vel ab eâ liberari. Cum potentiâ stare potest servitus peccati, cum liberatione actuali non potest. Hæc res eò magis notanda est, quia Capellus, exemplum aliorum secutus, hac ratione impingit Arminio, quòd per Christi mortem credat omnes homines restitui in eundem statum, in quo Adamus fuit ante lapsum. Nullo jure aut fundamento. Quia Adamus ante lapsum non tantum præditus erat potentiâ obediendi Deo, sed etiam re ipsa liber erat, tam à servitute peccati, quàm à reatu mortis. At postquam Christus morte suâ, quantum in se est, reconciliavit genus

nus

nus humanum Deo, servitus peccati manet, & nova potentia Deo obediendi & in Christum credendi datur omnibus vocatis. Itaque à reatu mortis, per Adami peccatum contractæ, hætenus liberantur, quod Deus omnes & singulos actu servare à morte æterna velit, modò potentiâ istâ, quam ipsis ex gratia dat, rectè utantur, ut à servitute peccati, in quam sunt delapsi, exeant & iustitiæ operam dent. Et hoc ipsum est illud, quod Capellus, statim se explicans, licet parùm sibi ipsi consentaneè, subjungit, *Vires sufficientes præberi omnibus, & divinum auxilium omnibus præstò esse, quibus uti si velint, possint à peccati servitute liberari.* Verùm statim iterum, posse liberari à servitute peccati, confundit cum actu liberari à servitute, cum ait: *Ita perinde facit Arminius, ac si dicat, essemus quidem omnes iræ filij, peccati servi, nisi Christus venisset: sed mortis illius ea vis est, ut jam nemo nascatur iræ filius, peccati servus; atque ita tollitur revera peccatum Originis, quod verbis admissum erat. Hæc sunt RESERVATA.* Sed videamus vim Argumenti in forma.

Qui dicit, omnibus dari sufficientes vires & omnibus præstò esse divinum auxilium, quo uti, si velint, possint à peccati servitute liberari, is revera tollit peccatum Originis.

F

Armi-

Arminius dicit illud. Ergo, &c.

Majoris nulla est, ne quidem verisimilis, consequentia; imò Major se ipsam implicat. Non tantum enim non tollit peccatum Originis, qui dicit, sufficientes vires dari omnibus, ut, si velint, possint exire è peccati servitute, sed ne quidem ipsam peccati servitutem tollit: Eo ipso enim quòd vires omnibus dari dicit, ut possint exire ex servitute, si velint, nondum eos exiisse ex servitute, fatetur. Servitus autem peccati plus est, quàm peccatum Originis; quia, juxta ipsum Capellum, servitus peccati superadditur peccato Originis: In regenitis patet. Nam, servitute sublatà, manet tamen in ijs peccatum Originis. Ex quo etiam apparet, ineptum esse Capellum, quando servitutem peccati confundit cum peccato Originis. Huic adde, quòd si consequentia hæc vera foret, necessum esset affirmare, Patres omnes, etiam eos, qui Pelagio se acerrimè opposuerunt, re ipsa sustulisse peccatum Originis. Eorum enim hæc sunt: *Vult Deus omnes salvos fieri, sed si accedant ad eum: Non enim sic vult, ut nolentes serventur, sed vult illos servari, si & ipsi velint.* Ambrosius, Hieronymus: *Etiam his, qui mali sunt futuri, datur potestas conversionis & penitentiae.* Augustinus, *Omnes homines possunt,*

sunt, si velint, quia illud lumen illuminat omnem hominem venientem in hunc mundum. Synodus Arelat: *Anathema illi, qui dixerit, eum, qui perijt, non accepisse ut salvus esse possit.* Vide quæ ex Orosij Apologetico adversus Pelagium, ex Prospero, ex Authore de Vocatione gentium citat Clarissimus D. Grotius in Disquisitione suâ. Sed videamus, quomodo Majorem probet.

Qui dicit, omnes homines non amplius esse servos peccati, postquam Christus pro peccatis eorum satisfecit, is negat peccatum Originis.

Qui dicit, omnibus vires sufficientes dari, ut, si velint, possint à peccati servitute liberari, is dicit, omnes non amplius esse servos peccati. Ergo.

Hic jam utraq; Propositio falsa est. Major, quia servitus peccati & peccatum Originis sunt duo valdè diversa, uti diximus, & ipse Capellus, velit nolit, fateri cogitur; quia statuit, regenitos non amplius esse servos peccati, & tamen peccatum Originis in ijs manere. Minor, quia aliud est, posse exire ex servitute, aliud exiisse. Collatio aque potentia ad exeundum ex servitute non statim tollit ipsam servitutem. Fieri potest, ut quis, servus existens, servus manere velit, etiam cum liber fieri potest; uti

de servis legitur Exod. 21. 5. 6. Servitus peccati est habitus peccandi: At habitus manere potest cum potentia aliter agendi, imò cum potentiâ ad contrarium habitum. Patet id in eo, qui servus est justitiæ. In eo enim manet potentia peccandi, id est, à justitiâ deficiendi, vel ipso Capello iudice, qui, ut ut fideles & regenitos nunquam excidere fide & justitiâ velit, posse tamen excidere concedit. Ut jam non dicam, Apostolum Paulum in Capite 7. ad Romanos, ex interpretatione Capelli & eorum, qui ipsi *homodoxoi* sunt (quæ tamen interpretatio falsa, imò valdè periculosa est) disertè affirmare, se, quum jam regenitus esset, servum tamen adhuc & venundatum sub peccato esse.

Dicet fortasse Capellus, servitutem peccati includere omnimodam aliter agendi impotentiam, sive potentiæ ad bonum ablationem. Esto. Dabo hoc etiam Capello, etiamsi nec ratio servitutis, ut id fiat, per se postulet, nec Scripturæ phrasis id irrefragabiliter evincat, nec Synodus ulla id definiat: Esto, inquam, id ita se habeat: Nihil aliud tamè ad summum sequetur, quàm servitutem peccati hætenus propter sanguinem Christi tolli, quòd potentia exeundi ex servitute peccati restituatur omnibus, quando

quando eos Deus vocat. Quòd si propter hanc causam Capellus velit rectè Arminio impingi posse; quod peccatum Originis re ipsa sustulerit, jam concedat necesse est, rectius & majori jure impingi ipsi posse, quod peccatum Originis in regenitis locum amplius habere neget, quando dicit, regenitis, per Spiritum Christi, non tantum dari potentiam exeundi ex servitute peccati, sed ijs etiam ipsam servitutem & dominium peccati eximi. At cum ipse post collatam benè agendi potentiam & sublatam peccati servitutem, nihilominus tamen totam atque integram peccati Originalis essentiam in Regenitis manere velit, quo jure eam tolli dicit ab eo, qui non nisi potentiam exeundi ex servitute peccati restitui & servitutē nihilominus manere dicit?

Simile est Argumentū, quod subjungit:
Qui Gratiam Christi universalem facit, ille re ipsa extenuat gratiam;

Qui dicit, Christi satisfactione reconciliatum & sanatum genus humanum, is facit Christi Gratiam universalem.

Majoris nulla est vel probabilis consequentia, nisi fortè ei, qui morbo invidiæ laborat: Pone enim casum, quod, per impossibile, Deus omnes homines, unico aut altero excepto, elegisset, & omnes ita sal-

vari vellet, uti paucos eum servare velle docet Capellus : Quid? An beneficium Gratiæ eo ipso extenuari diceret? Quis iste foret stupor? Contrarium potius est verum: Quanto universalior foret Gratia, tanto magis extenderetur & augetur ejus beneficium : & tum demum palpabiliter extenuatur Gratia, quando ea, quæ omnibus communis est, paucis peculiaris esse dicitur. Et certè si hæc Major Capelli vera esset, quodd beneficij Gratia extenuatur, cum, quod paucis est peculiare, omnibus sit commune, tum sequeretur, Gratiam, quantò paucioribus peculiaris foret, tantò excellentiorem esse, & excellentissimā fortè, si uni soli propria ac peculiaris esset. Si enim paucitas recipientium commendat Gratiam, quantò pauciores electi, tantò excellentior Gratia. Quid ipsa Invidia diceret aliud? Apagesis tam horrenda & barbara.

At (inquit Capellus) sic Gratia confunditur cum naturâ, ut & à Pelagio confundebatur. Ineptè. Non confunditur Gratia cum natura, quia superadditur naturæ. Et cur, quæso, quando Gratia omnibus hominibus qui ejusdem naturæ sunt, confertur, magis cum naturâ confunditur, quàm quando eadem illa paucis hominibus confertur? An
Gratiæ

Gratiæ indoles à subjecto , imò à subjectorum quantitate aut numero pendet? An Gratia idcirco fit natura , quia omnibus communis fit , uti natura omnibus communis est? Syllogismus in secundâ figurâ ex puris affirmantibus non valet. Natura est communis omnibus, Gratia est communis omnibus. Ergo Gratia est Natura.

Neque verò hac ratione confundebatur Gratia cum Naturâ à Pelagio. Dicebat Pelagius , hominem per se , ex vi potentiae per creationem inditæ , sufficere ad præstandum legem Dei, quando ea ipsi revelatur : Novo Gratiæ beneficio illi opus esse negabat , & imprimis internâ in voluntate , quâ idonea reddatur ad parendum divinæ legi. At hoc longè aliud est : Qui enim universalem gratiam statuunt , ij gratiam illam novam esse dicunt , & Gratiam Christi vocant , per quam homo ineptus naturâ suâ , de novo aptus & idoneus fit ad credendum & Deo obediendum.

Pergit Capellus grassari in famam Arminij , ut *Pelagianum* eum quovis modo faciat, & , quod pessimum omnium est, *versipellem*.

Prædestinationē quod attinet, eo liberius à nostris discessit, quia videbat eos inter se nō consentire in ejus objecto definiendo.

Et meritò. Nec enim dissensio ista levis est ; utpote ex quâ dependent duæ Quæstiones magni momenti, An scilicet Deus sit Author peccati, ex una parte ; & , An Deus non sit insipiens ; ex altera. Prius necessariò consequi ex sententiâ eorum, qui objectum absolutæ Prædestinationis faciunt hominem, sive increatum, sive integrum, fatetur & multis rationibus confirmat Collega Capelli Molinæus in suâ Anatome Arminianismi. cap, x i i i. Posterius consequi ex sententiâ eorum, qui Absolutæ Electionis objectum faciunt hominem lapsum, asserunt & multis operose probant Calvinus, Beza, Zanchius, Gomarus, alijque. Et ita revera se res habet, uti statim apparebit. Dissimulat hujus dissensionis momentum Capellus, & qui in Arminio Pelagiano reddendo levissima quæque montium instar exaggerat, Dissensionem hanc, tanquam festuculam, præterit. Tantum valet, quo quis affectu in judicando ducatur,

Sed in eo, inquit, consentiebant omnes: Electionem nullius boni, quod in nobis sit, futurumve sit, prævisione nisi, sed esse fontem omnium donorum, quæ nos reddunt meliores ijs, quos Deus non elegit ut eo liquidius constet, nullo nostro merito, sed ex merâ Dei gratiâ nos eligi.

Mirum

Mirū ut sibi placeat Capellus in hoc Com-
 mento. Ego operam dabo , ut pio cuique
 hoc displiceat. Primū hoc argumento:
 Si in eo consentiebant omnes, Electionem
 nullius boni , quod in nobis sit, futurumve
 sit, contemplatione prævisione niti , ut-
 que necessum est , ut consenserint in eo,
 Deum ex vi decreti istius efficaciter volu-
 isse, ut Adam peccaret , & in eo totum ge-
 nus humanum. Nam si hoc Deum non vo-
 luisse statuunt, necessum est ut dicant, Ele-
 ctionem , cujus Objectum statuitur homo
 siue increatus siue creatus & integer ad-
 huc, frustra aut insipienter factam fuisse, eo
 quod fieri poterat , ut , post factam istam
 Electionem , Adamus non peccaret , quia
 libero arbitrio præditus erat , & sic primæ
 isti Electioni & gratiæ, locus non esset. Si
 enim Adamus, Ex: gr: non peccasset , uti-
 que electus fuisset ex contemplatione boni
 alicujus , quod in ipso erat ; puta ex con-
 templatione boni usus liberi arbitrij. At
 Electio ista planè fuisset contraria electio-
 ni gratiosæ, imò juxta Capellum, Pelagian-
 nismum merum in se habuisset ; quia sub-
 nixa fuisset contemplatione, non fidei, sed
 operum legalium, viribus solis naturæ præ-
 stitorum . Opera autem legis excludunt
 gratiam. *Si enim ex operibus , jam non ex gra-*

tiā: alioquin opus non esset opus. Rom. 11. 6.

Si dicant, Deus pro infinitā suā sapientiā noverat Adamum lapsurum, nihil dicent. Nam scientia ista divina vel præcessit, juxta eos, decretum Electionis, vel secuta est illud, si non ordine temporis, saltem ordine naturæ, secundum nostrū concipiendi modum. Atqui non præcessit decretum Electionis, quia alioquin scientia divina præcederet Dei ordinationem; cum Calvinus alijque asserant, impossibile id esse, velintque Deum præscire futura, quia ante, ut ea fierent, ordinārit, non contra. Deinde posito etiam, quod scientia hæc præcessisset Electionis decretum; tamen nihilominus dicendum foret, objectum Electionis istius divinæ, quatenus per scientiam divinam in mente Dei repræsentabatur, non fuisse hominē increatum aut integrum, sed lapsum; quia sine peccati contemplatione aut prævisione Electio talis gratiosa, qualem Cappelus vult, fieri non poterat. Si scientia Dei secuta est decretum Electionis, jam clarè apparet, decretum à Deo factum fuisse de eligendo certo objecto, antequam sciret, an objectum ullum certum eligibile habiturus esset. Unde efficitur, necessum esse, ut Authores isti dicant, Deum aut insipienter decretum tale fecisse, aut si sapienter,

pienter, vel potiùs prudenter illud factum velint, Deum itaque ordinasse & voluisse post decretum illud, ut Adamus peccaret, & in eo totum genus humanum, ut decretum factum executioni mandari posset. Atqui hoc est facere Deum non tantum injustum, sed & verè, & propriè, & solum authorè peccati Adami, omniumque, quæ ex isto peccato fluunt, peccatorum & miseriarum. Nec refert, quocunque demum modo Deum authorem faciant, sive per decretum permissivum, ut Piscator loquitur, quo posito, necessariò, non dico necessitate consequentiæ, sed consequentis, ponitur lapsus; sive per decretum effectivum, quo posito efficitur lapsus: Utrumque enim redit eodem. Tam enim author est, qui innocenti necessaria ad evitandum peccatum non dat, aut, quæ dedit, iterum ei subtrahit, quàm is, qui eundem ad peccandum impellit; ita ut non possit non peccare, quocunque demum modo impulsio ista fiat. Deinde, si consentiebant in eo omnes, quòd Electio ista est fons omnium donorum, quæ nos reddunt meliores ijs, quos Deus non elegit; quomodo itaq; consentiebant cum ijs, qui Electionis illius Objectum constituiebant hominem increatum, aut creatum, sed adhuc integrum sive innocentem? Nā si in illo Electio locum habuisset,

habuisset, quomodo non vi istius Electio-
 nis factum fuisset, ut is in peccatum tam
 enorme non incideret, propter quod totum
 genus humanum damnatum fuit ad mortem
 æternam, & propter quod delendum Deus
 unigenitū suum mori voluit? Si in eo con-
 sentiebant, quòd fons donorum omnium
 esset Electio, quomodo non fuit in Adamo
 fons perseverantiæ in innocentia & inte-
 gritate? Necessum utique est, ut in alteru-
 trum horum duorum consenserint: Aut
 quòd peccatum illud Adami adèd enorme
 non fuerit, quin consistere potuerit cum
 Electione jam ante facta: Aut contra, quod
 tam enorme fuerit, ut consistere non po-
 tuerit. Eligant utrum velint. Si consen-
 tiant consistere potuisse cum Electione; tum
 velim, ut pius quisque & Dei timens consi-
 deret, quanti ejusmodi mortales faciant
 non tantum hoc peccatum, per quod Scri-
 ptura mortem æternam in omnes homines
 derivatam dicit Rom. 5. & ex quo uno
 omnia peccata & misérias profluxisse vo-
 lunt; sed etiam quanti faciant comminatio-
 nem divinam, quā mortem Adamo, si pec-
 catum istud committeret, minabatur. Quæ
 enim vis comminationis istius esse poterat,
 si, quando peccatum illud fieret, Electio
 illa prima nihilominus immota stabat? Fieri
 non

non poterat ut Deus comminationem hanc ullo tempore executioni mandaret. Deinde, quod potissimum est, consideret, quanti faciant ipsam Iesu Christi mortem & Satisfactionem. Si enim manebat Adam, & quotquot erant electi, in gratiâ Electionis, non obstante isto peccato, quid opus erat Christum pro eo ipsiusque posteris mori, eos reconciliare Deo, vel Deum ijs reconciliare? Qui non exciderant gratiâ, restitui opus non habebant, imprimis tam pretioso sanguine. Dicere, quòd peccati illius meritum manebat, nihil est dicere. Meritum enim facere poterat, ut Deus punire Adamum jure posset, si vellet, sed non poterat facere, ut Deus eum actu punire vellet; Imò, quia eum Deus jam ante elegerat, meritum hoc facere non poterat, ut Deus eum punire vellet, nisi Deum mutabilem facias. Si vero consentiant, peccatum Adami tam fuisse enorme, ut cum Electione divina consistere non potuerit, jam primò consentiant necesse est, Electionem non esse fontem omnium donorum, quæ nos meliores reddunt ijs, quos non elegit. Deinde consentiant necesse est, Deum mutabilem esse, & desinere potuisse eligere, imò odio habere & reprobare potuisse, quem elegerat. Id si locum hîc habere potuisse

tuisse consentiant, cur molestiam facessunt
ijs, qui id nunc etiam fieri potuisse cre-
dunt? Si enim Electio per se non facit, ut
quis semper in gratiâ maneat, non magis
nunc quàm tunc ex illâ concludi potest
perseverantiæ in gratiâ infallibilitas aut ne-
cessitas.

Tertiò, posito quòd id verum esset, con-
sensisse eos in ista de Electione sententiâ,
an id satis est Capello? Ita videtur; & hoc
notari semel volo: est enim res magni mo-
menti, & arcanum malæ fidei Capelli. In
universa hac Disputatione suâ id unum to-
tis viribus agit, ut, quando de Prædestina-
tione loquitur, ita loquatur, tanquam si
Arminius dissensionem quæсивisset in solo
Capite de Electione, & in id enixus fuisset,
ut consensum, qui in eo Capite erat,
turbaret. Non equidem rectè & piè, sed
nec bonâ fide: Neque enim de eo sollicitus
erat Arminius, an Objectum Electionis non
posset statui homo creatus & integer. Etsi
enim credebatur Scripturam non statuere ali-
ud Objectum, quam fidelem, ac proinde
jam lapsum, tamen non propterea contende-
bat, fieri non potuisse, ut Objectum
ejus esset homo integer. Aliud enim est,
an sit objectum, aliud an non possit esse
objectum. Et quis de eo magnopere la-
boret,

boret, An Deus homines lapsuros an jam lapsos servare velit? Sive Deus hos, sive istos eligeret, nulli faceret injuriam: Imò faceret ijs, quos eligeret, ingens beneficium: Sed ideo Electionem istam præcisam impugnabat, quòd Electio illa conjungatur cum tali reprobatione, & reproborum vocatione, cum qua impossibile est, ut salvetur Dei tum justitia, tum sinceritas. Itaque non satis erat Arminio, quod consentirent in uno Prædestinationis membro, consensus requirebatur etiam in opposito membro, & quidem magis in hoc, quàm in illo. Neque enim periculum ullum, nedum tam ingens, erat in eo, quòd Arminius dicebat, Deum omnes velle salvare sub conditione, ipsis per gratiã possibili, quàm est in altero membro, Deum velle perdere atque æternis cruciatibus addicere, non dico hominem innocentem, sed multo maximam generis humani partem, antequam peccavit aut puniri meruit. Hic enim manifesta est injustitia, tyrannide quavis, imò omnium, qui unquam fuerunt aut erunt, tyrannorum simul junctorum immanitate tantò deterior, quantò æterni cruciatus temporalibus sunt graviores. Dicit hic fortasse Capellus, sententiam istam damnatam esse à Synodo Dordracenâ: Dato, sed non

non concesso, id verum esse, dicat vicissim Capellus, quid in causa fuerit, quod eam non damnarit Synodus utraque Gallica, Aleziana scilicet & Charentonensis? Repperunt illæ quidem Canones Dordracenos, sed quas Canonibus suis Synodus Dordracena subjunxit damnationes, silentio præterierunt. *Myſterium hîc eſt*: Sci-
mus, quantum Gallia debeat aut debere velit Calvino, Bezae, alijsque, quos primam istam sententiam tenuisse Capellus fatetur Disputatione sua secunda; Nec dubium est, quin plures adeoque ipse Capellus sententiam istam teneant, qui, ne Calvinum, imò se ipsos damnarent, Dordracenas damnationes, uti quidem prima fronte damnationes esse videntur, præterire maluerunt. Sed nec opus erat, ut id facerent. Neque enim Synodus Dordracena sententiam istam verè damnavit, sed damnare tantum videri voluit, ut populo & scenæ serviret. Damnavit tantummodo eos, qui asserunt, Ecclesiam Reformatam docere, Deum etiam innocentes fidelium infantes, ab uberibus matrum raptos, in æternum ignem tyrannicè præcipitare. At ex sententiâ Synodi nulli infantes sunt innoxij, & cum Deus infantes fidelium præcipitat in æternum ignem, in eo non tyrannicè eum agere dicunt,

cunt, sed jure dominij. En fraudem. Sed posito etiam, quòd utraqùe, tam Dordracena quàm Gallica Synodus, istam Sententiam rejecisset, quod tamen nec fecit, nec facere unquam audebit; pax tamen & concordia rata manere potest, ex Sententiâ Capelli, cum istis, qui primam istam Sententiam tenent, si modò in Capite Electionis, ut ait, consensus maneat. Hac itaque sola lege pax coletur cum istis tam immanium paradoxorum defensoribus. Sed posito etiam, quòd Ecclesia Reformata non ascendat supra lapsum, sed hominem lapsum faciat Objectum Prædestinationis; nõ minus tamen periculum est, quando eadem statuit, Deum velle ex humano genere lapsos paucos quosdam nominatim & peremptorie eligere ad gloriam, antequam per Christum reconciliati sunt Deo. Id enim cum manifestâ Satisfactionis Iesu Christi injuriâ conjunctum est: uti nec minus periculum est in eo, quòd Deus eosdem electos ita vocare velit, ut non possint non credere, etiam quando Deus eis mandat ut credant & obediant: hoc enim sapientiæ divinæ derogat. Præcipuum verò periculum est in eo, quòd Deus ex maximâ generis humani parte, quam propter unicum primi parentis ipsorum peccatum in æternam dam-

G

mnatio-

mnationē & peccati servitutem voluit incidere, multos imò plurimos vocare dicatur ad credendum & obediendum Euangelio, quos tamen reprobavit, ac proinde quos, juxta primam suam intentionem, nec credere nec obedire nec salvari vult: Et hîc maximè calceus urgebat Arminium, hodieque adhuc Scholam ejus urget. Hîc laborandum erat, ut consensus rationalis reperiretur. Hac enim repertâ facilè reperitur consensus in materiâ Electionis. Salvare potest Deus quos vult, & prout vult: At ut æternis ignibus addicat, qui id non meruerunt, aut ut ijs, qui id meruerunt, benevolentia specie illudat, non permittunt ipsius tum justitia, tum sapientia, tum bonitas. Atque hæc quidem talia sunt, ut directè contrarium concludere non dubitem, quàm Capellus fecit: idcirco scilicet Arminium habuisse justissimam causam dissentendi à Calvinistis, quòd, etiamsi convenirent in definitione Electionis, in Reprobatione tamen definiendâ tam atrociam, tam horrendam, statuerent, quæ divinæ gloriæ, Christianæ Religioni, denique rectæ rationi è diametro adversantur, ut consensui locus non esset.

At, inquit Capellus, Electionis hujus definitio propterea magni facienda est, & in eâ
con-

consensus requiritur, ut eo liquidius constet, nullo nostro merito, sed ex merâ Dei gratiâ nos eligi. Quasi vero periculum sit, ut non satis liqueat merito nostro nihil omninò tribui, quando objectum Electionis statuitur homo peccator, pura puta misericordia causa ejus impulsiva. Gratia præveniens, gratia concomitans, gratia subsequens, causæ principales efficientes ejus, quæ in peccatore gignitur, fidei & obedientiæ; utriusq; præmium vita æterna. Quis enim hoc propriè mereatur? Denique quando meritum disertè & in terminis rejicitur ab illo, quo metuitur ut meritum statuatur, & rejicitur ob easdem causas, quas ad meritum constituendum requirunt ij, qui metuunt ut meritum reponatur.

At, inquit Capellus, Arminius respuit idem meriti vocabulum, sed tamen rem ipsam ponit, dum vult objectum Electionis esse Crementem. Ut vis Argumenti intelligatur, edigam in formam:

Qui Objectum Electionis facit hominem Crementem sive crediturum, ille re ipsa reponit meritum; etsi illud in speciem rejiciat:

Arminius illud facit, Ergo.

Majorem hanc vel pueri negarent & exilarent: Sed ne id dici tantum credat Capellus, en duo Argumenta, ex quibus

illud patet: 1. Si vera est Major, jam fateatur necesse est, velit nolit, Capellus, se meritum reipsa agnoscere, ut ut in speciem illud rejicere videri velit: statuit enim Iustificationis Objectum esse hominem Credentem. At cum Iustificatio non minus sit gratiosa, quàm Electio, juxta Capellum, quo modo, si, cum objectum Electionis statuitur homo fidelis, meritum reipsa reponi colligitur, non item reponi dicetur meritum, cum Iustificationis Objectum idem esse statuitur? Utrouque enim par & eadem ratio est. Certè, si animum vel paululum advertisset Capellus, vidisset eadem se consequentià gravari posse: Imò, quod magis est, sensisset Majorem se ipsam destruere. Eo ipso enim, quod homo credens Objectum Electionis statuitur, fieri non potest, ut meritum reponatur, etiam si quis reponere illud cupiat, nedum ut reipsa reponatur, etiam cum quis ex professo id rejicit & reponere non vult: *Idcirco enim est per fidem, ut sit per gratiam*, ait Apostolus Rom. 4. Et quis non videt implicare contradictionem, si quis dicat, Conditionem fidei, quâ quis credit, se ex misericordiâ æternam remissionem peccatorum consecuturum, si Deo obediat, talem esse, ut reponere necesse habeat meritum, qui conditionem

tionem illam prærequirit ? Contrarium per se patet ; Per eam videlicet tolli non tantum meritum , sed omnem meriti suspicionem. 2. Si vera est Major ; Iam omnes Patres , qui ante Augustinum floruerunt 400. annis, meriti defensores fuisse statuitur necesse est, quia , ut ex Prospero apparet, Omnes ferè ij Electionem ex fide prævisâ adseruerunt, id est, objectum Electionis docuerunt esse hominem Credentem. Quin imò ipse Augustinus, Prosper , alijque, quos gratiæ defensores optimos fuisse vult Capellus , meritum reipsâ tenuisse & Pelagio secretò favisse dicantur necesse est ; utpote qui per omnia Patribus antiquis consentire se professi semper sunt : & id ipsum etiam tam multis locis testatum fecerunt , ut solis radio scriptum videri possit. Et hinc patet, quàm ineptè Thes. sequente 22. ab ijs , qui Electionem factam volunt ex fide prævisâ, multos sinus Pelagianismo restitui dicat, quasi videlicet aut si nus habeat Pelagianismus , aut si quos habeat, Patres isti , quibus cum ipso Pelagio es erat, eos non viderint vel detexerint ; ut jam Capello, veluti novo aliquo Simoneopus sit, qui sinus ejus , veluti equi alicuius Trojani, claustra pandat. Illaudabilis est industria eorum, qui nodos in scirpo, &

sinus in plano quærunt: fieri vix potest, quin aut sinubus gaudeant, quibus arcana sententiarum suarum occulunt, aut morbo animi laborent, ut videant ea, quæ nuspiam sunt. Hujusmodi esse industriam Capelli, cum multos sinus Pelagianismo restitui dicit, si Electio ex fide prævisâ dicatur facta, jam clarum fecimus.

Similis industria elucet in eo, quod subiungit. *Quum volunt hominem ita liberum esse, ut quantamlibet Spiritus regenerantis efficaciam possit irritam reddere, ij Pelagianismo novas parant latebras, quæ nondum fuerant à veteribus deprehensæ vel à paucis certè:*

Nam Capellus latebras has ipse sibi fingit: nuspiam eas reperiet apud Arminium aut Arminij fautores. Crudior ista est oratio, quam ut in hominem sanum cadat. Quis enim, nisi aut stupidus aut profanus tantum libertati humanæ tribuat, ut à Deo ipso flecti non possit in omnem partem, si modo Deus eâ potentiâ uti velit, quæ pollet, vel eâ sapientiâ, quæ ad flectendum vel saxum cor sufficit? Injurius esset Deo, qui intra has angustias compingeret ejus efficaciam, aut sapientiam. Rectè dicit sapiens, *Cor Regis est in manu Dei &c, veluti rivus aquarum, ducit illud, quo vult.* Eadem cæterorum ratio est. Unus Bilca-

Bileamus testis esse potest, cujus tamen non maledica voluntas, sed maledicentia à Deo fuit inhibita; Ita ut ipse dicat, *Quomodo possum maledicere, quibus Dominus benedicit?* Diceret fortasse Capellus, se non loqui nisi de efficaciam spiritus regenerantis, quam Deus ordinariè uti vult in conversione hominum. At hoc longè aliud est. Accurrati Disputatoris est pressè inhærere verbis adversarij, & nihil dicere, quod ille nō totidem verbis dixit, aut non libenter à se dictum velit, nisi fortè per consequentiā aliquid ei impingat; quanquam tum eum nō dicere consequens, sed dicere id debere asserat. Sed esto; sit hæc mens verborum Capellij. An dicere hominē ita liberū esse, ut istam efficaciam, qua Deus ordinariè in conversione hominū uti vult, possit irritam reddere, nova latebra est Pelagianismi? Nunquam Pelagio eā de re lis est mora, nec ut istam latebram quæreretur opus habebat Pelagius. At non fuerat ea adhuc deprehensa à veteribus. Nec mirum, quia quotquot fuerunt veteres, ij de veritate ejusce rei non dubitârunt; tantum abest ut Pelagij arcanum fuerit. Liberum enim arbitrium tam apertè asseruerunt, ut nihil supra: liberi vero arbitrij proprium esse dixerunt, quod vocationi divinæ possit consentire aut dissentire. Unde illud in libro de

Vocatione Gentium : *sicut qui crediderunt juvantur, ut in fide maneant; ita qui nondum crediderunt, juvantur ut credant : Et quemadmodum illi in SUA POTESTATE habent, ut exeant; ita & isti in SUA habent POTESTATE ne veniant.* Notiora hæc sunt, quàm ut probare oporteat. Sed videamus, quur hanc opinionem latebram Pelagianismi vocet Capellus. *Tribuunt, inquit, nimium libertati hominis.* Quid Capelle ? An Pelagianum etiam est, quod homo sua sponte malefacere, peccare, & Deo inobediens esse possit ? Quid ? An Patres etiã in Pelagio hoc damnarunt ? Quis credat hæc Capellum vigilantem dicere, scribere, imò disputanda proponere ? Misera juvenus, cui tales Magistri obtingunt. Antea tanquam Pelagianum damnavit Capellus, homini vel minimum quippiam tribuere ad sui conversionem faciens : Nunc etiam tanquam Pelagianum damnat, tribuere ei vel minimum quippiam sui conversionem impediens. Ita Pelagianum jam est affirmare, inesse homini potentiam consentiendi divinis jussibus, aut potentiam dissentiendi. Quis hæc non videt impietatis ipsius latebras esse, & cum propter ista damnatur Pelagius, pijs occasionem dari cogitandi, An Pelagius jure damnatus sit ?

Sed & multum derogant Divinæ potentiae, utpote

utpote cujus multos conatus, magnosque nifus volunt ab homine semper superari posse, & reapse quotidie superari. Inepta hæc sunt. 1. Quia potentia divina derogari nihil potest, ubi divina potentia non adhibetur. Supponit Capellus Deum in Conversione hominis ordinariâ uti potentiâ, quæ semper & vi sua effectum sortitur. Id negant ij, contra quos disputat, & quidem hoc argumento: Vbi potentia adhibetur, quæ semper & vi sua producit effectum, ibi locus non est præcepto, nec promissioni, nec comminationi, ac proinde nec obedientiæ, nec inobedientiæ, nec præmio, nec pænâ. Qui præcipit aliquid, is id, quod præcipit, vult fieri ab illo, cui præcipit: At qui id ipse facit, is non vult id fieri ab alio: Alioquin vellet id ab alio fieri, & simul nollet. Vbi autem præceptioni locus non est, ibi nec est locus obedientiæ, nec inobedientiæ; per consequens, nec promissioni, nec comminationi, atque ita nec præmio, nec pænâ. Iam autem cum dicit Arminius, ab homine superari posse Dei conatus multos nifusque magnos, non vult, potentia divina opponi ab homine posse majorem potentiam, quis enim id nisi atheus dicat? Sed tantum vult divinis afflatibus, divina præceptioni, divinis adhortationibus, divinis supplicationibus,

divinis protestationibus, divinis castigationibus, inspirationibus (quæ certè conatus multi & nîsus magni sunt) opponi posse ab homine inobedientiam & contumaciam: Ita ut homo , cum Deus vult & jubet ut obediat, possit nolle obedire, & sic se reum pænæ facere. Quâ in re potentia nulla proprie dicta sita est , quæ divinæ potentiæ vel tantillum derogat. Inobedientia enim est nuda tantum volitio aut nolitio libera, quâ homo metaphoricè superare Deum dicitur , quia divinæ volitioni opponit contrariam volitionem, atque ita se subtrahit Dei obsequio. Metaphoricè, inquam. 1. quia nolle non est posse, 2. quia ne velle quidem posset homo, nisi id ipsi Deus liberum relinqueret. 3, ut ut nolendo homo se eximat Dei obsequio , non tamen eximit se pænæ , quam Deus propter inobedientiam istam per potentiam aliquando ipsi infligere vult. Ita infans trium annorum potest multos conatus magnosque nîsus patris sui superare nolendo illi morè gerere, & Pygmæus Gigantem potest debellare solâ nolitione & subjectionis recusatione ; uti & subditus ac vasallus quilibet Regem Principemque suum superare potest solo animo rebellandi ; ita ut quicquid moliatur, conetur, nitatur Princeps , frustra omnino sit,

sit, animum ipsius quod attinet. An quis
 propterea Patris, Gigantis, Regis po-
 tentiæ derogari aliquid dicet? Nihil mi-
 nus. Animus non subest potentiæ, sed
 soli rationi. Mutet itaque tantum Capel-
 lus metaphoricam istam locutionem in
 propriam, & videbit fallaciam. OY GAR,
 uti ipse rectè citat ex Aristotelle, ESTI DI-
 ALEKTÉON TAIS METAPHORAIS. Quid
 ergo, inquiet fortè Capellus? An Deum
 aliâ potentiâ uti non vis in conversione
 hominis, quàm quâ Pater aut Princeps in
 regimine subditorum utitur? ea tota est
 moralis. Respondeo: Equidem, post-
 quam Deus homini potentiam novam de-
 dit ad obediendum, aliâ, quoad speci-
 em, ordinariè non utitur, quàm mora-
 li, id est, non aliâ, quàm cui homo con-
 sentire & dissentire potest, qualiscunque
 tandem ea esse possit. Id quod inde clarè
 evincitur; quia Deus ordinariè non regene-
 rat hominem, nisi per verbum; juxta id, quod
 dicitur à Paulo Rom. 10. ex ipsius Capelli
 interpretatione, *fides ex auditu est, auditus
 autem per verbum Dei*. Ubi autem instrumen-
 tum est verbum, ibi actio tota est moralis.
 Verbum enim nil nisi rationes, suasiones,
 hortationes, & similia argumenta, mora-
 liter moventia, in se habet: imò ibi alia
 nulla

nulla potentia potest habere locum, nisi verbi naturam inutilem, & planè ridiculam velis facere. Quid enim facit suasio, ubi id, quod suadetur, per vim efficitur? Dicis certè causâ suasio fiat necesse est: At sic verbum desinit instrumentum esse, ex quo audito fides gignitur, & *semen*, per quod regeneramur; Cum tamen istis titulis Verbum Dei ornet ipse spiritus Dei. 1. Pet. 1. 23.

Eadē vis est rationis, quæ subjungitur: *faciunt Deum multos sibi fines proponentem, & ad eos multis molitionibus adspirantem, quos tamen adsequatur nunquam*. Neque enim hoc injurium est divinæ potentiæ: Ex eo enim, quod finis Dei primarius ac principalis sit, ut hominem ad obedientiam adducat, manifestū est, Deum potentiā nullā propriè dictā velle uti ad finem istum obtinendum. Cū enim obedientia prorsus libera esse debeat, necessum est ut is, qui aliquem ad obedientiam adducere vult, ita agat ut possit non adsequi finem suum: quod ita certum est, ut si aliter agat, id est, si potentiā utatur, quā voluntatē hominis necessitat aut determinat ad unum, finē suum non adsequatur, nec adsequi unquam possit: obedire enim propriè dici non potest, qui non potest nō obedire, aut qui nō potest non facere, quod facit, vel non potest non pati, quod patitur. Deinde
divinæ

divinæ potentia multum quidem detraheretur, si diceretur Deus fines aliquos absolute sibi proponere, quos adsequi cupit, & nō potest. At cū Deus fines aliquos sibi proponit, quos non intendit absolute adsequi, sed tantū sub conditione, si nimirum homo non opponat contumaciam, quam ipsius potestati liberam facit, nihil derogatur potentia divinæ, quando homo potestate illā concessā aut non uti, aut abuti vult, id est, quando Deo obedire recusat. Etsi enim Deus non adsequatur finem istum, quem intendit, id tamen propterea non fit, quod non possit eum adsequi, si vellet sapientiā omni suā possibili uti; sed quia uti non vult aliā, quā eā, cui homo reluctari pōtest, si velit, & quidem suo magno damno. Neque tamen non adsequitur finem intentioni suæ convenientem, quia eum, qui obedire ipsi non vult, vel invitum pœna ista adficit, quam ipsi comminatus est, si non obediat. Et hac quidem ratione, ait Augustinus, *facit Deus voluntatem suam de eo, à quo voluntas ejus facta non est.*

Atque ex his pauculis liquet, sententiam Arminij nec esse nec cenferi posse Pelagianam, ne quidem *docendi causā*. Quòd autem Capellus Thes. 24. subjicit, *eos, qui vel maxime favent Arminij sententia, maxime nolle eam*

eam Arminianam dici, eo quòd ante natum Arminium multi senserunt idem atque doxerunt in Belgio, in eo vehementer fallitur. Arminianā eam dici debere negant, tanquam si ea ab Arminio primum inventa, aut mota esset in Belgio, uti quidam imperitæ plebi persuadere in dies conabantur: Alioquin non sunt tam scrupulosi Arminiani, ut de Titulis aut Epithetis laborent. Nomenclatura per se non officit veritati: sciunt unde ea proficisci soleat, & apud quos pondus habeat. Optarent quidem, ut Christiani ab istis in totum abstinerent, ex præscripto Apostoli; non quidem sua causa, sed veritatis, cujus patronus & author solus Deus dici meretur, & cui ista ratione pessulum atque obicem nõ exiguum obdident, quo minùs in conscientias infirmorum hominum penetret. Nõrunt illas esse artes satanæ, & mirari satis non possunt, istas ijs probari, qui, cum per omnia Calvinii placita sequantur, & ipsius pænè verbis Sacramentum dixerint, Calvinianos tamen se appellari ægrè ferunt; Sed quia vident, morem hunc jam pridem inolevisse & radicitùs tolli nõ posse, quin & eos, quos id minimè omnium decet, cum sequi velle, cùm id ita ex usu ipsorum esse videatur, non magnopere laborant. Solantur sese exemplo plurium, neque se propterea Deo minùs

minùs caros esse, sunt persuasissimi. Non ponderat ille nomina, sed res. Quare expleat animum suum, qui volet, & Arminianos eos, aut Castalionæos, aut Melancthonianos vocet, ex animi sui sententia; videat tantum, ne, dum id facit, non tam odio sententiæ id facere intelligatur, quàm quòd tē ita se habere credat. Capellū quod attinet, etsi nullam aliā causam habuit, cur sententiam nostram Arminianam appellet, quàm qua Thesi seq. 25. utitur, quum ait: *Primus compareret Arminius, qui falsi manifestum, adeòq, multis hæresibus scatentem contenderit esse Belgicæ Gallicæq, Confessionis Articulum de Prædestinatione.* Pudere ipsum meritò debebat tā ingentis temeritatis, & supinæ ignorantia: Nimis enim notoriè falsum est, Arminium unquam contendisse Articulum Confessionis Belgicæ de Prædestinatione (de Gallica enim nunquam fuit quæstio) falsi manifestum, adeòque multis hæresibus scatentem esse. Quod si omninò id contendisset, nec primus nec solus fuisset; Sed nec falsū, nedum falsi manifestum, nec hæreses continere, nedum hæresibus scatere, multò minùs hæresibus multis scatere unquam adseruit, nedum contendit, adusque vitæ suæ finem, cujus indicium omni exceptione majus est, quod ex ipsa Confessione Belgica

gica Sententiam suam multis magnisque argumentis adstruere semper conatus sit; & paratum promptumque se professus fuerit cedere ministerio, si uspiam, sive clam, sive palam quippiam Confessioni contrarium dixisset aut scripsisset. Sententiam, quam impugnabat, negabat semper Confessionis sententiam esse; Particularium quorundam Doctorum eam esse agebat, à qua dissidere ipsi fas liberumque esset. Hæc lippis & tonsoribus sunt nota. Quis Capellum affectus impulerit, ut tam fidenter contrarium asseveret, haud difficile est conjicere. Satiùs multò fecisset, si eadem ingenuitate de Actionibus Arminij ignorantiam suam professus fuisset, qua de Goudanis, aliorumque locorum Pastoribus in principio Theseos hujus professus fuerat: consulisset honori suo; & injuriam tam insignitam non fecisset mortuo Iesu Christi, dum vixit, servo, & fortasse nunc eidem multò, quàm credit, cariori, ad quem injuriam istam redundare certò sibi persuadeat. Nihil enim est, quod ei vel in speciem possit prætexi. Sed quid ego de hac una hic prolixè conqueror? Sequitur major injuriarum moles & cumulus.

Iam Arminio defuit non tantùm veritas, inquit, sed & candor ac integritas. Grave crimen,

men, Capelle, si verum; sed æque gravis calumnia, si falsum. De candore atque integritate viri istius testari possunt, qui cum ipso vixerunt, & modium, quod dicitur, falis consumserunt. Integrius pectus non tulit Gallia vestra. Nisi candori & integritati studuisset, non subiisset tot odiorum aleam, nec tam duræ contradictionis periculum. Si prudentia aliquando usus est, ut conscientia suæ & paci publicæ melius consuleret, præter boni viri & Christiani hominis officium nihil egit. Potuit id facere, & fecit sanè absque ullo animo fallendi, imò eo animo, ut se Deo magis probaret, qui solus cor introspicit, & cui hypocritam magis exosum esse sciebat, quàm apertè impium. Cum enim malus bonus videri vult, tum est pessimus. Videamus quomodo id probet Capellus.

Cum enim, inquit, molirètur, idque magno nisu, sed clanculario, persuadere quamplurimis, hæreses multas, aut unam certe, multas obtegentem extare in Belgicâ Confessione (falsum hoc esse jam ante evicimus) palam tamen obtendebat, se nihil sentire, quod non cum Belgicarum Ecclesiarum Formulis optimè conveniret: Non palam tantum, sed clam etiam: Atqui, inquit, id contestatus est Anno Domini 1603. Mense Majo, deinde Septembri, cum Lugdunum Batavorum

ta vorum vocatus est, ut Iunio succederet; cum tamen ipsum Iunium quamplurimis literis, quæ postea sunt editæ, conatus fuisset in suam sententiam pertrahere. Fac Syllogismum, Capelle: An candori repugnat contestari, & nihil sentire, quod cum Belgicarum Ecclesiarum Formulis optimè non convenit, & simul conari Iunium in sententiam suam pertrahere? Quis Argumentum tale expectet vel ab eo, qui adhuc inter cathedras discipulorum Capelli plorat? Credidit Arminius & contestatus est, sententiam suam convenire cum Formulis Ecclesiarum, & Iunio, qui similiter sententiam suam credebat & contestabatur cum Formulis Ecclesiarum Gallicarum convenire, sententiam suam persuadere conatus est. Ergo, Arminius non egit candidè: Quæ consequentia? Cur non eodem jure Iunium candidè non egisse colligere liceat? Certè, si Iunius fuisset Confessio Belgica, aut sententia Iunij sententia Belgicæ Confessionis, diceret aliquid Capellus. At nunc tantum abest, ut id verum sit, ut Iunij sententia ne quidem cum sententia Belgicæ Confessionis convenerit: Quippe qui Objectum Prædestinationis statuebat hominem integrum & in puris naturalibus constitutum: Cum Belgica Confessio Objectum statue-

re

re videti velit hominem lapsum. Deinde parum candidè agit Capellus, cum collationem illam, quæ inter Arminium & Iunium fuit, eo animo institutam interpretatur ab Arminio, ut in sententiam suam, tanquam si de ea jam amplius nihil dubitaret, Iunium pertraheret; cum nihil aliud revera egerit, quàm, ne suo iudicio fidere videretur, Iunio tanquam celebri per id tempus Professori & Theologo sententiam & rationes sententiæ suæ examinandas obtulerit, ut, si eas probaret, tantò magis in sententiâ suâ confirmaretur, sin minus, ut vel à Iunio rationibus melioribus instrueretur, inque sententiam veriore pertraheretur; vel Iunium ipsum rationibus melioribus instrueret, & in sententiam suam pertraheret. Quid potuit candidius integriusque ab ipso fieri? Et, obsecro te, Capelle, posito quod verum esset, quod dicis: An cum clarissimo Viro Iunio sententiâ suam communicare, est conari magno molimine plurimis hæreses clam perluadere? Et communicare cum viro docto, estne semper conari eum in sententiam suam pertrahere? Aut propositum habere non credere meliora ostendenti? Hoc si sentis, jam equidem tempus est, ut epicedium scribatur collationibus omnibus.

Sed, inquis, *Rursus cum in Thesis privatis, quæ postea quoque prodierunt in lucem, suam sententiam non semel propugnasset, & Classis Dordracena moneret, in id inquirendum sedulo, quia nihil publici juris adhuc fecerat, unde convinci posset, obtendebat adhuc anno 1605. temerarias esse suspiciones illas.* Audivit rumusculum Capellus, & credidit: sed vide quàm vanâ credulitate. Sententiam Arminij de Prædestinatione ex Thesis ipsius Privatis discere non erat opus: Iam satis erat nota. Collatio cum Iunio, quam Iunius ipse præter fidem datam, vel saltem imprudenter describendam dederat Discipulis suis, & quæ idcirco jam in omnium pænè manibus erat, satis eam evulgaverat. Dixerat etiam rotundè sententiam suam Arminius, cum ad Professionem vocaretur, ut ignorare eam non posset Gomarus, promotor ipsius. Publicè eam & privatim defendebat, sed eâ moderatione & prudentia, ut pio cuique, ipsisque adeò Collegis suis abundè satisfaceret. Soli Dordraceni Inquisitores, seu proprio, seu alieno zelo, suspiciones novas ordiebantur, & quod de Scribis & Phariseis dicitur Luc: 11. ΕΕΡΧΑΝΤΟ ΔΕ ΙΝ ΟΟΣ ΕΝΕΓΧΕΙΝ ΚΑΙ ΑΠΟΤΟΜΑΤΙΖΕΙΝ ΑΥΤΟΝ ΠΕΡΙ ΠΛΕΙΟΝΟΝ, ΕΝΕΔΡΕΥΟΝΤΕΣ ΑΥΤΟΝ, ΚΑΙ

ZEE-

ZEETOVNTES THEREVSAB TI EK TOV
 STOMATOS AVTOV, HINA KATEGORE-
 SOOSIN AVTOV vers. 53. 54. Suspicio-
 nes verò unde habebant? Ex tyronibus
 quibusdam studiosis Theologiæ, qui illos
 rumores ad ipsos fortè, quia illis non in-
 gratos esse sciebant, detulerant. Arminius
 contra contendebat, suspicionibus agen-
 dum non esse: immeritò se ijs gravari: nec
 credendum esse rudibus quibusdam juve-
 nibus, qui ferè vel inscitia, vel affectu la-
 borant. Hæc ita esse, certum est: Sed &
 idem evinco ex ipsis Capelli verbis: nam
 occasionem suspicandi ex Thesibus Privatis
 Arminij non habebant Dordraceni: In
 ijs enim, uti Capellus ait, sententiam suam
 non semel propugnaverat Arminius. Ergo
 suspensiones esse jam desierant: habebant,
 unde Arminium apertè accusare poterant.
 Dicere, quod Theses illæ privatæ erant, &
 quod proinde eas nancisci non poterant,
 ineptum est. Nam si eas nancisci non po-
 terant, cur suspicioni indulgebant? Cur
 non potius credebant, Arminio injuriam
 fieri, quamdiu contrarium non constabat?
 Tam diu enim bonus quis esse præsumitur,
 quamdiu contrarium non apparet. Sed nec
 erant Theses istæ ita privatæ, uti Eleusinia
 quædam sacra: Nihil minus: Nec eas My-

H ; stæ

stæ soli habebant: Quotquot ad Collegium istud pertinebant, ij describebant eas sine scrupulo. Quod si omninò Capellus velit, eas, veluti KEIMELIA quædam, secretas habitas fuisse; curare poterant levi momento, ut sibi eæ darentur per Academiæ Curatores, aut per Alumnos suos. Non erat necesse, ut expectarent, dum eæ fierent publici juris, aut ut aliquid in lucem ederet Arminius, unde culpæ istius reus agi, & convinci posset. Vides, ut se ipsum intricet Capellus. Sed quod eum maximè confundit, & clarissimè omnium temeritatē Dordracenorum arguit, est, quod cum Curatores Academiæ, occasione Dordraceni gravaminis, tribus Theologicæ facultatis Professoribus jussissent sententiam suam declarare super eo, an dissensio aliqua inter ipsos esset; responderunt unanimiter, *Nescire se, inter Theologicæ facultatis Doctores dissensionem ullam esse, quod attinet Doctrinæ fundamenta.* Idem testabantur Regens Collegij Theologici, & Subregens. Nota verò, quòd hæc declaratio facta sit ab ipso Gomaro & Trelcatio, postquam Arminius, non privatim tantum, sed publicè etiam, præsentibus ipsis, defenderat Theses suas de Prædestinatione, de Ecclesia Catholica, de Iustitia & Efficacia Providentiæ Dei in malo, de Ecclesia

Ecclesia & ejus Capite, de Notis Ecclesiæ,
de libero Arbitrio, &c.

At inquit Capellus, *isti, quid clanculum
ageret Arminius, non noverant*: nempe Dor-
draci clarius videbant lyncei isti Pastores,
quid Leyde ageretur, quam qui in ipsa ur-
be & Academia quotidie Arminium aut
docentem, aut disputantem audiebant. Ne-
cessum profectò est, ut Capellus aut stupi-
dos fuisse credat Professores Theologiæ,
qui Leyde agebant, ut præ stupore non
perciperent, quid rerum apud ipsos gere-
retur, aut tam lentos frigidisque pro Dei
veritate, ut, quamvis optimè perciperent,
quid ageretur, non magnoperè tamen id
curarent, susque deque habentes, Veritas
an falsitas triumpharet: quo quid inepti-
us? Adde, cum rectius omnia scirent Dor-
draceni, an probabile putat Capellus, eos
id celaturos fuisse Gomarum & Collegam
ipsius, aut de facto eos id celare voluisse?
Quis credat? Scivit itaque Gomarus, quid
post siparium ageretur: Neque Zelum ei
pro causa sua deesse, ne gravius nunc quid
dicam, scire poterat, quisquis Gomarum
vel semel Disputantem audiverat: Sed nec
amore Arminij impeditum eum fuisse, quo
minus officium faceret, satis multa jam fi-
dem fecerant. Quid igitur? Necessum est,

ut dicat Capellus, velit nolit, Professores istos judicasse, Dordracenos nullam justam causam habere, cur secus de Arminio opinarentur; ac proinde Arminium rectè respondisse, suspensiones ipsorum temerarias esse. Constat itaque hætenus Arminio candor suus, testimonium ipsi præbentibus collegis ipsius, & frustra eum per cuniculos suffodientibus Dordracenis.

Crescentibus in dies suspicionibus, suspicionumque causis. Non crescebant causæ, sed quærebantur: Suspensiones paulatim in odia exhibant, & quæ odia comitari ac fovere solet, diffidentiam. Nec deest unquam prætextus. Quod volunt Sabini, id somniant. *Arminius tamen, inquit, perstabat. 1. in detrectatione cognitionis Synodalis.* Falsò & ineptè. Falsò; quia Synodus nulla unquam, nec per se, nec per Deputatos, eum in finem expressè ablegatos, vocavit Arminium, ut de ejus causa cognosceret. Ut autem Synodus Nationalis haberetur, in qua cognitio causæ institueretur, tantum abest ut Arminius detrectaverit, ut Synodum talem pro virili promovere semper studuerit. Ineptè; Quia Arminius & Professores Theologiæ Synodo particulari non suberant, ut, si omninò detrectasset in ea causam suam cognosci, jure merito detrectare potuisset.

isset. Tantum verò abest ut detrectaverit etiam in ea aut per eam cognosci causam suam, ut etiam, quando Deputati Synodi, qui vocantur, ipsum compellarent, tanquam cognituri quid de fama ista esset, etiamsi eos sciret ad id ipsum Deputatos non esse, sed sua sponte istam provinciam in se suscepisse, semper tamen ijs responderit, paratum se esse defendere sese, si modo accusator prodiret, & coram ipsis ostendere, injuriam sibi fieri summam malignis istis rumoribus, quos suspicaces quidam mortales de se spargebant & fovebant, vel, si accusator non prodiret, paratum se esse ad conferendum cum ipsis, si modo Deputatorum qualitatem exuerent, tanquam cum fratribus & Pastoribus, de omnibus Articulis fidei, sine ulla distinctione, eâ lege, ut tamliceret sibi quærere, quæ vellet, quam ipsis: Alioquin præjudicium nimis magnum & manifestum fieri sibi, Professioni suæ, facultati Theologicæ & Academiæ Curatoribus. Sed alia longe mens erat istorum hominum, quam non ignorabat Arminius, alijsque, quibus eorum consilia perspecta erant. Habebat Arminius Considerationes, quia rogatus fuerat à Synodo, uti & Collegæ ipsius, ut eum in finem Confessionem & Catechesin relegeret &

examinaret. Non diffitebatur itaque se habere aliquas, nec diffitendi causam habebat: Eas movere, ante quam Synodus celebraretur, illicitum sibi & nefas putabat, publicæ pacis causa: Aperire aut patefacere eas quibuscumque sciscitantibus, & quidem animo sæpe non bono, importunum, inutile, ac noxium esse sibi persuadebat. Atque in isto proposito ita obstinaverat animum, ut fidenter semper diceret, se paratum subire quamlibet vel durissimam censuram, si contrarium egisset. Eodem modo se habet res cum dissimulatione, in qua Arminium perstitisse, affirmat Capellus. Nunquam dissimulavit Arminius, se aliter sentire de Prædestinatione, quam nonnulli Theologi. Nunquam dissimulavit, se habere Considerationes, falsus est utrumque ingenuè. Sed Considerationes, inquis, non indicavit. Esto. At hoc non est dissimulare, sed rotundè, sed ingenuè, animi sui sententiam declarare. Sed nec dissimulare semper crimen est: Candor cum dissimulatione optimè potest aliquando consistere. Prudentia jubet aliquando dissimulare, ut veritatis promotioni & proximo melius consulatur. Verum tantus erat viri candor, ut ne quidem dissimulare vellet.

Atqui

Atqui Hagam evocatus Anno 1607. eam ob causam, ne tum quidem animi sui sensa palam aperire voluit. Ut Psittacus loquitur Capellus, quod non intelligit. Nec evocatus fuit eam ob causam, Anno 1607. Et causam, ob quam evocatus tum fuit, ita liberè, ita apertè, voce, scripto dixit, ut nihil supra. Conventus præparatorius ad Synodum tum fuit indictus, eum in finem, ut in eo de loco, tempore, & forma Synodi Nationalis maturè deliberaretur. Quid hæc res habet commune cum eâ, de qua Capellus agit? Profunda est hæc historiæ inscitia.

Anno 1609. demum paucis ante mortem mensibus ausus est ea declarare. Imò verò jam multò ante ultrò & sponte sua Declarationem obtulerat. Nec declaravit sese, nisi jussus à Magistratu supremo. Quis pudor itaque, Capelle, dicere, cum jam videret quam multos Pastores, quam multos Proceres in Sententiam suam pertraxisset. Non ante se declaravit, quàm juberent, quibus jubendi jus erat, & simul atque illi juberent. Nullam occasionem callidus captavit: sed cum detrectare non posset sine scelere & inobedientiæ culpa, dixit sententiam, & dixit ea modestia, ea animi alacritate, ea rationum vi atque efficacia, ut in omnium Procerum animis

animis admirationem simul & amorem sui incredibilem excitaret.

Sed ne tum quidem, ut oportuit, ait Capellus. Credo, quia non loquebatur ad palatium eorum, qui ipsi malè volebant, & qui famam ipsius auctā istā oratione dōlebant. Sed quid desiderabatur? *Tum quoque Synodum omnem detrectabat.* Atqui, quomodo detrectabat Synodum, qui jam sententiam de loco, tempore, & forma Synodi habendæ cum alijs apertè dixerat? qui jam Confessionem & Catechesin seriò excusserat? qui Considerationes jam habebat paratas, nihilque optabat magis, quàm ut eas in Synodo proponere liberè posset, & sic ab omnibus istis, quas quotidie pius Vir patiebatur, vexationibus, calumnijs, obtreptionibus simul ac semel liberari? Falleris Capelle; Arminius non detrectabat Synodum; sed ij, qui Decretum Ordinum de Revidendis Formulis improbabant, qui Revisionem Formularum nolebant, & id unum tantum operam dabant, ut Decretum isthoc Ordinum prorsus enervarent, atque eliderent.

2. *Cum quæreretur, non in genere, quid sentiret, sed an dissentiret à formulis, ne tum quidem rotundè respondit.* Falsissima hæc sunt: semper respondit apertè Arminius, se non dissentire

sentire à Formulis receptis , sed tantum à privatis quorundam Doctorum Opinioni-
bus de Prædestinatione. Alia dicere non
juebatur, imò contra juebatur, Consi-
derationes, si quas habebat super Formulis,
nonnisi ad Synodum Nationalem referre.

*Oratione longa testatus est, esse quatuor de
Prædestinationis Objecto sententias.* Hac ora-
tione quid potuit apertius, candidius, aut
nervosius desiderari? Utinam ita candidè
atque ingenuè sententiam suam dixissent.
Adversarij Arminij in Collatione Hagien-
si, & nuper in Synodo Dordracena de Re-
probatione ! Sed si unquam quisquam vel
dissimulavit, vel detrectavit sententiam
suam dicere, certè ij detrectarunt maximè.
Et ferè ita fit, cui culpæ quis se maximè af-
finem esse sentit, eam alijs fidenter im-
properat, ut quam longissimè ab ea abesse
videatur.

*At dissimulabat eam, quam tertiam nuncupa-
bat, in Confessione Belgica exprimi.* Imò non
dissimulabat hoc, sed negabat apertè, quia
eam similiter, si non ijsdem omnibus, sal-
tem plerisque incommodis gravari dice-
bat. Opinionem suam de Prædestinatione,
quæ istis incommodis carebat, & verbis
sensibusque Confessionis, benè quadrabat,
istâ Confessione contineri verisimilius esse
conten-

contendebat, Nulla hic calliditas, sed aperti pectoris indicia ac signa. Et eadem omnia deprehendet Capellus in Oratione Episcopij, si animum advertat, & non eam canum instar, ex Nilo bibentium, fugiens legat. Ostenderem id prolixius, si indicium ullum calliditatis fecisset Capellus.

Concludens itaque dico, Arminium fide bona & candidè omnia sua egisse: Doctrinam, quam tenuit, aperte est professus: eam formulis Ecclesiarum contineri ingenuè semper se credere dixit: Formulas nunquam damnavit: Considerationes, quas ex Decreto supremi Magistratus & rogatu Synodi consignaverat, nusquam nisi in Senatu Ordinum, & jussus quidem, aperuit. Quare immeritò candorem in isto candidissimo pectore desiderat Capellus.

Verum enimverò non satis fuit Capello in Arminij mortui manes infami calamo incurrere; etiam in universum ejus Gregem, sed afflictum, dispersum, atque oppressum arietare audet. Nempe contra omnes sufficit unus. *Sinceritatem in ijs desideramus*, inquit, *1. Quia ut Arminius, sic et illi semper recusarunt, quo minus de suis controversijs, ad fidem pertinentibus, in ijs Catib⁹ ageretur, qui tū ex Dei verbo, &c.* Atqui uti frustra in Arminio desideravit Candorē Capellus, ita in ijs, quos Arminij

Secta-

Sectatores vocat, frustra eū desiderare candorē, brevi planū fiet. *Semper*, inquit, *recusarunt*, &c. Contrariū verū est: Nunquā id recusarunt: Sententiā suā semper candide sunt professi, &, quantum fieri potuit, terminis Formularum publicarū, quibus subscripserant, expresserunt & asseruerunt. Et ex Oratione Arminij, alijsq; ipsius scriptis, jam erat nota eorū de Prædestinatione Sententia. De eā conferre in Consistorijs, Classibus ac Synodis, nō tantum nō recusabant, sed volupe ducebant; quin & ultrò ipsi sepè offerebant. Conventus istos isti potissimū fini servire ac destinatos esse sciebant: In istis Collationes amicas ac fraternas, salvā cōcordia ac pace, fieri posse ac debere ex animo credebant: Et quia utraque pars formulis Confessionis & Catecheseos Heydelbergicæ se tuebatur, si convenire non poterat, in terminis formularum istarum utrinque manendum esse arbitrabantur, usque dum earum Revisio in Synodo Nationali facta, & à Synodo in hāc aut illam partem decretum esset. Decisionē in Synodis particularibus non frustra tantum fieri dicebant, sed cum Revisionis, jam ab Ordinibus decretæ, manifesta subversione, ac proinde Synodi totius, quæ ista Revisione potissimum nitebatur, totali impeditione. Examina quorundam Zelotarum
 impor-

importuna & indecora putabant. Si quis deliquisset contra publicas Formulas, aut contrarium subscriptioni suæ fecisset, eum censura justa notari, fas ducebant. Nunquam Ordini Ecclesiastico obstiterunt. Quid poterant aliud, aut candidius facere?

Imò sapius, inquiunt, significavimus nobis Synodum placere, modo pars adversa Iudicis officio non fungatur. De sola Synodo Nationali hæc pronuntiant. Verba eorum integra hæc sunt, quæ mutilatè Capellus proposuit: Gravamur etiam hac accusatione, quod, quoties alij fratres judicarent, non posse commodiore via huic malo obviam iri, quàm per Synodum, nos huic consilio restiterimus, semper Synodum impediverimus. Respondemus nos, hoc verum non esse. Etenim ipsimet Synodum efflagitavimus, optavimusque, ut ea istis, quibus primum decreta erat, conditionibus haberetur. Etiam in Remonstrantia nostra eam petivimus, & exinde sapius Scriptis editis, & non editis significavimus, Synodum nobis placere, modò pars adversa Iudicis officio non fungatur, ex solo Dei verbo Decisiones fiant, & charitati suæ quoque locus concedatur. Hac Oratione quid rectius, apertius aut justius dici potuit?

At partem adversam vocabant omnes freres Belgij Fœderati Pastores. Nihil minus. Norant, quàm multi non è minimis ab isto crimine

mine essent immunes. Eos vocabant partem adversam, à quibus jam se, ut hæreticos extra Conventus legitimos, imò inventitis & à summo Magistratu prohibitis conventiculis, damnatos norant, quorum odia atque inimicitias, plusquam Vatinianas, experti erant per aliquot annos, qui, quàm clam, quàm palam, ex ambone & suggestu ipsos convitijs atrocissimis insectati erant, qui populum, ut ab ijs secederet, Tribunijs Concionibus adhortati sæpè fuerant; qui Revisionem, ab Ordinibus decretam, suggillare quotidie non desinebant; qui secessiones & schismata ab ijs, indictâ causâ, invitis Proceribus, fecerant; qui Conventicula, Fœdera & Syncrètismos clancularios inter se inierant; quibus Doctrinam eorum, non modo falsam, sed & intolerabilem pronunciaverant; qui cum illis Conventus Ordinarios celebrare detrectaverant, qui literas eorum Systaticas rejecerant, membra eorum à Cœna arcuerant, imò qui orare cum illis recusaverant: Eos, inquam, vocabant partem adversam. Quid videtur, Capelle? jure an injuriâ? Si jure eos vocabant partem adversam, an non causam habebant clausulâ ista utendi? Si injuriâ; da igitur Definitionem partis adversæ. Me quod attinet, si quæ unquam

sub sole fuit pars adversa, contra quam jure excipi potuit, hæc fuit: Neque crediderim, Protestantes tot ac tam graves rationes habuisse, propter quas Concilium Tridentinum adversam partem vocarent, quàm habuerunt Remonstrantes, cur tales Zelotas partem sibi adversam vocarent. Et hi ipsi fuerunt Patres isti, qui in Synodo Dordracena, non multò post, utramq; paginam fecerunt & sententiã de plano dixerunt in Remonstrantes. Sed de hac re in fine pluribus.

Ejusdem commatis est, quod sequitur: *Cum rogarentur ut explicarent rotundè, quid potissimum improbarent in Formulis publicè receptis in Belgio, nunquam adduci potuerunt, ut ad postulata directè candideque responderent.* Contrarium est verum: Semper directè candideque responderunt, se in ijs nihil improbare, sed in placitis quorundam Doctorum, quæ cum istis arbitrabantur non convenire, quæ Capitibus quinque contineri dicebant.

Atqui ea distinguebant, tanquam majoris momenti Capita ab alijs, quæ minoris momenti erant. Ita est. En candorem ipsorum. Præter ista fatebantur, se habere Considerationes quasdam super Formulis receptis, quas minoris momenti vocabant duabus de causis. 1. Quia circa Quæstiones minoris momenti

momenti versabantur, & non pauca phras-
 es, ordinem, modumque tradendi potius
 spectabant, quàm res. 2. Quia Consi-
 derationes tantum erant, non autem Con-
 clusiones, de quibus nihil dum certi apud
 se statuerant, uti de præcedentibus quin-
 que Capitibus. Considerationes autem il-
 las natas dicebant ex accuratâ & attentâ
 Formularum Belgicarum relectione, quæ à
 Synodo Suyd-Hollandicâ ipsis injuncta
 erat atque imperata, & quidem eum in fi-
 nem, ut eas in Synodo Nationali fratribus
 amicè expendendas darent, quando For-
 mularum istarum Revisio in Synodo istâ, ex
 Decreto Ordinum, futura erat.

*At illas exponere semper recusarunt, cum ro-
 garentur.* Ita est. Causæ justissimæ erant,
 cur id recusarent, & quidem tres. Prima:
 Quia supremus ipsorum Magistratus Con-
 siderationes illas clausas, consignatasque
 ad se mitti jusserat, vetueratque disertè eas
 proferre aut aperire in Synodis aut Con-
 ventibus ullis Particularibus, pacis ac con-
 cordiæ causâ. Secunda: Quia intempesti-
 um & sine fructu id erat futurum. Quor-
 um enim movere in Synodis Particu-
 laribus, quæ à Synodis istis tolli non
 poterant, & quæ novarum ac majo-
 rum litium semina futura erant? Tertia:

Quia videbant eos, qui id maximè urgebant, hoc unum agere, ut ij, qui Considerationes istas habere se fatebantur, in Synodis particularibus damnarentur, tanquam HETERODOXOI, & per provisionem à Ministerio suspenderentur. Quorsum? ut ij postea ad Synodum Nationalem non venirent, tanquam partes & membra, sed tanquam rei & per appellationem, ut loquuntur, idque apud eos ipsos, à quibus jam ante damnati & rei judicati essent; quod ipsis videbatur, non modò injurium adeoque contrarium intentioni & Decreto Ordinum, sed & manifestam tyrannidem affectare in Ecclesiam, ubi videlicet non liceat tutò ac sine periculo Considerationes in Formulas receptas adnotare, etiam cum id supremus Magistratus jubet, aut ubi adnotaveris, non proponere nisi cum censuræ aut maculæ periculo, etiamsi si cætera intra terminos Formularum, quàm potes maximè sollicitè te contineas.

Hæ sunt Rationes, quibus movebantur, ut in conventibus particularibus Considerationes suas non exponerent. Et has ipsas Rationes non celabant, sed apertè & candidè, quoties occasio se dabat, in medium proferebant. Quia vero zelotæ isti non cessabant eos, hîc illîc, Quæstionibus, veluti

luti fidiculis quibusdam, torquere, ut aliquid exprimerent EVDIABLETON, & si nihil possent, censuris ac suspensionibus à munere, tanquam contumaces, vexare atq; affligere, coacti tandem fuerunt repræsentare innocentiam suam Supremo Magistratui suo, eumque libello supplice pro pace ac quiete suâ interpellare. Obtulerunt itaque *Quinque Capita* illa, de quibus *Capellus* ait, non tanquam Confessioni aut Catechesi contraria, sed eorum tantum opinioni, à quibus tam duris modis vexabantur. Obtulerunt autem tantâ cum sinceritate, ut unum trium supplices orarent: Vel ut Ordinibus placeret Synodum, quam fieri posset maturissime, convocare: Vel si id fieri non posset, ut Tolerantia mutua sanciretur usque ad Synodi tempus, cujus beneficio interea temporis ipsis quietis esse liceret à vexationibus Symmystarum suorum: Vel, si neutrum è re publicâ esse judicarent, ut juberent ipsis cedere functionibus suis: paratos enim se damno suo privato sancire publicam quietem, & Patriæ pacem. Quid poterat aut sincerius, aut æquius ab ipsis fieri? Totum mundum appello judicem.

Cum Delphis in Synodo rogarentur, an non essent plura, in quibus dissentirent, obtulerunt,

aperturos se sua sensa, modò prius alijs de feren-
do in ipsis Quinque Capitum dogmate profes-
sionem edidissent. Posito quod verum esset,
 hæc in Synodo Delphenfi acta esse: Quis
 candorem in Remonstrantibus desideret,
 quando hæc obtulerunt? Profitentur se ha-
 bere Considerationes: profitentur, se eas
 aperturos omnes & singulas, sed eâ lege,
 ne ipsis hoc fraudi sit, aut damno cedat. Po-
 tuissent jure suo hæc non offerre, quia De-
 creto Ordinum jussi erant Considerationes
 suas non aperire, sed obsignatas ad ipsos
 mittere; & rationes erant alioquin etiã gra-
 ves, quas jam paulò ante indicavimus, cur id
 non offerrent. Quando itaque, non obstante
 isto Decreto & sepositis tã justis rationibus,
 nihilominus profitentur, se fratribus suis
 velle Considerationes suas omnes pandere,
 si modò profiteri velint, ipsis fraudi hoc nõ
 futurum; alioquin posse & malle jure suo
 uti, quomodo violati candoris postulantur?

At hic quæro, inquit Capellus, Quis unquã
pius pios fratres, in Synodo legitimã congregatos,
ausus sit ita compellare, ijsque leges hujusmodi
præscribere? Respondeo, 1. dum hoc quærit
 Capellus, ostendit, quàm sit ignarus rerum
 earum, de quibus agit. Non erat Synodus,
 in qua hæc agebantur: Conventus tantum
 erat particularis trium Remonstrantium ex
 una

una parte, & trium Contra-Remonstrantium ex altera parte, qui de consilio Comitum Guillelmi consenserant inter se, ut simul convenirent & dispicerent, an Concordiæ & pacis viam reperire possent. 2. Conventus erat, in quo ipsi Contra-Remonstrantes, ut Acta ipsorum testantur, stipulabantur, ut ageretur, quicquid ageretur, tanquam inter particulares, absque ullo Ecclesiarum præjudicio. Sed posito etiam, quod justa ac legitima Synodus fuisset, in qua hæc Acta sunt, tum certè nihilominus fateatur, necesse est, Capellus, eos, qui ita, ut Capellus ait, respondebant, fuisse ejusdem Synodi membra, qui jus suffragij habebant, uti cæteri. At quis, inquam, quæsit, utrum ijs, quibus suffragij jus est in libera Synodo, liceat pro jure suo loqui & compellare Collegas suos? An pietati repugnat, ut quis pro causa sua respondeat ac petat, quod sibi utile ac consultum videtur? An qui compellat eos, qui non plus juris in ipsum habent, quam ipse in illos, illegitimè eos compellat, aut leges ijs præscribit? Contrarium majori jure quæri posset: Quis unquam pius pios fratres cogere voluit ad faciendum id, quod supremus Magistratus fieri verat, quod contra omnem equitatem est, quod ad Veritatis præjudiciū facit, & ad ipsorum oppressionem directè tendit?

Sed particularis tantum iste, uti diximus, fuit Conventus, sex in universum Ministrorum; & quidem hoc fine institutus, ut super Controversijs, jam motis & toto orbe notis, ratio aliqua pacis concordiaeque iniretur. Quando autem id unum candidè & seriò ut ageretur expectabant Remonstrantes; præter omnem eorum expectationem, sex alia Religionis Capita in scenam producta fuere à Contra-Remonstrantibus, pæneque tricenæ ad ea de novo cusæ Quæstiones, ad quas non modò tres illos, qui aderant, sed & reliquos omnes in universum Remonstrantes respondere, ex animi sententiâ, jusserunt, ut se ab omni heterodoxiæ, circa illa Capita, suspicione purgarent: quâ, tanquam sælici animorum PROTHERAPEIA, præmissâ, tum demum dispici voluere, An & Quomodo commoda aliqua pacis via, circa Disputationes, jam ad quinque notos Articulos motas, pleno utrimque consensu, inveniri posset. Intellexerunt protinus Remonstrantes, hac agendi ratione, sub specioso prætextu, pro concordia tantopere desideratâ, novarum litium sementem insidiosè quæri, in noxam causæ suæ; visumque ipsis maximè præposterum, ut occasio movendis novis altercationibus captaretur, antequam eæ, quæ jam motæ,

motæ, vel compositiæ forent, vel saltem de earum momento inter partes convenisset; ideóque gravati sunt ipsorum postulatis hac in re obsequi. Veruntamen, ne vel in speciem amabili concordia deessent, receperunt se & homodoxos omnes ad Quæstiones, de novo propositas, ingenuè responsuros, modo tres illi, qui Contra-Remonstrantium nomine Cætui interessent, pro se quisque antecederent declararent, se Sententiam Remonstrantium super quinque dictis Articulis pro ejusmodi habere, quæ neminem Sacrosancto Ministerio indignum redderet: si enim secus statuerent, non videre se, quorsum servituræ essent Responsiones suæ ad tot novas Quæstiones: quia, etiamsi ex quærentium voto eas formarent; nihilominus tamen propter solam dissensionem circa Controversias antehac motas præconio Evangelij indigni habendi essent. Iudicent pij Lectores, judicet universus Orbis Christianus, an hoc sit legem Fratribus præscribere, quemadmodum à Capello qualificatur. Cæterùm, Contra-Remonstrantibus detrectantibus id, quod postulabatur, profiteri, Remonstrantes Quæstiones quidem illas novas se cum homodoxis suis communicaturos receperunt: sed Interdicto Illustrum Ordinum interveniente ad

eas respondere vetiti sunt, videntium nimirum id agi, ut Considerationes Remonstrantium, hætenus apud ipsos & ab ipsis pressæ, ante tempus in lucem protraherentur, unde necessario novarum litium densissimum agmen brevi exoriturum esset.

Attamen, inquiet fortasse Capellus, istas Considerationes non reservabant sibi, sed occultè eas interim disseminabant. At hîc cardo versabatur. Hoc erat, quod probandum esse dicebant Remonstrantes: Non petendam ex domo rei accusationem, non extorquenda, quæ pacis causâ silere ipsos jussierant Ordines, & quæ ad publicam pacem usque ad Synodi tempus sîleri tutius erat, quàm proferri: In prævaricatores animadvertendum, sequendam formam usitatam; accusandos delinquentes, censurâ notandos, suspendendos, exauthorandos, excommunicandos, prout res mereretur. Semper enim id juris habitum apud nos in causâ Religionis; uti rectè Patronus ille verè magnus & rerum Patriæ peritissimus ait, *accusatione, non inquisitione grassandum.*

Verumenimverò hoc Axioma Iuris, omni exceptione majus & consuetudine loci roboratum, non movet Capellum. *Verum id quidem, inquit, nisi justæ sint, & amicè fiant Inquisitiones istæ.* Esto. At utrumque hîc deerat:

erat: nec amicè fiebant, nec justæ erant. Ut amicè factas ostendat Capellus: *In sanguinem*, inquit, *in necem non grassabatur Delphensis Synodus, nec adhibebat comminationes, nedum tormenta.* Pulchrè. Ergo amicè agit cum Capello, qui eum non interficit, aut in necem ejus non grassatur, vel equuleo eum non adhibet. Quod si Capello id est amicè agere, periculosa est amicitia, quæ cum illo contrahitur. Crederet enim se amicitie jura omnia integra atque inviolata servare, si à sanguine, à cæde & equuleo tantum abstineret. Sed retorqueo Argumentum, cum in sanguinem & in necem aliorum non grassarentur Remonstrantes, cur non illos etiam amicè pro jure suo respondisse & petijisse, quod petierunt, credit Capellus? Deinde, unde constat Capello, Synodum illam, id est, plerosque vel Antesignanos adversarios Remonstrantium, qui in Synodo illâ aderant, non dico à comminationibus abstinuisset (quis enim contrariū nescit?) Sed in necem, in sanguinē eorum grassatos non esse, quantum in ipsis erat? Ego nō opto, ut vadi-
moniū istius rei apud Deū obeat Capellus. Nota sunt axiomata, dicta ac facta pluriū, quæ à sanguine & sevitiā nō abhorrent. Et si non tam vis quàm zelus & prætextus ijs defuisset, novit Deus, quorsum consilia quorundā fuissent

fuiſſent evaſura : quorum major Propoſitio habet, Licere, imò laudabile eſſe, in hæreticos pertinaces, quos vocant, & qui pacem publicam turbant, gladio animadvertere, illis facile eſſe ſubſumere Minorem, unde quam repente ſanguinaria ſequatur concluſio, quis non videt ? Multi certè, ubi iſti homines rerum potiuntur, magno ſuo damno id experti ſunt. Calèt adhuc foci multis in locis, ubi ex præſcripto eorum ſententia lata fuit. Rubet etiamnum ſententia Synodi Dordracenæ, ſanguine & injurijs optimorum civium ſcripta, & rubebit amplius, ſi voti ſui compotes fiant Diotrephes iſti, quod Deus avertat. Quæ mens ſit Capello, Deus novit. Certè, ſi quid colligere licet ex verbis ipſius, D. Vorſtij p. m. Sententiam eodem atramento ſcripſiſſet, quo Draco leges ſuas, aut eum ipſum argumento à fasciculis, cum Calvino præceptore ſuo, confutaſſet. Ita enim de eo loquitur, ut jam Minor Propoſitio ab eo adſumta ſit, tanquam certa, hæc videlicet, *Multas eaſque pernicioſiſſimas hæreſes malicioſiſſimè diſſeminavit*, quæ in Concluſionem ſanguinis deſinat necelle eſt.

Atqui Synodus cupiebat animo fraterno candidoque ſecum agi. Atqui Caïn etiam Abelis frater erat, &, ut ait ille, *fratrum quoque gratia*

gratia rara est. 2. Si cupiebat secum agi fraterno animo, æquum erat, ut ipsa eodem animo ageret: At eodem animo egit. Unde id scit Capellus? Verbis eorum credendum est. Atqui quæro, Cum Arminius & ejus sectatores, quos vocat, semper protestati sint, sese cum ipsis animo candido ac fraterno agere, quid est, quod Capellum movet, ut credat, eos nihilominus veteratorio animo omnia egisse? *Actiones*, inquit, *aliud testantur.* Vide ergo horum *Actiones* & judica. Si fraterno animo agebant, cur tam amarulentas de ijs suspiciones sine causâ fovebant: Cur tam diris modis & tam varijs illos vexabant & affligebant? Cur innocentibus atque invitis tot gemitus, tot suspiria quotidie expectorabant? Cur eos hostes declarabant, indictâ causâ? Cur ab ijs, conjuratione factâ, secedebant? Cur Ecclesias suas hortabantur, ut cum ijs commune nihil haberent? Cur plebem promiscuam Tribunitijs suis Concionibus & libellis famosis concitabant in capita eorum? Cur pacem offerentibus recusabant? Cur eos adeò averfabantur, ut ne quidem cum illis communes ad Deum preces fundere dignarentur? An hæ *Actiones* sunt fraternæ? Sed ita fit: Quos impensè amamus, eorum vitia, tantum abest ut videamus,

mus, ut ea virtutes putemus: quos odimus, ab ijs nihil rectè fieri credimus, imò eorum rectè facta pro vitijs enormibus reputamus: Tantùm valet, quo animo atque affectu aliquid videamus.

Sed causæ, inquit, erant justissimæ 1. Quia dissensionem suam, quam saltem in quatuor Articularis profitebantur, hætenus multos annos dissimula verant. Atqui posito, quod id verum sit, idcirco injustæ erant. Si enim dissimulaverant, quid inquisitione opus erat? An non erant liberè eorum conscientia? Videat Capellus, quid dicat Thes. xxxi. Disputat. posterioris, *In conscientias non inquirunt Dordraceni.* An non pacis studiosi erant, quod ea, quæ habebant, sibi solis habebant, & intra animum suum conservabant? Cui nocere, cui obesse poterant ea, quæ premebant apud se, manentes interim in terminis Formularũ, quæ receptæ erant? Atqui, inquit Capellus, occultè ea disseminabant: Atqui, inquam ego, id ipsum, quod occultè ea disseminabant, aut notum erat, aut non. Si notum erat, jam sanè occultum id amplius non erat; quid ergo opus erat inquisitione? Accusandi erant tanquam culpæ manifesti: idque eo magis, quia id à se fieri negabant, & cum ipsis id obiciebatur, probari sibi cupiebant. Si non erat notum,

notum, quomodo scit tamen Capellus, eos id fecisse?

Sed probabile erat, nondum eos totam suam dissimulationem exuisse, sed forte plura majoraque premere, Probabile non sufficebat ad novam inquisitionem instituendam; suspicaci animo rarò desunt probabilia. Probæ necessariae esse debent, non probabiles. 2. Sed & nullo modo id erat probabile, quia expressè negabant, alia se habere, præter Considerationes quasdam, quas jam obsignatas miserat quisque pro se, prout eas privatim apud se conceperat. Quid restabat? Suspicioni nunquam satisfit; imaginatur sibi difficultatum montes, ubi omnia sunt plana.

2. *Videbat Synodus, quàm multis modis faverent Vorstio*. Neque hîc ulla justa causa: etiamsi id verum esset. Cur enim favere non poterant Vorstio, homini erudito, homini pio, obnixè oranti, ut benignè audiretur, obtestanti, injuriam sibi fieri, parato & prompto ad rationes dandum pro innocentia suâ? An non poterant favere Vorstio, & errores ipsius, si quos habebat, odissè? Quid? An ægrè ferebant isti mortales, quod eum cane pejus & angue non odissent? Quod in caput ejus non concitarent Proceres & plebem? quod crucifige,
ure

ure & seca cum illis non ingeminarent? quod eum ad furcam, aut Gemonias raptandum non curarent? quod non differrent eum ad externos Reges, Principesque, ut de eo mereret Carnifex? Alia ipsis mens, alius animus. Oderunt sanguinaria omnia Consilia, & carnifices voces contra eos, quos pios & Dei timentes vident; hæreticidam oderunt, hæreticum, si pius sit, amant: Pietatem, modestiam, docilitatem animi tanti faciunt, ut eum, in quo ista locum habent, favore, non odio dignum arbitrentur, etiam si graviter etiam erret. Inimicum diligere, hosti benedicere, maledicentibus benedicere jubentur, quanto magis errantibus quidem, sed pijs, sed Dei timentibus, sed veri studiosis: impios, peccatores, profanos, homicidas, &c. odisse Christiani animi gloria est; errantibus, sed pijs favere, decus putant.

Atqui hæreses multas easque pestilentiſſimas fovebat. Esto. Ne hæresis quidem debet esse causa odij, quando is, qui eam tenet, vir probus est, & conscientia suæ interesse asserit, ut ab eâ non discedat, eo quod hæresin esse non intelligat. Alia est ratio, quando hæresis significat pertinacem contendendi libidinem de re nihili, & quæ ad pietatem ac salutem nihil facit, quamque talem

talem esse is, qui contendit, apud animum suum persuasus ac convictus est. Hæc enim hæresis pertinaciam habet palpabilem & culpabilem, & de eâ loquitur Apostolus ad Tit. 3. 1. Corinth. 11. Ista hæresis aliud nihil quàm inculpabilis error est. At errans odio non est dignus, sed commiseratione: Docendus est, instruendus est tanto ardentius, quanto errat gravius, imprimis si docilem, si supplicem se præbeat, & paratus sit rationes dare & audire: In hac hæresi non habet locum pertinacia, aut si aliquando locum habet, de eâ non nisi Deus cordium inspector judicare aut potest, aut debet. Nemo præsumi debet studio errare velle, ubi se certissimum æternæ suæ salutis damnum incurrere novit. Non cadit in hominem tam barbara cogitatio, ut studio æternum miser esse velit: saltem qui nullum infallibile ac peremptorium Ecclesiæ iudicium in terris agnoscunt, ij pertinaciam nullam possunt aut debent impingere alijs, nisi eodem jure secum agi velint. Pontificiorum, qui Ecclesiam suam errare non posse credunt, alia est ratio. 2. Sed unde obsecro constabat jam tum Vorstium hæreses, & quæque multas & pestilentissimas fovere? An judicio aliquo publico damnatus erat Vorstius? An convictus? Nihil horum:

K

Imò

Imò tantum abest, ut convictus aut damnatus fuerit ullius hæreseos Vorstius, ut ea ipsa, quæ ipsi imputabantur pro hæresibus, à se rejici, quin & nonnulla pro gravissimis hæresibus à se ipso haberi affirmaret, idque tantâ sæpe argumentorum vi, tantaque animi præsentia ac moderatione, ut auditores vel invitos in adsensum raperet. Vidi & audiivi non semel, quomodo ad incitas redigeret eos, qui cum Capello hæreses ipsi impingebant. Et erat ea viri moderatio, ea pietas & humilitas, ut qui nollet vel invitatus faveret dicenti & causam suam agenti, adeò ut, si erraret, hæreticus tamen pertinax dici nullo modo mereretur. Quin & ea fuit fiducia animi, ut ipsi Synodo Dordracenæ fidem atque innocentiam suam probare obtulerit, idque supplex semel atque iterum petierit: Sed pudeat æternum Synodum illam, quòd damnaverit eum, quem audire noluit supplicantem.

Sed hæreses maliciosissimè disseminabat. Carpat te Deus, impudens os. Non poteras homini pio, homini mortuo, homini, quem fortè nunquam vidisti, nunquam audivisti, maledicere nisi in superlativo gradu? Malitiam si in calore orationis ei impegisses, quid poteras impingere atrocius? quid, quod minus probare poteras? Nunc cum
mali-

maliciosissimè eū egisse, non dicis tantum, sed etiam sedato animo scribis, quin & publicè defendendum suscipis, quis pudor, quæ frons? Reposcet à te Deus tantum scelus, nisi pænitentia seria veniam poposceris. Ego vidi & novi hominem, dum vixit; sed à malitiā tam eum esse alienum, vita, sermones, & actiones ipsius omnes testabantur, quàm credo Capellum ab ea alienum videri velle.

Quod de Remonstrantibus subjungit, copum eorum fuisse introducere licentiam quolibet novitates invehendi, in eo facit ipsis non minorem injuriam. Scire poterat & debebat, quoties & quàm seriò contrarium fuerint protestati; neque ullum eiusce ei indicium unquam allatum fuisse, etiam um in Synodo Nationali, ut id fieret, obixè & saepe peterent. Episcopij Oratio atis hac in re testatam fecit innocentiam pforum. Nemini mortalium ea prægrandis videbitur, nisi qui innocentiam eorum ea detegi ægrè fert. Quod si tamen ea Capello prægrandis videbitur, aut si Remonstrantium omnium defensionem vide: mavult, legat Præfationem Remonstrantium, quam Confessioni suæ præmiserunt: ibi communis omnium vox sonat; icentiam ipsis exosam atque invisam,,

„ esse, non minus, imò plusquam tyranni-
 „ dem: Mediam viam inter utramq; tenen-
 „ dam esse: & si omninò id fieri nequeat,
 „ tutius multò esse sub tyrannide quàm li-
 „ centia vivere: plus enim periculi esse,
 „ ubi omnia quàm ubi nulla licent: Pietatis
 „ terminos non esse licitum loco movere;
 „ Caritatis & prudentiæ esse statuere, quo-
 „ modo intra reliquos consistendum sit, ne
 „ conscientijs vis fiat, & pax tamen ac con-
 „ cordia publica facta recta maneat; In
 „ utroque peccari graviter posse & solere:
 „ multos esse, qui longà tyrannide pressi
 „ in licentiam, ex altera parte positam, solo
 „ tyrannidis odio incidunt: eosdem verò,
 „ postquam licentiam sibi sumserunt, om-
 „ nia pænè, quæ ad pietatem parum aut ni-
 „ hil faciunt, magno animo innovandi &
 „ toti Christiano orbi in os contradicendi,
 „ simul atq; alicubi pedem fixerunt, tanto
 „ licentiæ odio ferri, ut contradictionem
 „ nullam vel minimam ferant, imò contra-
 „ dicentium animis & linguis fibulam im-
 „ ponant, multo arctiorem, quàm eā, quam
 „ ipsi suis conscientijs ac linguis antea ex-
 „ cullerunt. Ab his sese alienos esse profi-
 „ tentur, & ut ne, vel odio tyrannidis in li-
 „ centiam, vel licentiæ odio in tyrannidem
 „ incidant, sollicitè operam dandam esse
 „ existi-

existimant. Repræsentarunt toties hoc Remonstrantes, ut mirum sit, quomodo tribuere nihilominus eis Capellus audeat, quod licentiam affectaverint.

Licentiam hanc obtegebant duobus speciosis Titulis. Primus erat fraterna Tolerantia; alter verò libertas prophetandi. Non opus habebant tegere licentiam, quam ex animo oderant. Tolerantiam fraternam & Prophetandi libertatem amabant, & amare se apertè profitebantur. Neutra cum licentia commune quicquam habet. Tolerantia fraterna non necessariò schismati opponitur: Libertas prophetandi excludit tyrannidem: Illa tum locum habere ipsis semper videbatur & etiamnum videtur, cum pietatis periculum non est, quamdiu ex præscripto Christi ita vivi ac doceri potest, ut salutis spes non laboret: ubi periculum hujus rei est, ibi prius quidem tentanda omnia remedia, ad periculum istud tollendum comparata: Sed, si ea frustra sint, merito jure solius æternæ salutis amore secessionem fieri. Reliquas omnes secessiones, factiones potius esse politicas, aut populares seditiones, credunt, quàm religiosa divortia: imprimis si cum damnationibus & Anathematis fiant: ferè Reipublicæ negotium & Regionis controversiam ijs misceri, quæ cum Reli-

K ; gione

gione & conscientia sæpe nihil aut parum
habet commune: Et hujusmodi secessiones
non paucas in Christiano orbe factas cum
viderent, Tolerantiæ, tanquam Panacææ
cujusdam, remedium rectè adhiberi posse
judicârunt: Et quia credebant Tolerantiam,
quam Ordines Hollandiæ sanciverant, lo-
cum habere posse inter ipsos & Adversa-
rios ipsorum; si modò ea mutua esset, &
intra certos ac præscriptos terminos placi-
dis animis utrimque staretur; pro eâ etiam
stabiliendâ omnem operam navârunt, rati
fufficere, si necessaria atque utilia ad pie-
tatem & salutem utrimque tenerentur, ani-
morumque simul ac sententiarum divor-
tia non fierent. Ita censuerunt semper,
atque etiamnum adhuc censent. Schisma
interim non existimant semper in solâ cæ-
tuum diversitate positum esse, sed in ani-
morum disjunctiõne, quâ fit ut cætus cæ-
tum anathematizet, tanquam Christiano
nomine indignum. Fieri enim posse cre-
dunt, ut cætus alij alijs puriores nobis
videantur, nosque non huic, sed illi cæ-
tui nos aggregemus, non quòd in illo sal-
vari nos non posse credamus, sed quòd in
hoc via salutis planius proponi nobis vi-
deatur; Unde Synagogas plures & unum
Dei Templum nihilominus esse posse sibi
persua-

persuadent. Quod si prior ista Tolerantia impetrari non possit, hanc secundam saltem commendatam omnibus esse volunt; eo quod citra omnem controversiam salva constare possit tota Religionis Christianæ essentia, ac proinde concordia pacisque vinculum, etiamsi cætus varient.

Libertatem Prophetandi in pretio etiam se habere profitentur. Nihil ea commune habet cum licentia: Circumscripta est prudentiæ & caritatis Christianæ legibus. Prudentia jubet, ut temporum, locorum & rerum diligens ratio habeatur; Caritas, ut personarum. Hinc nemini fraudi esse debere contendunt, si libet, ubi & quando oportet, considerationes suas aperiat, imprimis quæ ad Pietatem promovendum utilitatis aliquid habere videntur. Novæ eæ sint, an veteres, susque deque habendum existimant. Si Verbo divino & rectæ rationi consentaneæ esse reperiantur, pari alacritate novas recipiendas, quæ veteres rejiciendas putant. Si aliter facerent, Veritatis studiosi non essent. Et hinc pleraque mala in Christiano Orbe oriri credunt, quod quisque in eâ, quâ semel à primis annis imbutus, aut in quam occasione hac aut illâ delapsus est, Sententiâ,

gloriosum putet consensescere. Neque mirari satis possunt, axioma hoc placere ijs, qui nuper Novitatibus tot ac tantis Christianum orbem turbare non dubitarunt; illos libertati obicem ponere, qui sibi ipsis licentiam fecerunt vetera & recepta omnia unâ pænè liturâ delendi; illos novitatis arcessere alios, qui Novitias ipsorum ac verè paradoxas opiniones respuunt aut convellunt. Vix toleranda est hæc tam immanis Tyrannis in novitia sectâ, & eâ, quæ fateatur, nullum infallibile iudicium in terris à Christo relictum esse, unde nos pendere necesse sit. Sed videamus, quid in utrâque culpet Capellus.

Tolerantiâ, inquit, scimus multis errantibus cum laude concessam, sed & scimus eam à nullo mendacij Doctore meritò postulari. Et hic contra umbram suam pugnat Capellus. Supponit Remonstrantes supplices orasse Tolerantiam ab adversarijs suis. Nihil minus. Tolerantiam mutuam statuerant ac sanciverant Ordines, auditis utrinque partibus, & quia id rectè ac jure factum credebant Remonstrantes, laudaverunt & probaverunt Tolerantiam. Ut eam à cæteris postularent opus non habebant. Eodem jure dabant, quo petebant. Quod si quando postulasse eam visi sunt, benevoli id potius, quam supplicis

plicis animi signum fuit. Plures causas habebant, ut non tolerarent Adversarios, quàm ut tolerari ab ipsis peterent. Non parum enim de jure suo remittebant, quum placita tam horrenda, tam noxia, &, si per se æstimentur, non modo virtuti uni atque alteri, sed toti Religioni & Pietati Christianæ noxia tolerare se velle profitebantur; Sola caritas & fraterna commiseratio ita facere eos jubebat. Nimirum credebant ad extrema remedia non esse veniendum, nisi tentatis primum lenioribus. Multorum animos benignitate flecti, qui asperitate accuuntur ad perniciem publicam: Suasionibus & argumentis fortius & efficacius eximi errores, quàm immoderatis ac crudis partium studijs. Et jam id curaverant Ordines, ut quæ maximè atrocia atque horrenda erant in opinionibus adversariorum silentio premerentur; quin & tales terminos posuerant, intra quos stari tutò poterat. Sed posito etiam, quod eam postulassent, non postulassent tamen Tolerantiam, ut Capellus vult, mendaciorum aut saltem opinionum, quas jam aut ipsis, aut alijs constabat mendacia esse. 1. Ipsi eas pro mendacijs non habebant. 2. Nullum Concilium, nec Vetus nec novum, uspiam terrarum eas mendacij damnaverat. 3. Non

K s

postulassent

postulassent Tolerantiam nisi ad tempus, usque dum à Synodo legitima decisio facta esset. 4. Non petissent minori jure, quàm in Eirenico suo Paræus tolerari suos à Lutheranis petit.

Duo hic quærit Capellus. 1. *An meritò possit à Doctore mendacij postulari Tolerantia?* 2. *Si non, An postulanti jure concedi possit?* Primum quod attinet: *Tolerantiam ab ijs, inquit, qui falsa docent, iniquè postulari dicimus.* Hic primum noto, ineptam esse Disputationem, quando Status Controversiæ in principio clarè atq; expresse non ponitur. Id hic fit. Ita generaliter loquitur Capellus de Tolerantia, ut, quis Status Quæstionis sit, intelligi nequeat. Quicquid generale est, id simile est confuso. Non distinguit, quos errores, quæ falsa intelligat; an omnium parem & eandem esse rationem velit. 2. Non determinat, quam, aut qualem Tolerantiam intelligat: An Tolerantiam, quâ quis toleratur, ut Ecclesiæ membrum maneat. An, quâ quis toleratur, ut Ecclesiam doceat, & quidem, An ita ut maneat in eadem communione, an ut ab ea separatus & disjunctus. Hæc Disputatoris erat accurate proponere, & Præceptoris imprimis discipulis distinctè examinanda offerre. 3. Non discriminat inter eos, qui falsa docent,

cent, quæ ipsi falsa esse non ignorant, & inter eos, qui falsa docent, quæ tamen falsa esse ignorant. Denique inter eos, qui non modo ignorant falsa esse, quæ docent, sed qui ea credunt etiam verissima esse, adeoque necessaria ut doceantur, ad æternam salutem consequendam. Primos iniquè postulare, ut tolerentur, nemo dubitat: at secundi & tertij generis Doctores iniquè id postulare, quo jure dicit Capellus?

Quod erroris, inquit, in Religione potissimum, is sit genius, ut qui fallitur, etiam fallat. Itane Capelle? Ergone fallere rectè tibi dici videtur is, qui imprudenter fallitur? Quis credat, hoc ex Reformato cerebro proficisci? Non rectè sanè fallere dicitur, nisi qui fallendi animum habet: quomodo itaque fallere dicetur, qui animum habet juvandi, succurrendi, & salvandi eum, quem in errore versari credit? At tales sunt, qui docent ea, quæ credunt vera esse, etiamsi falsa sint, & imprudenter fallantur. Et hujus generis censendus est error omnium eorum, qui in Religione errant. Error enim, si voluntarius est, error amplius non est: Scelus est, imò sceleris atq; impietatis apex, studio aliquè fallere velle in negotio Religionis.

Id

Id enim tantundem est, atque operam dare velle, ut quis æternum pereat. At hoc de nullo errante, qua tali, præsumi unquam debet. Hoc si ita sit, quæ iniquitas, quæ injustitia in eo est, si is, qui errat aut imprudenter fallitur, postulet, ut in docendo tolleretur? *At cum falsa doceat, inquires, reipsa fallit, etiamsi imprudens.* At falsa non docet, inquam, judicio suo, sed alieno, quod nihili facit. Itaque non fallit, nec fallere vult, sed officium suum facere, & alios juvare vult, ut æternum ipsis benè sit. Quæ voluntas tantò æstimanda est justior, quantò id, in quo errat, existimat esse dignius, magisque necessarium vel utile quod doceatur. Et certè, si hoc Axioma valere debet, necessum est ut fateatur Capellus, nemini unquam licere postulare ab alijs, ut tolleretur in docendo ea, quæ non conveniunt cum ista Doctrina, quæ semel recepta est, aut recepta esse creditur. Cum enim is, qui id postulat, semper credatur falsa docere ab ijs, qui contraria ipsi docere sunt consueti, ipse autem sui ipsius Iudex esse non possit, neque magis censeretur vera docere, quia se vera docere sibi persuadet, quam is, qui falsa docet, cum is etiam sibi persuadat se verissima docere; utique necessum est, ut iniquè eum postulare dicamus, ut tolleretur

leretur in docendo. Hoc si semel concedatur, videat Capellus, an non veritati ostium axiomate isto suo claudat, & magnis multisque absurditatibus latam fenestram aperiat. Certè, alia vox, alia oratio fuit eorum, qui olim se in Belgio tolerari postulabant, & ista unica conditione Regi Hispaniarum miliones aliquot auri offerebant, qui libris varijs tuebantur, Tolerantiam ejusmodi divinis humanisque legibus licitam adeoque utilem esse Reipublicæ Christianæ. Et dispar longè fuit etiam oratio eorum, qui in Gallia olim tolerari petebant, & postulatum illud suum usque adeò justum credebant, ut armis etiam illud contra Principem & Dominum suum legitimum sibi adserere ausi fuerint. Neque est quòd hic Capellus dicat, se non loqui de quavis Tolerantia, sed de ea, quæ in eadem Ecclesia & communione est, qualem nunquam Belgæ aut Galli sibi concedi petierunt. Esto, ita sit; manet tamen eadem difficultas. Nam si idcirco iniquè postulat mendacij Doctor Tolerantiam, quia Religionis genius is est, ut qui fallitur, etiam fallat, quomodo jure postulabit Tolerantiam extra eam communionem? Postulabit enim, ut fallere sibi liceat extra communionem. At hoc nunquam ipsi postulare licet.

cet. Viden ut Tyrannidi sternatur plana via,
& damnentur omnes, qui unquam postu-
larunt tolerari se ab ijs, à quibus diversa
docebant? Sed videamus, quid de Secundo
membro dicat.

*Ergone potest jure concedi, quod iniquè postu-
latur? Potest sanè.* At si hoc potest concedi,
& quidem jure, quomodo verum est, quod
Thes. 42. dicis non minus universaliter:
*Nunquam debet concordia quæri cum hominibus
veritatis divinæ dispendio?* Hæc non conve-
niunt. Deinde secundò, sic contra te argu-
mentor: Nemo potest alicui jure concede-
re, ut porro fallere ipsi alios liceat, impri-
mis in rebus, ad fidem & pietatem spectan-
tibus. Ratio Majoris duplex est. Primò,
quia si non licet ei, qui imprudenter fallit
nisi perinjustè petere, ut porro sibi fallere
liceat, multo minus licet ei, qui scit alium
fallere, prudens sciensque concedere, ut
porro ipsi fallere liceat. 2. Quia alioqui
concedi jure alicui posset, ut alios, quantum
in se est, æternum perdat, quod absurdum
est. At qui concedit mendacij Doctori do-
cendi Tolerantiam, is concedat necesse est,
ut alios, quantum in se est, perdat: *Hic enim
est erroris in Religione genius, verba tua sunt,
ut qui fallitur, etiam fallat.* Conciliet hæc
Capellus, si potest. Neque juvabit eum, si
dicat,

dicat, Intentionem eius, qui concedit Tolerantiam, non esse, ut Doctor iste alios fallat; Intentio enim bona non sufficit ad hoc, ut jure aliquid fieri posse dicatur. 2. Nec intentio ejus, qui postulat tolerari, est fallere. Et si tamen hunc, non tantum injustè, sed perinjustè postulare dicis, ut fallere sibi liceat, quæ ratio est, cur illum jure concedere dicas, ut alios fallere ipsi liceat?

At in litibus certè potest quisque jure suo cedere, licet sentiat, id sibi per vim aut fraudem unquam eripi. At qui cedit alicui coactus, non rectè dicitur jure concedere id, ad quod cogitur. Deinde negotium Religionis & salutis proximi nostri non est jus nostrum, quo nobis cedere licet; sed jus Dei & proximi nostri, quorum interest, ut nunquam à nobis concedatur id, quod unius gloriæ & alterius æternæ saluti per se obest ac nocet. Alioquin nec Deum glorificamus, nec proximum nostrum servamus, quantum in nobis est, sed per nos aliquo modo stat, quominus illius gloria & hujus salus promoveatur. In litibus alia plane ratio est: in ijs cujusque jus proprium versatur. De jure autem suo quisque cedere potest, non tantum cum jus suum sibi ereptum iri videt, sed etiam volens ac sponte sua. Nemo enim sibi ipsi injuriam facere creditur.

Et

Et in litibus, qui de jure suo cedit, is tantum abest ut alteri, cum quo litem exercet, injuriam faciat, ut contra cedendo ipsi beneficium non exiguum præstet.

In negotio Religionis errantes considerari possunt, ut seducti, vel ut seductores. At hic jam mutatur Status Quæstionis. Quæstio enim instituta fuit de tolerando Doctore mendacij. At Doctor mendacij non recte consideratur, vel ut seductus, vel ut seductor. Quod si nihilominus id velit Capellus, ad rem tamen adhuc nihil dicit. Perinde enim est, siue Doctor aliquis consideretur ut seductus, siue ut seductor. Seductor enim non intelligitur à Capello, qui seducendi intentionem habet, sed qui re ipsa, etsi imprudenter, alios seducit. Quid autem ad rem facit, siue is primus sit erroris author, siue à primo seductus: Seducti enim non rarò seductoribus ipsis sunt pejores. Sed esto, sequamur confusum disputatorem, & expediamus, quæ sine ordine ullo dicta sunt.

Optimus quisque remotissimus est à suspitione, ac indubiò putat in meliorem partem omnia sumenda. Ita est. Utinam Capellus cum suis axioma hoc tam intelligeret practicè quàm theoreticè. Possunt, inquit, errantium etiam dotes esse, ut meritò credas, eos falli potius, quàm fallere.

At,

At Capelle, antea dixeras, *erroris in Religione genium hunc esse, ut qui fallitur, etiam fallat.* Quomodo hæc conveniunt? Sed esto; transeat etiam hoc cum cæteris. *Possunt, inquit, errantium ea esse dotes, ut speres, cum ijs intermoriturum errorem, nullo brevis Tolerantie damno.* Quis hæc confusa evolvat? De errantibus in genere loqui videtur, cum de Doctore erroris quæstio sit. De errorum qualitate ac discrimine nihil prorsus definit. Deinde de Tolerantia loquitur, sed quam præcedit promissum de non modò nō docendo palam, sed ne propugnando quidem Doctrinam. Age nos experiemur, an mentem ejus rimari possimus. Errantes, de quibus loquitur Capellus, vel errant errorem, qui cum fide & salute ipsorum errantium aliorumque aut consistere omninò non potest, aut saltem qui fidei & salutì ipsorum detrimentum adferre aptus natus est; vel errant errorem qui lethalis non est, aut qui nec errantis, nec aliorum, qui in eundem errorem incidunt, salutì per se noxius est, id est, quo stante, fieri nihilominus potest, ut ij, qui ita errant, credant omne id, quod necessario credendum est, ut Deo & Christo obediant atque ita salvi fiant. Si errantes primum genus erroris errent, dicat Capellus an statuatur, jure tolerari istos posse

L

&

& concedi ipsis, ut errores istos, aut habere, aut docere permittantur, sive semper, sive aliquamdiu, inter eos, qui tum suæ tum aliorum salutis sunt studiosissimi? Si affirmet, videat tum etiam atque etiam, utrum tolerari possit in communione Christi externa is, quem certum est membrum Christi esse non posse, nec salvari posse cum Christo, quamdiu in errore isto manet. Quotquot certè in externa communione Christi tolerantur, de ijs, saltem iudicio caritatis, statuendum est, quod sint vera Christi membra, ac proinde in statu gratiæ ac salutis posita. At de ijs, qui istos errores errant, id statui non potest. Neque verò caritatis nec prudentiæ Christianæ est, tolerantie limites usque ad taliter errantes, nedum ad eos, qui errata ista lethalia docent, extendere. Si Capellus neget, se de istis errantibus loqui, sed de ijs solis loqui se dicat, qui errant errores non lethales, id est, cum quibus fieri potest, ut quis sit verus Iesu Christi discipulus, & spem vitæ æternæ habeat; tum videat primò, quam ineptè egerit, cum ita generaliter ac consule de errantibus in genere loquutus est. Secundò, an non ineptius multò egerit, quod in dubium vocet & magno molimine disputet de eo, an tolerari possint, qui errant errores non
lethales

lethales, siue sint Doctores & Pastores, siue Discipuli & Oves. Quis enim pius aut pacis studiosus de eo disputet? Nec enim periculum ullum verum, aut ad seductores, aut ad seductos, ex erroribus aut errorum istorum doctiōe, ut ita dicam, redire potest, quando id tantum seriō inculcatur; errorem, quem is errat, aut de quo quæstio est, fundamentalem non esse. Hoc enim amuleto, si Ecclesia seriō fuerit instructa, cessat periculum seductionis. Deinde, ipsa libertas periculi omnis remedium est: Cum contra, si errores omnes ac singulos etiam minutissimos, qui errores tibi videntur, cum rigore tollere satagas, & in errantes seueris legibus ac conditionibus animadvertis, periculum non tollas, sed augeas: Fit enim ut decisionibus non necessarijs ingenia acriuscula irritata, odia intus alant, quæ non multò post in apertas factiones exeunt; aut si seueriter ac publicè reprimantur, in occulto virus suum disseminent, eruptura aliquando cum charitatis periculo ac damno. Nullius autem veritatis non necessariæ, nec valdè utilis, conservatio æquare potest iacturam ac detrimentum charitatis. Sed fortè de Erroribus agere se dicit Capellus nec præcisè lethaliibus, neque etiam

admodum levibus , sed de ijs , qui versantur circa veritatem , quæ utilis est, aut utilis saltem esse creditur ad verum Dei Christi-que cultum rectè exercendum & ad spem æternæ salutis in animis nostris fovendam. Esto. At nec circa hoc Caput difficultas tanta erat movenda. Statuendum ante omnia, tanquam indubium, erat, Tolerantiam eorum, qui circa utilia ista errant , sive seductores sint, sive seducti, per se licitam esse. Salvis enim necessarijs omnibus , nullius hominis salus in periculum adducitur. Deinde , quia tamen error omnis fecundus est, & , ut ut parvus in principio, magnos tamen errores de se non rarè parere solet, prudentia tantum opus esse dicendum fuerat , ut necessariorum omnium veritati benè caveatur, ne occasione erroris tolerati labefactari unquam possit, aut detrimentum aliquod pati. Hoc ubi factum fuerit, periculum contagionis cessabit, error paulatim sponte sua evanescet , & animorum concordia manebit sarta tecta. Alijs & severioribus molitionibus irritatur mali atrocitas, non sanatur. Sola pro necessarijs sollicitudo facit , ut saluti singulorum & omnium paci, ac libertati simul consuli possit. Fieri enim vix potest, quin ijs, qui in necessarijs consentiunt , si modò viri boni sint,

sint, quod semper præsumendum est, nisi contrarium appareat, in cæteris rebus omnibus, in quibus dissentiunt, terminos moderatos reperiant, intra quos lubentes volentesque compingi se sinant boni publici causa. Affectus dominantur necesse est, ubi turbatur ob alia, quàm quæ præcise necessaria sunt. Turbatur autem tum, cum quieti externæ adedò consulitur, ut libertati omni, etiam in rebus non necessarijs, pessulum obdamus: aut contra, cum libertati in universum ita indulgetur, ut nullis æquis moderatisque conditionibus eam frænari patiamur in rebus non præcise necessarijs. Soli caritatis & prudentiæ defectui tribuendum est, cū pax non colitur, ubi opinionum divortia circa res non necessarias nata sunt. Quis enim, si modò pius sit, non ad quaslibet pænè conditiones, conservandæ pacis gratiâ, adduci se patietur, si credat, non præcise necessarium esse, ut doceatur id, in quo ab alijs dissentit, & interim videat, libertati suæ vim nullam fieri? Næ aut improbus, aut perversus sit necesse est, quisquis ad quaslibet leges adduci se non patitur. Hæc pauldò prolixius dicenda putavi, quia video, Capellum in eâ esse opinione, ut libertatem dissentientiendi aut diversa docendi omnē

ex Ecclesiâ proscriptam velit, idque eâ solum de causâ, ut externa tantum tranquillitas & pax in Ecclesiâ non turbetur : & quia id unum agit, ut externæ quieri Ecclesiæ quovis modo consulat ; hinc est quòd tam sollicitè & tam operosè de modo tolerandi errantes, sive dissentientes, hic laborret, tanquam si scopus Christianorum unicus esse debeat, curare ut externè quovis modo benè ac tranquillè habeat Ecclesia. In quo vehementer non eum tantum, sed & multos Christianorum errare crediderim. Pax vera nulla est, quæ animorum consociatione non constat. Itaque sic paci publicæ consulendum est, ut libertati debitæ vis non fiat. Quin & ratio docet, tum demum optimè ac tutissimè consuli communi paci atque animorum concordia, cum libertati suus conceditur locus, solis prudentiæ & caritatis cancellis circumscriptus. Ubi libertas circa non necessaria omninò pellitur, ibi viget Tyrannis, ibi animorum vincula dissolvuntur, ibi suspicionum, odiorum, machinationum plena sunt omnia, & pro concordia verâ non nisi larva atque hypocrisis pacis ac concordia externæ colitur. Violenta enim sunt media pænè omnia, quæ eum in finem adhibentur : Violentia autem omnis generat odia: quicquid enim exprimitur

mitur grave est; unde fieri non potest, ut pax ista duret: malus enim diuturnitatis custos est metus, multò peior odium, imprimis quod premitur. Hæc si Capellus accuratè expendisset, non tam operosè ad questionem utramque à se propositam respondisset. Duo tantum dixisset, Tolerantiam in rebus, quæ præcisè necessariae non sunt, postulari & cōcedi jure posse dixisset, siue Doctor, siue Discipulus sit, qui eā postulat, aut cui ea conceditur. Deinde prudentiæ & caritati cetera omnia detulisset. Istarum enim duarum virtutum ope facilè est viam reperire mediam, quā libertati & paci simul consulatur, & confusio omnis atq; offensio vitetur. Non ivisset per tot ambages, per tot distinctiones; non tot cautionib⁹, tot conditionibus se & rem totam intricasset. Sed alia ipsi mens est; ut externam pacem in Ecclesia reperiat, tanquam unicum ferè bonum suum, libertatè dissentienti nullā in ea locū habere vult, nisi eam, quæ intra animā & conscientiam cujusq; propriam manet æterno silentio & silentij promissione circumvallata. Quod si verò hoc commodè & sine perturbatione obtineri nequeat, tum connivendum ad tempus, habendam esse rationem qualitatis & quantitatis personarum, ne aut immature, aut importune quippiam fiat, cum majore

periculo ac damno desideratæ illius quietis & tranquillitatis externæ. En hæc est Theologia Capelli circa Tolerantiam eorum, qui errare ipsi aut Ecclesiæ ipsius videntur in rebus non necessarijs ad salutem. Et huic convenit etiam Ecclesiarum ipsius praxis. Neminem dissentientem in ullo vel minimo Confessionis ipsorum articulo ferunt, si modo tutò eum punire possunt: alioquin serviunt temporì & scenæ: in Doctore verò aut Pastore non modò non ferunt dissensionis professionem, sed ne quidem dissensionis cogitationem. Si enim dissentire tantùm suspicentur, sive quia phrasibus istis non utitur, quibus ipsi uti consueverunt, sive quia argumentis quibusdam non utitur, quæ ipsis usitata sunt, sive quia cum singulari zelo bonorum operum necessitatem urget, continuò Quæstionibus, examinibus, obtrectionibus ei imminet, ut, quam libenter ipse celatam voluisset, dissensionem extorqueant, vel si tergiverfetur, ut veluti proditorem, qui per cuniculos suffodit veritatem, obruant: Nec eruditionis, nec pietatis, nec meritorum ipsius ratio habetur: quieti consulendum est: omne id, unde quies turbari aliquo modo potest, protinus in herbâ opprimendum est: Nemini parcendum, Tros
Ruti-

Rutilusve fuit. Pax Ecclesiæ externa suprema lex esto. Si oppressus pareat, bene quidem; gratia fortè illi fiet, sed eâ lege, ut seipsum libertate omni exuat & silentio æterno mancipet. Si non pareat, eo quòd rationibus se convinci non sentiat, aut alijs de causis, tanquam in contumacè animadvertitur. Si turbare pergat, ut tanquam in perturbatorem pacis & quietis ipsorum animadvertatur gladio, fasciculis, laqueo, vel carcere, operam dant. Atque ita quidem Reformati nostri Doctores suæ carnali quieti ac veritati, uti credunt, consulunt. Excusabilius, si Sententiæ eorum, à quibus discesserunt, subscriberent, id est, si crederent cum Pontificijs, Ecclesiam in eo, quod semel definivit, errare non posse, aut Reformationem suam tam exactam absolutamque esse, ut in eâ nihil unquam desiderari possit: Sed cum contrarium prorsus se credere profiteantur, equidem non modò malè in eo facere, sed longè Pontificijs deteriores esse censendi sunt, qui in omnibus ijs, quæ expresse ab Ecclesiâ definita non sunt, libertatem concedunt sanè liberam, nullo pacis aut concordie suæ damno ac detrimento. Sed ferè fit, quod Capellus Thes. 41. ait; *Nulli tolerantiam veritati negant insolentius, quàm qui tolerantiam*

tiam erroribus suis, sæpe pestilentissimis, postulaverunt obnixissime. Docuerunt id, inquit, olim Arriani. Sed non opus erat, ut tam longè abiret Capellus, docent id hodie (proh dolor!) Reformati, & cum ijs Capellus ipse. Notæ sunt humiles ac supplices ipsorum voces, Libelli & Remonstrantiæ non unæ, cum adhuc sub iugo Hispanorum & Pontificijs gemerent, ut Tolerantia ipsis concederetur, si non in eadem communione, saltem in eadem Republicâ; Nec sufficiebat tolerantia liberæ ac privatæ dissensionis, aut quæ intra parietes domus clauderetur, Tolerantia apertæ ac publicæ professionis postulabatur; quia sine eâ libertatem conscientia suæ salvam esse posse negabant. Et in Gallia nota est ipsorum oratio, cum res suas laborare vident, cum vel gratiâ vel auxilio regio opus habent. Conscientiæ & professionis libertas, prima & ultima panè vox est: At ubi ipsi rerum potentiuntur, ubi vires nacti sunt, ibi statim cum fortunâ mutatur ipsorum animus, tantò in alios ferocior, quantò antea visus fuerat humilior: Soli dominari volunt: libertatem conscientia tum se concedere dicunt, cum conscientiam cuique liberam relinquunt, & privatim cuique familiam suam instruere permittunt. Aliâ libertatem spon-

te

re suâ nulli sectæ concedunt. A quibus antea obnixissimè tolerari petierant, eos pellunt omnium primos. Si quibus libertatem concedant, id non nisi inviti faciunt, & majoris mali metu; quin et legibus adeò duris, ut, si eæ ipsis antea positæ fuissent, sub tyrannide gravissimâ se vivere clamaturi fuissent. Testis est una sola Geneva, ne plura alia nunc loca allegè, sed in Galliâ solâ subsistam: Nulli Sectæ in istâ urbe morari, imò nulli mortali istic domicilium figere licet, nisi qui eandem cum cæteris Religionem profitetur, idq; eorundem sacrorum communione testatum facit. Reliqui omnes, veluti profani & anathemate devoti Cananæi, Hitthæi, & Iebusæi, exesse jubentur. Et ex istâ urbe, veluti ex equo quodam Trojano, prodierunt pleriq; mortales isti, eorumque Axiomata. Et hinc idè in omnibus genius, idem omnes simul ardor agit, qui statim & ubiq; se prodit, ubi rerû summâ penes ipsos est. Quàm hæc sit deplorâda simul ac detestanda agendi ratio, mirû est eos nō videre. Nimirum, ne quid gravius dicam, dignos se reddunt qui eodem modo ubique locorum ab alijs tractentur, indignos, quorum querelæ audiantur, aut quorum supplicationibus fides habeatur, juxta Regulam, *Quod tibi fieri non vis, alteri ne feceris*. Neque tamen
cos

eos hæc ita interpretaturos spero, quasi ego alios in capita eorum concitem : absit à me tantum facinus: Non invideo illis favorem & fælicitatem mundi totius: tantum opto, ne ipsi eam invideant alijs, imò ne eam invideant sibi ipsis. Si tolerari velint ab alijs, ostendant saltem, se alios tolerare paratos esse ijsdem legibus, quas ab alijs sibi ferri postulant. Quid æquius? Si nolint; certè exemplo suo armant atque incitant alios contra seipsos. Neque verò hîc excipere jure possunt, se ipsam Veritatem docere, cæteros autem alios errare. In eo enim asserendo, quod veritatem doceant, fatentur ipsi, fieri posse, ut errent: Aut si id non fateantur, quis est, qui sibi non persuadet, se non errare? Nemo studio errare vult. Imò sunt, qui affirmant, se in eo dicendo errare non posse. Sed videamus, quid moveat Capellum, ut viam hanc sibi ineundam putet.

Non sunt, inquit, facienda mala, ut inde eveniant bona. Atqui, inquam ego, tolerare errantem aut errorem, qui in se tolerabilis est, malum non est. Imò contra, non velle tolerare errorem tolerabilem, id demum verè malum est, & dominatum ac tyrannidem sapit. Deinde, tolerare malum non est facere malum. Toleratur enim malum,

lum, cui tamen contradicitur, quod reprehenditur, quod taxatur: Non enim probat errorem, qui errantem tolerat, sed redarguit; ita tamen, ut propter errorem istum errantem non damnet, aut eum cætu suo indignum non judicet.

Nunquam tamen, inquit, concordia cum hominibus queri debet Veritatis divinæ dispendio. Rectè, cum necessariæ Veritatis dispendio queri non debet concordia: Concordiæ enim utilitas nullâ parte æquat necessariæ Veritatis damnum. Veritas necessaria tanti nobis esse debet, ut malimus amore mortalium omnium, quàm illâ unâ, carere: Salus enim æterna omnibus bonis præponderat. Attamen. 1. dispendium non patitur Veritas necessaria, cum toleratur error circa non necessariam Veritatem. 2. ne quidem dispendium patitur Veritas non necessaria, cum toleratur is, qui circa istam Veritatem errat: Manet enim Veritas, quæ antea erat, & manet libera illius professio; manet libertas contradicendi errori, eumque confutandi, salvâ animorum concordia: dissensio non adimit suum Veritati pretium aut decus. Denique. 3. Quid obstat, quo minus concordia queri possit aliquando cum dispendio Veritatis non necessariæ? Fieri enim potest, ut ex
Con-

Concordiæ rupturâ multò majora incommoda oritura sint, quàm fructus ex non necessariæ Veritatis conservatione sperari possit. Hoc casu quis non malit Veritatis istius præfractum patrocinium deferere, & errori non lethali cursum liberum dare, majoris boni consequendi aut plurium incommodorum evitandorum gratiâ, quàm importunâ ejus propugnatione se aliòsque in profundum multorum incommodorum barathrum præcipitare? Verum quidem est, nunquam licet cuiquam Veritatem abnegare, aut verum dicere id, quod falsum esse credit, & contra. Semper habendus est hic honor Veritati & Conscientiæ, ne unquam falsitatis turpitudine aut infamia maculetur. Neque unquam is honor errori habendus est, ut veritatis nomine decoretur. Sed aliud est errorem tolerare, aliud veritatem damnare. Aliud veritatis non necessarię defensionem non persequi præfractè, aliud eam improbare, & errorem contrariû probare. Qui errorem tolerat, ejusque cursum importunè non sistit, quando eum sine damno ingente sisti non posse videt, is errori non censentit, aut Veritatem non improbat, licet eam non propugnet eo, quo alioquin poterat, zelo. Prudentiæ hic actus est, non perfidiæ. Et quid agat Capellus, si
aliter

aliter sentiat? Neceſſum eſt ut dicat, concordiam coli non poſſe in Eccleſiâ cum ijs, qui Objectum Prædeſtinationis ſtatuunt hominem nondum lapſum, ſed increatum adhuc aut integrum; quia cum Veritatis divinæ, quam in Synodo Belgicâ & Gallica aſſertam eſſe credit, & à qua ſe ad extremû hilitum non diſceſſurum jam credo cum cæteris Gallis juravit, diſpendio fit. Deinde, neceſſe eſt ut dicat, concordiam coli non poſſe, cum ijs, qui ſtatuunt, actionem, qua Deus hominē efficaciter convertit, non eſſe niſi moralem, uti Camero alijque. Contrariû enim definiviſſe vult Synodum utramque, Belgicam & Gallicam. Tertiò, neceſſe eſt, ut dicat, concordiam coli non poſſe cum ijs, qui ſtatuunt, Remiſſionem peccatorum ſufficere ad Juſtificationem noſtri, & Imputationem juſtitie Chriſti activæ nõ eſſe neceſſariam ad ejus perfectionem. Hanc enim Sententiam ex Catecheſi Heydelbergenſi, quæ in Synodo Dordracena approbata eſt, expreſſè apparet erroneam eſſe: ut jam alia non allegem. Quid hîc dicet Capellus?

Ut ut ſit, ex hiſce, quæ prima hac Diſputatione ſua Capellus propoſuit, liquidò apparet, quid de tota Sequentē ipſius Diſputatione ſtatuendû ſit. Hypotheſis tantum ad Theſin applicetur. Theſis Capelli eſt, uti

ex

ex præcedentibus & imprimis ex Secunda Disputationis Thesi sextâ in terminis liquet: *Curandum esse Pastoribus Ecclesiarum ut ne quid novæ sordis contrahat Grex ipsorum atque ut quæ remanserunt Veteris fermenti sordes eluantur potius, quam ut novis detur locus.* Verba ipsissima Capelli sunt, Unde colligo, ubi vel metus, vel periculum novarum sordium est, vel ubi tutò veteres sordes elui possunt, ibi Doctores aut Pastores, qui sordibus istis polluti sunt, tolerandos non esse. Tota itaque Disputatio hæc uno Syllogismo comprehendi potuisset, cujus Major Propositio est: Veritatem tanti faciendam esse, ut non toleretur doceri quicquam, quo ea maculari potest. Minor Propositio: Arminij Doctrinam continere ea, quibus veritas divina maculatur. Sed noluit Capellus ita apertè Sententiam suam proponere. Multis ambagibus & prolixis primam Propositionem involvere maluit & tegere: Minorem autem mirificè exaggerare, ut speciosior videretur damnatio, & majoribus pluribusque nixa fundamentis. Quo tamen ipso Disputationem totam sequentem, quam inscripsit: *Satiusne fuerit, Doctrinam Arminij tolerari, quàm damnari:* ineptissimam reddidit, & quidem multis modis. 1. Quia si vera est Propositio illa

Capelli,

Capelli, tum profectò ineptum est, postea adhuc quærere, an satius fuerit tolerari, quàm damnari Doctrinam Arminij. Assumenda tantùm erat Propositio minor, & probanda; Inde enim Conclusio necessariò sequitur. Tantùm autem abest, ut hoc Capellus fecerit, ut contra præpostero planè ordine quæratur: *Satiusne fuerit damnari, an tolerari Doctrinam Arminij*, postquam jam assumsit, Arminij Doctrinam non tantùm continere ea, quæ falsa sunt & veritatem maculant, sed etiam per quæ fundamentum Religionis Christianæ convellitur, id quod toties antea & disertis plane verbis Thesi decimâ Disputationis Secundæ asserit. Si enim toleranda non est vel ista falsitas, quia Doctrinæ veritas maculatur, quomodo rectè quæritur, an tolerari potius debeat, quam damnari ejusmodi Doctrina falsa, quæ ipsum fundamentum Religionis convellit? Hoc enim est quærere, an damnari potius debeat, quàm tolerari id, quod prorsus intolerabile est judicio ipsius Capelli. II. Quærit hoc postquam jam ante asseruerat, Doctrinam Arminij eas hereses reipsa continere, quæ olim in Concilijs quamplurimis à veteribus Orthodoxis damnatæ fuerunt, & quas jure merito damnatas esse vult, non tantùm tanquam falsas, sed tanquam intolerabiles,

M

puta

puta heresin Anthropomorphitarum & Pelagianorum. Atqui quis non judicet, ineptè ab aliquo quæri, an satius sit, hanc aut illam Doctrinam tolerari, quàm damnari, qui jam ante asseruit, Doctrinam illam olim jure optimo in diversis Concilijs Nationalibus & Provincialibus, ut intolerabilem, damnatam esse? Imò quis non quæri id ineptè judicet ab eo, qui credit & profitetur, Pastorum officium esse, ut sordes potiùs omnes arceant atque expurgent è grege suo, quàm ut ullas seu veteres seu novas doceri tolerent? Posito enim, quòd omninò Capellus non dixisset, Arminij Doctrinā continere ea, per quæ fundamentum Religionis Christianæ convellitur, aut quæ olim in Concilijs antiquioribus damnata sunt, sufficiebat si assumisset tantum, eam falsa & erronea continere; quia satis est Capello ad hoc, ut Doctrina aliqua doceri non permittatur in Ecclesiâ, quòd ea falsa sit. Omnis enim falsitas Capello noxia est, quia sordes continet in se gregi inficiendo, quæ eluendæ potiùs sunt, quàm tolerandæ. Hoc autem ita esse, colligo ex ipsis Quæstionis terminis, quos Capellus format. Quærit enim, an tolerari satius fuerit Doctrinam Arminij, quàm damnari. Tolerari itaque & damnari opponit, non autem tolerari

tolerari & non tolerari. Vult itaque, Sententiam, qualiscunque tandem ea sit, si tanquam falsa damnetur, tolerari non posse nec debere. Nam si falsum aliquid esse & tanquam falsum damnari posse credidisset, quod nihilominus tolerabile esse & re ipsa etiam tolerari posse sensisset, ineptè opposuisset tolerari & damnari. Neque verò per damnari intelligere potest damnari non ut falsum, sed ut intolerabile. Tum enim absurdissima nihilominus esset *Quæstio*, An satiùs sit, Doctrinam Arminij tolerari, quàm damnari, ut intolerabilem? Si enim intolerabilis non erat, quo jure quæritur, An satiùs fuerit damnari eam, ut intolerabilem, quàm tolerari? Si intolerabilis erat, quomodo non absurdè quæritur, An satiùs fuerit eam tolerari, quàm damnari? Ex Labyrintho hoc non video quomodo se Capellus possit expedire. Videtur quidem aliquando judicare, Sententiam Arminij tolerari potuisse, & ita loquitur hîc illic, ut non omninò tolerantiam omnem damnare videatur: Sed si quis ea, quæ alibi dicit, cùm ex professo de Tolerantiâ agit, cum ijs conferat, fateri cogetur, Capellum aut sibi non constare, imò sibi ipsi imprudenter contradicentia loqui, aut studio hîc illic diversa quædam dixisse, ut

mentem suam regeret, &, si fortè premere-
tur effugio locum statim reperiret, aut si
eadem & consentanea dixit, sub involucro
ambiguitatum latere voluisse. Ita cum Thesi
12. Disput: secundæ ait: *Omninò Belgæ po-
tuisſent eam, ut in alijs, sic in Arminio tolerare,
ſi ſimpliciter eam in medium protuliſſet Armi-
nius, ut Melanchton in Locis Communibus;* vi-
detur utique tolerantiam docendi concede-
re. Sed ſi quis ea cum Diſputatione totâ
præcedente, & cum Thesi ſextâ hujus Di-
ſputationis alijsque conferat, neceſſum eſt
ut credat, Capellum aut planè contraria ſibi
dixiſſe, aut iſtis verbis talia quædam dicere
voluiſſe, quæ revera nihil minus, quàm to-
lerantiam concedendam eſſe arguunt. Ete-
nim incertū eſt, utrum Capellus de totâ Ar-
minij Sententiâ, an de Sententiâ ejus ſolâ
circa objectum prædeſtinationis loquatur,
2. Incertum eſt, quomodo Capellus credat,
Melanchtonem de re hac tota locutum eſſe.
3. Incertum eſt, quid illud ſit in medium
proferre, & quid ſimpliciter in medium
proferre; utrum iſſdem verbis, an æquipol-
lentibus efferre, vel tantū proferre in me-
dium in Conſiſtorio, in Claſſe, in Synodo,
an etiam in ſuggeſtu pro concione, in Scri-
ptis librîſque publicis, & an ita, ut nemo
ferè intelligat mentem proferentis; an verò

ut

ut quilibet eam intelligat, & de veritate ejus
 persuasus esse possit: Denique, quid illud sit
 tolerare ut in alijs; qui enim sunt isti alij?
 An Doctores & Pastores, an verò privati?
 Si Doctores & Pastores; ubi tolerantur Do-
 ctiores ejusmodi, & quomodo? Si privati;
 quid Tolerantia ista cum hac, de qua agitur,
 habet commune aut simile? Certè, si pro-
 prius omnia hæc explicaret Capellus, tum
 demum constaret manifestè, quàm aut dissi-
 militè sibi ipsi, aut callidè & rectè hæc di-
 xerit. His adde, quod cum de tolerantia
 loquitur hac Disput: Secunda, ita de ea lo-
 quatur, tanquam si per tolerantiam intelli-
 geretur dissoluta quædam & incircumscri-
 pta licentia, qua cuique liceat impunè sen-
 tentiam adversariam vellicare, traducere,
 insectari, respuere, & acerbè damnare, uti
 apparet ex responsionibus ipsius, quas
 Thesi ultima Disputationis prioris & The-
 sis 3. 4. Disput: posterioris facit. Quo
 quid ineptius? Quis enim, qui ullo, vel Dei
 vel proximi amore vel salutis propriæ desi-
 derio tangitur ejusmodi licentiam aut sibi
 dari cupiat, aut alijs concedat? Quid foret
 Ecclesia aliud, quàm forum litigantium?
 Quid ambones & cathedræ, quàm arenæ
 gladiatoria? Quid cætus Christianorum,
 quàm pugilum & luctatorum circuli? Quis-

quis tolerantiam sibi & alijs concedi cupit, is eam nullo alio fine concedi cupit, quàm ut pax fraterna tantò sit certior, tutior & diuturnior in Ecclesiâ. At quisquis istum agendi modum, istam effrænem licentiam postulat, is finem istum sibi propositum habere non potest: nihil enim est, quod ad turbandum pacem & concordiam, animosq; in se mutuò irritandos efficacius est, quàm vaga ista & incircumscripita contradicendi licentia. Patietur itaq; facilè circumscribi libertatem istam cancellis justitiæ, ne in licentiam degeneret. Lubens abstinebit ab omnibus istis agendi modis, quibus jure offendi frater possit, & ut ab ijs idem abstineat facilè impetrabit: Sententiam suam dicet modestè, & cum præfatione licite amicęque dissensionis; utque idem alius faciat, haut invitus permittet: planè uti in explicationibus varijs locorum Sacre Scripturę fieri solet apud Reformatos, & apud Catholicos in omnibus, quæ ab Ecclesiâ præcisè definita non sunt. Et hoc cum facit, quis, quæso, offendetur? Quis non gaudebit tam placidâ animorum consensione in medijs Sententiarum diffidijs? Quis non excitabitur in amorem liberum veritatis? Quis non cum voluptate ponderabit, quæ hinc inde cum summâ modestiâ adferuntur, rationum momenta?

menta? Et ut ut hisce vel illis ad sensum præbeat, quis propterea vel hilum minus amabit eum, à quo dissentiet? Christianus animus ita comparatus est, ut adversarius sententiâ multis esse possit, inimicus nemini esse velit.

Dissentire bonos etenim de rebus iisdem,

In columi licuit semper amicitia.

Denique ineptè movit hanc sententiam Capellus: Videri enim vult veri studio potissimum ductus examen ejus instituere, cū aliam causam subesse vel cæcus videat. Nempe damnata jam erat Sententia Arminij, non tantum tanquam falsa, sed etiam tanquam intolerabilis, & damnata solemni-ter in Conventu tali, in quo Calvinisticarum Ecclesiarum calculi ut consentirent, laboratum fuerat. Gallicæ Religionariorum Ecclesiæ damnationem jam factam juramenti inusitati religione firmaverant: Damnatio ipsa, & quod eam secutum est schisma, proscriptionibus, edictis, persecutionibus, cede denique ac sanguine oppressorum sancitum erat. Princeps Sedanensis damnationem factam ratam esse voluerat, & jam locis suis moverat, quibus damnata et triumphata Sententia non omnino displicebat. Principis jussibus hac in re non obliturum Capellum, facile erat colligere: quippe qui ante damnationē factā Collegā

suum D. Tilenum, quem in partes Arminij
 jam concessisse certum ipsi erat, Orthodo-
 xum ex cathedrâ pro concione renunciare
 non dubitaverit, nulla alia ratione addu-
 ctus, quàm quòd Princeps ita vellet jube-
 retque. Post hæc omnia credimusne Ca-
 pellum, studio veritatis adductum, Quæ-
 stionem hanc disputandam proposuisse, &
 quidem quæstionem, quæ tota facti est, de
 quo ipse nihil, nisi per rumorem aut fa-
 mam accepit, & de quo rectè judicare ipsi
 impossibile fuit, nisi intelligeret arcanum
 Reipublicæ, unde tota hæc Quæstio ortum
 habuit? Et quæ subesse causa, alia potuit,
 inquires? Nempe calculus Academiæ Seda-
 nensis deerat adhuc, ne alio quàm commu-
 ni omnium Calvinistarum suffragio Senten-
 tia Remonstrantium damnata videretur: ut
 suum adjicerent Ecclesiæ Gallicæ, Syno-
 dum Dordracenam, cui per imperium re-
 gium interesse non potuerant, in mediâ
 Galliâ, sub ipsis Regis oculis, totidem ver-
 bis ac syllabis Sententiam dicere jusserant,
 & novo atque inusitato juramento defe-
 ctum juramenti sui Dordraceni suppleve-
 rant. Non poterat Academia Sedanensis,
 in meditullio cæterarum sita, acclamatio-
 nibus tot ac tantis PSEPHISMÒN suum de-
 negare: Celeusmate igitur illustri opus
 fuit,

fuit, quo id toti mundo testatum fieret. Hoc Capellus edidit Academiæ nomine. Atque ita PANTES ΕΡΕΥΡΗΜΕΕΣΑΝ Α-
ΧΑΙΟΙ.

Sed quicquid sit hac de re, videamus, quomodo quæstionem hanc propositam tractet. Nulla adfert argumenta, quibus alteram Quæstionis partem adstruat. Tantum objectiones quasdam sibi ipsi solvendas sumit, quas alicujus momenti esse credidit; sed quas plerasque ita frigide ac dilute proponit, ut eas facillime, aut pro causa sua utiliter solvi posse crederet. Nos illum argumentis novis non urgebimus, neque adstringemus fortius quæ proposuit: scimus enim frustra nos laboraturos. Nec enim verisimile est, eos, qui in Synodo Dordracenâ & jam in Alezianâ & Charentonenfi tam solemniter damnarunt Remonstrantes, unquam in gratiam cum ijs redituros, nisi legibus ijs, quas iniquas & conscientijs suis intolerabiles censent Remonstrantes; aut si omnino vellent, eos, qui tam iniquè damnati sunt, unquam cum damnatoribus istis sese conjuncturos, nisi in docendo, judicando, agendo, vias longe moderatiores eos inire videant, à quibus hodie eos tam sunt experti alienos, quàm qui sunt alienissimi. Gaudet Remonstrantes

se Deo, Conscientiæ, & Patriæ suæ satisfecisse, quòd quamdiu cum ipsis uniti vixerunt, morbos eorum ut curarent, pro virili operam dederint. Sed quia curari noluit Babylon, quia medicinam respuit, & in eos, qui medicam manum porrigebant, crudeliter sævijt, & sævire quotidie non desinit, valere eam jubent, & ut res suas sibi habeat, ex animo optant. Gratulantur sibi de accepto repudij libello, & Deo gratias agunt in dies, quod oculos ipsorum aperuerit & magis magisque aperiat, ut videant atque experiantur in seipsis, quibus cum mortalibus uniti antea fuerint, & quàm felices sint, quòd à morbido isto grege separati sint: Anima eorum nunquam deinceps veniat in confessus eorum, in quibus tam crudelia & sanguinaria consilia agitari vident, quæ vel Barbari detestentur; In quibus doceri, foveri rebellionem contra legitimos Dominos, cedere & sanguinem contra innoxie errantes suaderi, Dominatum & Tyrannidem in dissentientes stabiliri, certissimis documentis atq; experimentis persuasi sciunt. In quibus bona opera commendari & mala reprehendi nõ nisi dicis causâ edocti sunt; quippe cum in ijs bona adeoque optima nihil prodesse; mala adeoque pessima Electis nihil obesse doceatur: Denique

nique in quibus libertas omnis proscripta, moderatio omnis conculcata jacet, & schismati, seditioni, non necessarijs bellis, oppressioni eorum, quos consilijs suis schismaticis obstare, aut non favere vident, opera datur: In quibus scelera, flagitia, privata, publica, fanda nefanda aut exculantur, aut teguntur, quando ea solum pro salute Ecclesiæ ipsorum aut patrata sunt, aut patrata videri possunt. Hæc faciunt, ut hiatus, qui jam factus est inter hos, magnus sit adeò, ut qui apud hos sunt ad eos redire, & qui apud istos sunt ad hos venire aut non possint, aut non velint. Quod cum ita sit, non afferemus ergò argumenta nova, quibus probem⁹ satius fuisse tolerari, quàm damnari Doctrinam Arminij. Quorsum enim id nunc faceret? Tantum examinabimus, quid ad argumenta, quæ sibi Capellus ipse objicit, respondeat, ut appareat, quàm parum consideratè & solidè Quæstionem hanc tractaverit, & quàm parum intellexerit istarum rerum, quæ ad Quæstionem hanc rectè tractandam scitu necessariæ erant.

Argumentum Primum hoc facit;
Optimi quique censent tolerandos Lutheranos. Ergo multo magis Arminianos tolerandos esse, censere debent: Ratio est. Quia
Armini-

Arminiani non per omnia, sed in quibusdam tantum consentiunt cum ijs, quæ damnantur in Lutheranis.

Ad hoc argumentum respondet hunc in modum: *Valeret hujus Argumenti consequentia, si cætera, aut utrobique paria essent, aut ejusdem generis esset tolerantia, quam flagitat Arminij schola, cum eâ, quam Ecclesiæ nostræ concedunt aut offerunt Lutheranis.*

Responsio hæc obscurior est, quàm ut primâ fronte intelligi possit. Nec enim distinctè proponit, quomodo cætera utrobique paria non sint, & quomodo non sit ejusdem generis Tolerantia: Ex sequentibus colligi id necesse est. Nos elucidabimus Responsionem. Disparitatem primo facit Capellus in genere Tolerantiæ. Est enim secundum ipsum Tolerantia quædam, quæ extra Ecclesiam est; quædam, quæ intra Ecclesiam est. Illa est, quâ alius alium tolerat in separatâ communione. Hæc, quæ alius alium tolerat in eadem communione. Prima Tolerantia locum habet, uti vult, inter Calvinistas & Lutheranos: At de secunda quæritur. Hæc est, distinctio illa, quæ argumentum hoc validum elidere hætenus conati sunt schismatici in Belgio, & quâ nunc idem tentat Capellus. Operæ pretium est, ut quid ea solidi in recessu habeat, exami-

examinemus. Tolerantia extra Ecclesiam in separatâ communione, aut est tolerantia, quâ quis aliquem tolerari posse credit in eodem Imperio, Regno, Principatu, Repub. Civitate, Oppido aut Pago: uti, Ex. gr. Tolerantia, quâ Lutherani & Calvinistæ tolerantur in Germaniâ, ac quâ Lutherani, Calvinistæ, Papistæ simul tolerantur, ut Dantisci; quâ denique omnis generis Sectæ tolerantur, ut in Polonia: Aut est Tolerantia, quâ quis aliquem tolerari posse credit in diversis Regnis, Principatibus, Rebuspublicis, Civitatibus, Oppidis aut Pagis: ut Ex. gr: Tolerantia, qua Græci, qui in Oriente sunt, Latinos, qui in Occidente sunt, tolerant: quâ Calviniani tolerant Lutheranos, qui in Saxonia sunt, & isti Calvinianos, qui Genevæ sunt. Quando itaque Capellus dicit, tolerari potuisse Arminianos, uti Lutherani tolerantur, explicandum fuerat, quomodo tolerari eos potuisse intelligat; an isto genere Tolerantiæ, quo, Ex. gr: Latini tolerant Græcos, ut longè ab ipsis in Oriente ex animi sui Sententia & legibus ac ritibus suis vivant; & quo Genevenses tolerant Lutheranos, ut ij in Saxonia Cætus suos habeant: An verò illo Tolerantiæ genere, quo Ex. gr: Rex Poloniæ tolerat Lutheranos, Calvinistas &c. & quo
in

in Belgio Ordines tolerant Lutheranos , ut in ijsdem Civitatibus, uti Calvinistæ, seorsim cætus suos faciant. Si primum genus Tolerantiæ intelligat Capellus, tum ex ipso sciscitari lubens velim, quodnam illud genus Tolerantiæ sit? Tolerare enim ita potest quis alterum diversas ob causas: Vel quia existimat, Principi cuique jus esse in suo territorio Religionem talem permittendi ac sancienti, qualem vult, & alteri fas non esse, jus illud suum Principi ereptum ire. Vel quia id quidem illicitum esse non putat, sed tamen adeo periculosum, sive cum tanto periculo ac difficultate conjunctum, ut satius sit tolerare, ut Religio erronea sub Principe isto vigeat, quam ut ejus cum Principe extirpandæ causâ in periculum manifestum se suosque conjiciat: Vel quia existimat, suam cuique Religionem liberam concedendam esse, ac proinde illicitum esse eum, quem quis errare credit, vi cogere ad errorem deferendum, aut eam, quam credit veritatem esse, suscipiendum: Vel denique, quia existimat eam, quam tolerandam censet, sententiam talem esse, quæ sine salutis damno aut periculo tolerari potest. Si prius se intelligere dicat Capellus, quæ ista, obsecro, foret Tolerantia? Certè, qui in alterum

jus

jus nullum habet, is eum tolerare dici non potest. Si Secundum, ista Tolerantia non liberâ voluntate, sed invito, ac tantum non reluctante animo concederetur, & desineret simul atque cessaret periculum. Si Tertium, tum velim rationem ullam justam mihi det Capellus, cur non in eâdem civitate, oppido & pago Tolerantia eadem legitime concedi possit ac debeat. Si enim illicitum est vi errorem impedire, aut errantes ad deferendum errorem violentia vel armis cogere; utique si contingat, errorem aliquem in civitate, oppido, aut pago grassari, ratio postulat, ut error iste toleretur & à vi omni contra errantem abstineatur. Et hoc uno fundamento Rex Poloniæ nixus tolerat in Regno suo diversi generis sectas: Et non pauci Magistratus in Civitatibus, oppidis & pagis suis, non tantum diversas ejusdem Religionis Sectas, sed ipsos etiam Iudæos, juratos licet Christianæ Religionis hostes, tolerant; quod Religionis non sit religionem cogere, & quod tyrannidis apex sit, animis & conscientijs hominum imperare velle, uti corporibus & linguis. Si verò ad hoc accedat Quartum, quod videlicet Tolerantia hujusmodi concedatur, quia id, quod tolerandū censetur, tale est, quod in se etiam reipsa
tole.

tolerabile est, tum nulla iusta ratio est, cur
 duplex Tolerantiæ genus statui debeat.
 Quid enim obstat, quo minus tolerantia,
 quæ jure concedi potest in ijsdem Regnis,
 Rebus publicis, Civitatibus, Oppidis & Pa-
 gis, non etiam pari jure concedatur in ijs-
 dem Ecclesijs, in ijsdem Templis, in ijsdem
 cætibus, in eadem communione? Exempla
 multa in contrarium allegat Capellus: Sed
 exempla non faciunt regulam. Non enim
 quæritur, quid fiat, sed quid rectè fiat, &
 quid jure fieri possit. Detur ulla ratio suffi-
 ciens, cur error, qui tolerabilis est, & qui
 in eadem civitate, in eodem oppido tolera-
 tur, non etiam in eadem Ecclesia, in eodem
 cætu, eadem prorsus ratione tolerari possit?
 Nulla alia dari potest, neque Capellus ipse
 aliam ullam dat, quàm *quia Veritatis & Re-*
ligionis puritas non tam certò tutòque conserva-
ri potest, si juxta eam in eâdem Ecclesiâ doceri
permittatur error, quàm si non permittatur. Et
quia periculo errandi non tam commodè potest
occurri isto, quàm hoc casu. At verò, inquam
 ego, ratio hæc non sufficit. Primò. Quia
 majoris illius & non necessariæ ad salutem
 puritatis conservandæ spes æquare nullo
 modo potest periculum, quod ex separatio-
 ne oriri potest, ac pænè necessariò oritur,
 nimirum caritatis & benevolentiae mutue
 inter-

internecionem. Separatio enim, quæcunque tandem illa sit, raro stat intra mentem atque intellectum: uti ex odio aut ægro animo ferè gignitur; ita odia alia ex alijs solet post se trahere. Nimirum ne leviter aut sine gravi causâ facta videatur, quæruntur primùm colores pingendæ ruptionis necessitati; ut quæ primùm non nisi majoris alicujus commodi gratiâ facta videbatur, non multò post necessariò propter salutis periculum fieri debuisse credatur. Et postquam aliquamdiu in partibus constiterunt animi, alienatio gignitur, per quam fit, ut vulneris inflicti labia tractu temporis tam longè à se invicem disjungantur, ut consolidari postea vix possint. Statur itaque in pertinacibus odijs, &, quibus illa veluti foliis accenduntur, litibus, jurgijs, partiumque studijs. Quisque pro sua parte contra dissentientem contendit tanto animo, tanto zelo, tanquam si in damnationis certissimum periculum se præcipitaret, qui transit ad alteram. Hinc fit, ut pars una alteram, quibus potest, modis maculare studeat, quo eam invisam reddat & transitionem impediat; usque adeo ut tandem spes reconciliationis omnis planè decollet. Colloquia, si quæ deinde fiunt reconciliandis animis, illa ferè sunt suspecta, acris

N

&

& ambitiosa, in quibus victoria potius, quàm veritas quæritur. Vnde fit, ut ex ijs plus incommodi fere ac mali, quàm fructus percipiatur. Et fieri aliter vix potest, ubi semel dissoluta est animorum compages, & ruptum caritatis vinculum. Quis cum hisce tam ingentibus incommodis unius non necessariæ veritatis conservandæ spem conferendam esse putet? Certè periculum perdendæ caritatis longè gravius pio cuique videri debet, quàm est periculum perdendæ non necessariæ veritatis. Caritas enim præcisè necessaria est, ut salvemur: at puritas major ad salutem præcisè necessaria non est. Secundò. Quia Tolerantia in eadem communione medium est multò tutius commodiusque, quo errori occurratur, & veritati tum stabiliendæ tum propagandæ consulatur, quàm Tolerantia in communione separatâ. Ubi enim Tolerantia in eadem communione habet locum, ibi animi, quoad vinculum principale, manent conjunctissimi, ibi colloquia sunt blanda, familiaria, amica, fraterna, ibi non metuuntur lites periculosæ, quia liberæ, quia publicæ sunt, & utrinque creditur, non obstante opinionum divergio, salvam semper manere unionem circa illam veritatem, à quâ unâ fides, spes & caritas Christiana depen-

dependent. Quod si omninò fiat, ut ex collationibus graves oriantur rixæ, aut incommoda quædam ingentia oritura metuantur, formula concordiz tutius faciliusque reperiri potest, integro adhuc, quàm rupto semel unionis vinculo. Quod si denique ne reperiri quidem possit concordiz formula propter ingeniorum affectuumque dissimilitudinem, aut quòd pars utraque conscientiz suæ interesse putet, ut puritati Veritatis conservandæ optimam operam navet; nihilominus tamen separati cætus fieri poterunt, salvâ communione principali, quæ circa veritatem necessariam est. Quid enim obstat? Exemplo nobis est Ecclesia Iudaica. Multæ ibi Synagogæ & diversæ; multi cætus & non levia inter eos dissidia: unum tamen templum, eadem sacrificia, ijdem ritus, idem cultus. Quid impedit, quo minus Christiani hoc exemplum sequantur? Nullum majus periculum his est metuendum, quàm istis. Nec aliud speciosius velum habent Christiani, quo immania sua divortia tegant, quàm Iudæi. Nam si eadem inter ipsos fundamentalis veritas viget, si eadem Religio, eadem spes, eadem salus, quid vetat, eos in eadem communione manere conjunctos, &

interim cætibus disseparari, pro judiciorum circa non necessariam veritatem varietate? An pro veritatis non necessariae incolumitate ita in partes eundum, aut in partibus consistendum est, tanquam si salus, fides, Religio tota Christi in discrimine præsentis versaretur, nisi id fiat? An Christianus Christianum propter non necessariam veritatem Regno, Principatu, Civitate, Oppido aut territorio suo prohibebit, quum eum consentire credat secum in eâ veritate, per quâ Deo conjunctissimus est, per quam divinæ gloriæ hæres est, & per quam æternum cælestis civitatis jus habet, eodemque domicilio cum Deo & sanctis omnibus Angelis fruatur? Quanto satius facerent, si profiterentur unionem suam signo aliquo concordiae circa necessariam veritatem, uti separatos catus faciendo dissensionem suam profitentur circa veritatem non necessariam? Utrique non necessarium tantum, sed & valdè utile hoc foret. Necessarium; ut animorum conjunctio isto signo, veluti glutine aliquo subinde firmaretur. Utile, ut ne æquo plus augerentur Sententiarum discrimina, tanquam si ea circa ipsa ad salutem necessaria capita versarentur. Scio hanc rem difficilem esse factu & fortè importunum esse consilium hoc tempore, quo Christiani,

qui

qui cætibus tantum separati sunt, & interim circa Veritatem necessariam consentiunt, tam longè, tam inimiciter à se dissident, tanquam si capitales hostes essent, qui in mutuam internecionem conjurârunt. Scio etiam hanc rem non carere incommodis ac difficultatibus, quæ sine dubio plerisque graves videntur, inter quas hæc etiam una est, quòd hac viâ Cætibus innumeris ostium latum panderetur, atque ita cætuum separatorum, nec modus, nec finis esset futurus. Sed ex alterâ parte scio, longè plures difficultates positas esse, si videlicet Christiani dissensionem suam profiteantur in non necessarijs, &, cum in necessaria Veritate consentiant, consensionem suam nullo signo concordia testari velint. Multa inde & pleraque mala videmus nasci, quæ hodieque Christianos precipuè turbant. Atque his omnibus occurrì posset, meo judicio, si Christiani se mutuo in eâdem communione tolerarent, omnibusque caritatis officijs sibi invicem juncti manerent; quamdiu alter alterum errare non credit, nisi circa non necessariam veritatem. Hoc si fieret, ita me Deus amet, respirare inciperet nonnihil Christianus orbis, post tot tristes plagas, post tam immania vulnera, post tam diras

distractiones, tam acerbæ, tam pudendas, tam funestas secessiones dicam an factiones? Non audirentur tam futes, tam inanes, tam noxiæ veritati simul ac pietati lites inter tam pacifici Magistri discipulos. Non personarent ambores, cathedræ, pulpita tot factiosis concionibus; non complerentur compita, trivia tot procacibus disterijs, tot infamibus scriptis, quibus, tanquam aculeatis mucronibus atque infestis unguibus, magis magisque in dies discerpuntur ac distrahantur inflicti vulneris labia: Non impeterentur tam profanis, tam obstinatis, tam diris convitijs, probris ac contumelijs, qui errare creduntur, atque interim vitam sine labe, sine maculâ ducunt: Nec tam furiosè errores omnes damnarentur, tanquam si omnium articulorum par & æqualis esset necessitas: In vitia, in peccata, in scelera accuerentur odia; in peccatores, in profanos, in litigiosos, rixosos, in pacis osiores, eosque quos Deus ipse regno suo excludit, linguæ & calami nostri exercerentur. Hos Societate nostrâ indignos judicarem, in horum insectatione, reprehensione, castigatione palmam alter alteri præreptum iremus, ut obtinere possemus encomium illud à divino Spiritu: *Novi opera*

opera tua, & quod non possis ferre malos.

Atqui, inquit, Capellus, *Pastoris est curare, ne quid sordium contrahat grex suus.* Rectè. curet id Pastor; sed videat, ne, dum errantes non tolerando sordes errorum à Grege suo arcere vult, odiorum aliorumque affectuum carnalium erroribus longe pejorum sordes animo eorum per factiosas secessiones suas injiciat aut obrepere sinat. Purget sordes, sed ne novis ac majoribus sordibus. Veræ sordes Gregis sunt peccata, non errores innoxij. Dissensio talis non inficit gregem lethaliter; sed odium dissentientium. Hoc vitium, hoc malum ante omnia curet ut à grege suo arceat: ut autem non erret Grex suus, doceat, instruat, erudiat, corrigat errantem, cum omni lenitate, quâ secum agi cupit: ostendat errorem, persuadeat veritatem, quantum in ipso est: invitet, alliciat, trahat ad se argumentorum & rationum vi dissentientes: ne alienet aut exasperet eos importunâ aut non necessariâ separatione, quamdiu in ijs pietatem, Dei timorem, & Christi Spiritum locum habere videt: Si errantem ab errore suo liberare hac ratione curaverit, officium fecit. Si revera ab errore liberavit, habet quod Deo gratias agat, & proximo suo gratuletur:

sin minus, nihil est, quod aut sibi, aut proximo suo metuat; dummodo is Dei timens sit; dummodo à vitijs, à peccatis, ab odio, alijsque pravis affectibus immunem eum præstet. Vti persuasa Veritas eum salvatura non fuisset; ita non persuasa nihil officiet saluti ipsius: hoc pacto conscientiæ suæ & paci communi consuluerit.

Atque hac quidem ratione responsioni primæ Capellanæ satisfactum abundè credo. Cæterarum responsionum, quæ ex eâ dependent & multis deinde Thesis deducuntur, infirmitas, imò vanitas nullo negotio ex his, quæ jam dicta sunt, animadverti potest. Dicam tamen pauca quædam ad singulas, ut magis pateat veritas. Objectionem itaque secundam hoc pacto format:

Non postulamus, inquiunt, ut in eodem Templo pugnantiæ doceantur; sed ut cuique suum assignetur templum. Quasi dicat: Tolerantia itaque, ex mente mea, in diversis templis concedi potest: & aliam non postulant sibi Remonstrantes, cur itaque illis ea non conceditur?

Hic nota, falsum prorsus esse, quod Capellus Remonstrantibus tribuit. Nunquam postularunt illi, ut suum cuique templum assignaretur: nunquam consuluerunt, ut id fieret. Schisma hoc sapiebat, à quo illi omnino

ninò adhorrebant, & quod toto animo sèper
 averfati sunt. Aliorum hoc fuit, seu Postu-
 latum, seu Consilium, & quidem non eo
 fine atque animo datum, ut schisma sancire-
 tur, sed ut schismati, quod Remonstranti-
 um adversarij moliebantur, & jam grassari
 incipiebat, hac ratione occurreretur, & ut
 conscientijs multorum, pacique & tranquil-
 litati publicę aliquatenus consuleretur. Oc-
 casio hæc erat: Calviniani multi è plebe
 promiscuâ, seu proprio, seu alieno instin-
 ctu, vel zelo, seu rerum novandarum studio
 (plerique enim erant non admodum pij)
 secessionibus operam dare incipiebant, par-
 vo primùm successu, sed crescentibus, uti
 fit, odijs animisque, paulatim ita aucto, ut
 turmatim & agmine factò, si quem Pastorem
 Remonstrantem suggestum viderent ascen-
 dere, templo excederent & ad eos conflue-
 rent, quos secum sentire dicebant. Nec hoc
 contenti, ut manifestius fieret schisma, in
 pagos, vicos, agros vicinos magnâ cum tur-
 bâ se conferebant, ut ibi suos Pastores, id
 est, studiosos juvenes & adolescentes quos-
 dam audaciores, eum in finem contra &
 præter omnem ordinem examinatos able-
 gatósque audirent; tanquam si ægrè ipsis
 esset, quod ij, qui cum ipsis sentiebant, aper-
 tiorem secessionem non facerent. Et hæc

N s

facie-

faciebāt, cum Pastores duos tresve sæpenu-
 mero in civitatibus suis haberent, quos secū
 sentire ipsi agnoscebant; cum nulla adhuc
 Synodus habita esset, in qua controversiarū
 decisio facta erat; cum Magistratus edictum
 non unum factionibus ejusmodi interposu-
 issent, easque, quantum in ipsis erat, salva
 semper Tolerantia mutua, inhibuissent. Et
 eouſque procedebat furor hic, ut loca pu-
 blica, autoritate Magistratuum obserata ob-
 signataque, per vim ab istis schismaticis ef-
 fringerentur, armorumque omni genere in-
 structi cætus, invitis Summis Imisque Magi-
 stratibus agerentur, & ut illustrissimo signo
 authoraretur Secessio, Sacramenta seorsim
 celebrarentur. Hæc cum viderent Proceres
 in nervum aliquando eruptura, propositum
 aliquoties fuit in Confessu Ordinum, An
 non isti factioni occurrī posset, si suum cui-
 que templum adsignaretur; ita ut quos quis-
 que vellet Doctores & Pastores audiret. Sed
 frustra. Odio solius schismatis, quod Lerna
 plerumque malorum est, consilio huic locus
 non fuit datus inter Proceres. At Remon-
 strantes ipsi nunquā petierunt, nunquā po-
 stularunt, ut id fieret: Sed contra, Secessio-
 nes ejusmodi, ut importunas, ut illicitas, ut
 factiosas, clam, palam detestati sunt, suos-
 que Auditores serio semper monuerunt, ut
 ab

ab istis sibi caverent, pacem sectarentur & concordiam, sine quâ nemo videbit Dominum. Schismata ista esse opus carnis, quod Apostolus damnet & inter ea recenseat, quæ nos excludunt ex Regno cælorum: Religionis & conscientiæ causâ ista non fieri, quando ij, qui Secessiones istas faciunt, Pastores suos habent, quos orthodoxos credunt, & quos audire possunt, quando volunt. Hæc aliaque in dies pæne inculcabant, & sæpe ad ravimusque. Sed posito etiam, quod cum ista publicè & coram sole, jnvitis & frustra renitentibus Magistratibus fieri viderent, quod, inquam, petijissent, ut tolerantia illa in iisdem templis exerceretur, atque eo fine suum cuique adsignaretur templum, pacis & accommodationis ergo, usque ad Synodi tempus: Quid? An crimen aliquod in eo commissum ab ipsis diceret Capellus?

Postulassetis, inquit, ut impunè vobis schisma facere liceret, idque nullâ necessitate. Atqui schisma jam ab adversarijs ipsorum formatum erat impunè, & nulla necessitate, & nec precibus, nec rationibus, nec autoritate, nec cõsilio, nec accõmodationis ullo genere reprimi potuerat. Accesserat Auratiæ Princeps & exẽplo atq; autoritate suâ schismaticorũ animos

animos adeò auxerat, ut incurabiles essent, & hic illic petulantissimè turbare inciperent cætus eorum, à quibus secesserant, eaque ipsa templa, quibus excefferant, reddi sibi solis postularent. Quid facerent Remonstrantes? An paci & concordiaè amplius potuissent litare, quàm consilio tali, ut suum cuique templum assignaretur? Certè, si ab istis Schismaticis & Turbatoribus secessionem fecissent, rectius & causa suæ utilius fecissent. Verum quia pacis studiosi erant, & Proceres ipsos Patriæ à Schismate abhorere videbant, malebant extrema quæque tentare, quàm cauterio isto pacis omne remedium tollere. Dicit fortasse Capellus, si pacem amassent, secuti fuissent secedentes; tolerassent Secessionem, & desertâ Sétentiæ suæ professione illis se junxissent. At, inquam ego, & hoc frustra fuisset; odia nimis excreverant: non ferebant schismatici Pastores istos, quos à se dissensisse antea sciverant, nisi consensionem, non silentio, sed voce profiterentur & manu signarent. Quod adeò verum est, ut ne privatos quidem Remonstrantium Sententiæ addictos cætibus suis immixtos, aliter quàm ægris oculis adspicerent, scommatisque probis & contumelijs suis efficerent, ut non amplius inter ipsos comparere auderent.

Sed

Sed nec poterant bonâ conscientia Sectarijs istis se jungere ; imò ut ab illis non aperte secederent vix ab animo suo impetrare poterant. Sola spes pacis & Reipublicæ salutis faciebat, ut aperte illis nuncium non remitterent. Neque tamen schisma fieri, aut quod factum erat, approbari judicassent, si, ut suum cuique templum consensu publico & communi assignaretur, consulissent, cum schisma dici non possit id, quod communi consensu pacis & vitandi veri schismatis causâ ad tempus tantum fit; etiamsi speciem aliquam schismatis habere videatur.

At si Controversia non est tanti, quin possit alter, alterum tolerare, quid opus est schismate?

At quando schisma hoc factum erat, non erat amplius Controversia de Sententia, sed de facto. Controversia tolerari poterat: at factiosa & illegitima ista Controversiæ decisio, & quod ex eâ natum erat, Schisma prorsus erat intolerabile. Non erat cognita adhuc causa in ullo Conventu legitimo. Conventiculis & coitionibus clancularijs atque illegitimis erat damnata à quibusdam Pastoribus zelotis patriarum Traditionum, quibus cæteri tacite suffragabatur. Huic decisioni innixum erat Schisma ; idque invitis & magno molimine obnitentibus Magistratibus

tibus. Urgebatur autem in dies tanto furore, tantâ audaciâ, tanta obstinatione, ut qui ullo conscientiæ bonæ studio ducebatur, non posset non toto animo ab eo ejusque authoribus & fautoribus abhorrere. At Pastores, inquiet fortasse Capellus, nondum in illud consenserant. Atqui, inquam ego, pleriq; ejus fuerant authores, aut fautores. Docent id acta Amstelodamensia, Schiedamensia, Hagiensia, quæ ipsorum manibus subsignata habebantur, quæ cæteri ferè omnes, non modò non improbabant, nedum, quicquid supplicibus votis rogarentur à Remonstrantibus, redarguebant aut carpebant, sed facto etiam exemploque suo confirmabant, cum cætus istos, qui secessionem tam illegitimam fecerant, consilij, concionib⁹, studijsq; suis in secessione ista quotidie stabilirent & confirmarent. Quare cum Capellus ait; *Nulli unquam Pastori licuisse impunè Schisma facere*, Sententiam contra seipsum dixit, & damnavit eos, quibus se patrocinari credidit. Et tantum abest, ut isti non impunè fecerint firmaverintve Schisma istud, ut Schismatis illius beneficio ad Synodum illam grassati fuerint, in qua eos ipsos (quis credat?) qui pacis & Tolerantiæ præcones semper fuerant, tanquam schismatis authores damnarunt. Hæc vera est rei gestæ Historia, quam

quam aut ignoravit aut scire noluit Capellus. Quod cum ita sit, totum illud, quod Capellus Thesi VI I. & VII I. operose inculcat, ut ostendat, parem non esse rationem in Tolerantia Lutheranorum & Remonstrantium, quod videlicet in istos jus nullum haberent Ecclesiæ Belgicæ, uti in hos, quos sciebant Ecclesiæ suæ membra esse, non modò non pro ipso, sed planè contra ipsum facit. Si enim ij ipsi, qui Remonstrantium erant adversarij, Ecclesiæ erant membra, & tamen schisma fecerūt à Remonstrantibus, antequàm Remonstrantes ab Ecclesia, cui jus est tolerandi aut non tolerandi, essent condemnati, utiq; culpa Schismatis non Remonstrantibus, sed adversarijs ipsorum tribuenda est: Et si culpa schismatis ipsis tribuenda est, utique jam ipsis jus non fuit amplius in Arminianos, tanquàm in membra Ecclesiæ suæ, quia schisma faciendo eos membra Ecclesiæ suæ amplius esse noluerunt, aut saltem seipso, ut membra Ecclesiæ istius haberi noluerunt. Sed ut idem clarius adhuc intelligat, en ipsū porrò adhuc suis ipsius verbis cōvinco. Fatetur Thesi 7. & 8. *Eos, qui Ecclesiæ alicujus mēbra sunt, siue Pastores sint, siue oves, jus nō habere faciēdi schisma. Rectè, & suos HOMOPSEPHOUS, qui ejusdē Ecclesiæ membra erāt, largiri noluisse dicit Arminianis jus faciēdi Schisma*
non

non necessarium, id est, Tolerantiam in diversis Templis concedere recusasse, eo quòd Arminiani Schisma non necessarium esse, & Tolerantiam retineri posse ac debere etiam in eodem Templo judicarent. Adversarij autem ipsorum eos considerabant, ut reos, non tantum *Illorum quatuor Errorum*, verba sunt Capelli Thesi v i i i. *Sed & aliorum multorum, quorum numerus illis constare non poterat, &c.* Si hoc verum est, itaque non fecerunt Arminiani Schismá, neque Secessionem; & tamen Schisma tale factum fuit, antequam ullo judicio publico aut legitimo accusati, nedum damnati essent Arminiani. Necessum itaque est, ut Schisma primum factum sit ab ijs, qui adversarij ipsorum erant: at ij alij non fuerunt, quàm Ecclesiæ istius membra, & Ecclesiæ Pastores quidam, qui eos schismatis facti jam accusant, quia alij esse non potuerunt: Quo jure itaque negare possunt Tolerantiam in diversis templis Arminianis propter causam Schismatis? Vides, ut seipsum suo laqueo proprio jugulet Capellus? Sed res hæc probatione non indigeret, nisi Capellus ostenderet, se plane ignarum esse, aut studio dissimulare ea, quæ in Belgio coram sole ipso gesta sunt.

Objectio Quinta, quam sibi Capellus facit,

facit, est hæc : *Non possunt Arminiani fundamentum fidei convellere, ergo tolerari possunt.* Antecedens probari dicit. *Profitentur enim se nihil Gratiæ Dei subducere, nihil hominis merito largiri velle.*

Ut hoc Argumentum paulò enucleemus, in formâ perfectè proponam illud:

Qui profitentur, se nihil Gratiæ Dei subducere, nihil hominis merito largiri velle, ij non convellunt fundamentum fidei. Arminiani id profitentur. Ergo.

Ad Majorem hanc respondet Capellus dupliciter. 1. Non satis esse, ut quis profiteatur, se nihil Gratiæ Dei subducere & nihil hominis merito largiri velle, necessum etiam esse, ut reipla Dei Gratiæ nihil subducatur & hominis merito nihil reipsa largiatur. Agnosco distinctionem. At quòd Arminiani factò ipso Dei Gratiæ nihil subducant, & nihil tribuant hominis merito, jam ante evicimus. Neque dixit Capellus vel verbulo uspiam, quâ in re in terminis Arminiani subducant aliquid Gratiæ, aut tribuant quippiam hominis merito. *At quàm saepe contingit, ait Capellus, ut quod homines cauti dextra porrigunt, id sinistra subducant?* Ita est, fit hoc non rarò; sed nec minus rarò id fieri dicitur, & creditur, cum non fit. Sæpius enim homines suspiciosi

O

aut

aut maligni credere nolunt, dari sibi, quod utraque manu ipsis porrigitur. Morbus iste est animi ægri, cui rarò satisficit. Suspicio vitri picti aut oculi lippi instar est, qui res aliter semper apparere facit, quàm sunt. Doce, Capelle, ubi & quæ in re id fiat. *Sed esto, inquit, Secundò demus, eos id, quod nobis largiuntur, bonâ fide largiri, nihilne præterea metuendum restat?* Ergo, inquam ego, non sufficit Capello id, quod suffecit olim Synodis, adversus Pelagianos habitis. Imò dicam amplius, hoc ipsum, quod Synodi omnes, ipseque adeò Augustinus credidit verissimum esse, id Capello sufficit ad condemnandum Arminianos & ad asserendû, quòd id non modò falsum sit, sed ipsum fidei fundamentum convellat. Quod idcirco tantùm noto, ut videas, quomodo Augustini & Conciliorum Veterum autoritate pugnare soleant Reformati, cû ea ex usu ipsorum est, & quàm egrè ferre soleant, si quis ab istis diversus abeat, tanquã si capitale crimen foret ab ipsis dissentire, & quomodo interim in eodẽ argumento, quando ipsis aliter videtur, eorum autoritatem non flocci modò faciant, sed eos ipsum fundamentû fidei convellere intrepidè asserere audeant. Cothurnus ipsis est autoritas Patrum. Rem testem do. *Nihilne aliud metuendum restat?* inquit Capellus.

pellus. *Quid si negando Perseverantiæ certitudinem, pijs multas easque Sanctas & salutes consolationes ereptum eant? &c.* Hæ Syres, inquit, an nō fundamentū Religionis Christianæ respiciunt, adeoque convellunt? Syllogismus hic est:

Qui negant Perseverantiæ certitudinem, ij convellant Religionis Christianæ fundamentum: quia negando eam ereptum eunt pijs multas easque Sanctas & salutes consolationes. At hoc faciunt Arminiani. Ergo. Hic Syllogismus si verus est, jā certè necessum est, ut Capellus dicat, Synodos veteres, Patres antiquos, ipsūq; adeò Augustinū, Prosperū, &c. quorū autoritate alioquin in hoc argumēto triumphare solet, nō errasse tātū, sed & fundamentum Religionis Christianæ convulsiſſe, pijs multas easq; sanctas & salutes cōsolationes ereptum iviſſe, ac proinde intolerabiles eſſe. Senſerunt enim isti, fideles, quamdiu in hac vita sunt, de perseverantiā suā certos non eſſe, Deumq; adeò voluisse, ut certi nō sint, paucis exceptis, quib⁹ id speciali aliquā revelatione certum facere voluit. En ipsius Augustini verba lib. xi. de Civitate Dei Cap. 12. *Qui (justè ac piè viventes) licet de suæ perseverantiæ præmio certi sint de ipsā tamē perseverantiā suā reperiuntur incerti. Quis enim hominū se in actione profectūq; justitiæ perseveraturum usq; in finem sciat, nisi aliquā revelatione*

ab illo certus sit, qui de hac re iusto latentēq; iudicio non omnes instruit, sed neminem fallit. Item Epistola 107. ad Vitalē: Utile quippe est omnibus, vel pænē omnibus, propter humilitatem saluberrimam, ut quales futuri sint, scire non possint. Ad hoc dicitur; Qui videtur stare, videat ne cadat. Item de Correptione & Gratia Cap. 13. Quis ex multitudine fidelium, quamdiu in hac mortalitate vivitur, in numero Prædestinatorum se esse præsumat? Quia hoc occultari opus est hoc loco, ubi cavenda est elatio. Augustino consentit Prosper in Responsione ad Objectiones Vincentij 12. Prædestinatio Dei apud nos, dū in præsentis vitæ periculis versamur, incerta est. Sed quicquid sit de mente Augustini & Veterū, videamus vim Argumenti. Ut Major Syllogismi rectē procedat, considerandū venit, qualem certitudinem perseverantiæ hīc intelligat Capellus, cuius negationem fundamentalis Veritatis convulsionem esse vult. Perseverantiæ enim certitudo intelligi potest, vel de ea certitudine, qua quis certō persuasus est, sibi nunquam defuturum divinæ Gratiæ auxilium, ut pius existens ad finem usq; vitæ in pietate perseverare possit, & actu semper in Gratia Dei perseveret: vel de ea certitudine, qua quis certō persuasus est, se vel in actione profectūq; iustitiæ perseveraturum usq; in finem, vel saltem in favore

favore aut in gratia Dei immutabiliter mansurum; etiam cum in actu profectuq; justitiæ non perseverat, imò cum in peccatis & flagitijs atrocibus contra conscientiam suam vivit. Si primam istam perseverantiæ certitudinem intelligat Capellus, concedam Majorem propositionem. Sed tum Minorem falsã esse non negabit, opinor, ipse Capellus. Si Secundam intelligere se dicat, tũ nego Majorem. Et negationis manifesta est ratio. Is enim, qui certitudinẽ ejusmodi negat, non eripit consolationes pijs, qua talibus. Piorum enim, qua taliũ, consolatio est, quòd semper in Gratia aut favore Dei perseverent, & eã, quamdiu pij sunt, nunquam excident, qua consolatione quæ Major dari potest? Sed eripit Consolationes peccatoribus, sive ijs, qui pij esse desinunt, & deserta justitię semita peccatis se dedunt. His enim, qua talibus, nõ conveniunt Consolationes, sed reprehensiones, cõnationes, damnationes; adedò quidẽ, ut si quis eandẽ consolationẽ, id est, eandẽ perseverantię certitudinẽ competere velit peccatorib⁹ talibus, quę pijs & Deum timentibus competit, necesse habeat, concedere ei, qui semel pietati operam dederit, non necessum esse, ut in pietatis studio sollicitè perseveret; cum eadem certitudo perseverantię in gratia di-

vina haberi possit, imò reipsa & actu habeatur, atque haberi credi debeat sine pietatis exercitio, quæ habetur in & per exercitium pietatis. Quare tantum abest, ut qui huiusmodi perseverantiæ certitudinem negat; idcirco fundamentum Religionis Christianæ convellat; ut nihil sit, meo iudicio, quod fundamentum Religionis Christianæ, id est, necessitatem Pietatis & Sanctimoniam magis radicitus evertat, quàm ejusmodi certitudo. Nihil enim fœdus, turpius aut indignius de divinâ Christi Religione cogitari potest, quàm si ea perseverantiæ certitudinem in fide & Gratiâ divinâ tribuere dicatur ijs, qui in peccatis vivunt, postquam per agnitionem veritatis à peccatis & inquinamentis mundi purgati semel fuerint.

Secundum Argumentum quod ex Potentiæ divinæ convulsione deducit Capellus, cum ait: *Quid si Dei potentiam convellant, dū volunt Deū sape finem suum non adsequi, quantum vis eam adsequi conetur & quidē magno nisu? &c.* prolixè in præcedentibus tractatū est & excussum. Non repeto idem hîc, ne actū agā.

Addit Tertio Capellus, *non leve videri debere id, quod convellant Arminiani, eo quod ipsi sectatores Arminij plus satis doceant, quanti momenti rem esse putent, aut credi velint, cum*
Doctri-

Doctrinam nostram tot incommodis obruere conentur, quasi Deum authorē peccati faciat, quasi totum Evangelium histrionicum reddat, quasi studium bonorum operum extinguat, Religionem omnem evertat. Atqui, inquam ego, ex eo sequitur quidem, Arminij Sectatores judicare Sententiam Capelli aut Synodi Dordracenę periculosam & valdè noxiam esse: sed ex eo non sequitur ipsos convellere fundamentum fidei & Religionis Christianę, nisi ipse Capellus fateatur Sententiam illam, quam tot incommodis gravant Arminiani, fundamentum fidei esse. Hoc si dicat Capellus, tum consideret apud se, an non gravissimam causam habuerint Arminiani ab istā Doctrinā dissentiendi, quam tot & tam immanibus absurditatibus scatere videbant: et in quā tamen fundamentum, & basim Religionis, imò Reformatę Religionis collocari audiebant? Deinde, an non magna fuerit eorum moderatio, magna caritas & admirabilis patientia, quòd pacem colere non recusaverint usque ad Synodi tempus cum ijs, quos tam absurdę, tam profanę Sententię patronos esse sciebant, & quòd statim ac primi non secesserint ab illis; Sed rationibus, lenitate, & mansuetudine sua ad meliorem eos mentem reducere maluerint, quā importuna secessione eos à se alienare?

Sed, inquit Capellus *ijdem nunc quoque palam faciunt, quo consilio Tolerantiam postula-verint, ut videlicet paulatim invalescerent, & alteram partem cuniculis artibusque varijs labefactam, saltem in quibusdam Provincijs, tandem opprimerent.*

Erras, Capelle, & injuriam facis ijs, quorum consilia ignoras. Non erat hoc ipsorum consilium. Tolerantiam mutuan, ab Ordinibus usque ad Synodi Nationalis tempus decretam, approbabant ex animo, laudabant, exercebant. Nec repugnabat hoc ipsorum factum iudicio ipsorum, quo Sententiam contra Remonstrantium tot incommodis onerabant: Ipsi enim illi absurda ista verè absurda esse agnoscebant, sed ea ex Doctrinâ suâ consequi negabant. Quin & contra Remonstrantes Geldri Sententiam Sententiæ Remonstrantium de Prædestinatione ejusque annexis contrariam, & decem illis notis Positionibus comprehensam, non tantum ut falsam, sed etiam ut blasphemam atque horrendam publicè in Synodo damnaverant. 2. Ordines jam constituerant idoneos terminos, qui absurditatibus illis docendis ansam præscindebant. 3. Tolerantia non nisi usque ad Synodi Nationalis tempus duratura erat. Quòd autem Tolerantiam illam Arminiani probaverint, ut invalesce-

valescerent, id quidem fieri potuit. Nemo id illis jure vitio verterit aut crimini dederit. Ecquis enim est, qui non optat & cupit invalescere Sententiam illam, quam credit veram esse? Tolerantia autem isti fini erat idonea: tum enim animi auresque patient adhuc ad Collationes: tum rationes adhuc militant, & argumenta, quibus veritas persuadeatur: tum colloquendi occasiones & oportunitates adsunt, quibus omnibus ansa præciditur, simulatque in partes itum est. At quòd Tolerantiam postulaverint, ut opprimerent alteram partem, id planè est falsum. Amabant animitus omnes & sine PROSOPOLEPSIA, quotquot Tolerantiam mutuam colere se velle profitebantur; imò non rarò præ ijs, quos Sententiæ suæ favere compertum habebant, eos promovebant, quos contrariæ sciebant addictos; si modò eos pacificos, modestos & pios esse intelligerent, ne suspicandi occasionem fratribus suis darent, quasi oppressos eos cuperent. Sciebant enim, quantum posset ejusmodi maligna suspicio.

Atqui simul ac obibat Pastor aliquis, tum Procerum, quos in Sententiam suam pertraxerant, autoritate substatuebant homines, quos per occulta & fida sciebant sententiæ suæ favere.

At si quis hæc neget Capello, quomodo

ea probaret? Quis hæc dixit Capello? Recitat quod ignorat. Plura loca dare possem, quæ calumniam istam ad oculum revincerent. Quod si tamen quandoque eos, quos Sententiæ suæ favere intelligebant, alijs prætulerint, aut in defunctorum locum substituerint, quod factum aliquando esse non nego, id fiebat duabus de causis. 1. Quod qui alterius Sententiæ erant, Tolerantiam ab Ordinibus decretam aut damnabant, aut ita frigide probabant, ut non tam ex animo, quam ministerij consequendi gratiâ eam se probare facile ostenderent. 2. Quia eos, quos Sententiæ suæ esse sciebant, nuspiam locorum recipi, ubiq; deditâ operâ excludi videbant; adeo ut, nisi ab ipsis oblatâ occasione promoverentur, in Ceritum tabulas à Contra-Remonstrantibus relati viderentur.

At si tam bona fide, inquit, tolerandam censebant utramque Sententiam, qui sit, ut nunc non tolerant eam sententiam, quæ plures ac potentiores Patronos nacta est? Bellè equidem, mi Capelle. Quis non miretur acumen tuum? At vicissim quæro ex te, Capelle, cur quæso tolerarent eam sententiam, quæ ipsorum Sententiam, quam vicissim tolerari cupiebant (non enim nisi mutuam Tolerantiam probabant) non tantum non toleravit, nec tantum damnavit ut falsam, sed ut errorum vari-

variorum latibulum & ut intolerabilem censuit? Cur tolerarent ejus patronos, qui eos, qui utramque Sententiam pariter tolerandam esse sentiebant, Ecclesijs, Academicis, Scholis, Functionibus omnibus ejecerunt & in dies adhuc, quantum in ipsis est, omni persecutionum genere oppressos cupiunt? Qui Doctores & Professores Sententiæ istius non tantum non tolerare volunt docentes, sed & diro æterni silentij promisso obligari curant, aut si renuant, exilij perpetui, aut æterni carceris pœnâ mulctari suadent? Quis, qui hæc audit, non per ludibrium hæc à Capello quæri credat? Censuerunt Arminiani, bonâ fide mutuam Tolerantiam colendam esse, cur itaque, inquit, non tolerant eam partem, quæ alteram oppressit? Idcirco sanè, quia ea ipsa pars illegitimè & inique eos ut partem alteram opprimit, & mutuam Tolerantiam, quam sanciverant Ordines, penitus conculcat, tolerare eam nec possunt nec debent. Sed obsecro, Capelle, quid si oppressi isti Pastores tolerare se velle triumphantem jã istam Sententiam profiterentur, an tolerares eos, an Sacramenta ipsis conferres, si in sua Sententia se permanere velle profiterentur, & communionem peterent? Si non, cur quæris causam, ob quam non tolerent?

An

An nō hoc est miseris acerbè illudere, & ad-
 flictis addere afflictionē? Si tolerandos eos
 dicas, consule tum Acta Synodi Nationalis
 Charentonensis, quæ ante paucos menses
 habita est, & intelliges, quid Ecclesiæ Galli-
 cæ eâ de re statuant. Censuerunt illos omnes
 quotquot Sententiæ alterius sunt, quam ea,
 quæ Dordraci approbata est, excommuni-
 one separādos & nullo modo tolerādos esse:
 Instruendos quidem primū, sed si instru-
 ctioni non cedant, prorsus excommunican-
 dos esse. Atqui, inquires, in Belgio longè
 aliter fit. Atqui, inquā, cum hoc in Synodo
 istâ objiceretur, respondit Synodus, in Bel-
 gio quidem id fieri propter politicas Con-
 siderationes; at ubi eæ non militant, ibi ali-
 ter agendum esse. Nec dubium est, quin ea-
 dem mens sit cæteris omnibus. Docuerunt
 id satis Belgæ nostri, cum ante Synodi aut
 Cætus ullius legitimi Sententiam Schismata
 passim facerent & non tantū secederent
 ab ijs, à quibus dissentiebant; sed etiam eos
 qui ad ipsos cum literis Systaticis accede-
 bant, rejicerent tanquam communionē suā
 indignos. Et hæc cum ita sint, apparet sanè,
 Quæstionem hanc plenam felle esse. Pro-
 sus tamen insulsum est, cum pro ratione ad-
 dit: *Quòd plures & potentiores Patronos nassa
 sit Sententia ista, Utique si pios, si Dei timen-*
 tes

tes dixisset, auxisset argumenti vim. At cum plures & potentiores Patronos dixit, nihil equidem dixit, quod ad Sententiam commendandam facit. Plures enim ferè sunt mali, quam boni. *Argumentum pessimi saepe est turba*, inquit Seneca: Potentiâ verò etiam tyranni glorianatur. Nec ignorabant Arminiani, quibus artibus id factum fuerat, quòd plures & potentiores Patronos nacta erat ista caussa. At eas artes tam damnabant, quàm ipsam caussam. Sed quicquid eâ de re sit, Veritatem non amat, quisquis ab istis mundanis rebus pendet, & ad plurimum aut potentiorum fortunam conscientiam suam, veluti navigium aliquod, dirigit. Si Capello ea sedet Sententia, componat se ad Principis sui nutum, & quem in gratiam ipsius orthodoxum antea declaravit, eundem nunc mutatâ rerum facie in ejusdem gratiam Hæreticum Pelagianum, & Anthropomorphitam, & non multo post iterum Orthodoxum, si volet, faciat. Qui in Belgio mutuam Tolerantiam bonâ fide primum coluerunt, & per artes ac fraudes, per vim & violentiam, patriâ suâ ejecti, & ab Ecclesijs suis carissimis fuerunt avulsi, qui adhuc nullius criminis aut sceleris rei, aut in exilio perpetuo, aut sub persecutione gravissimâ vivere coguntur, ijs alia mens, alius animus est.

est. Malunt illi separati semper vivere ab ijs qui horum omnium authores sunt & fomes, & quamdiu aliter non licet, vitam suam extra eorum cōmunionē soli Deo suo probare, quā communione illorum conscientias suas polluere, aut signo ullo testari, sibi cum cætibus istis carnalib⁹ aliud quid commune esse, quā benevolentiae & caritatis affectum, quem etiam hostibus atque inimicis debent ex lege Domini sui, nihil dubitantes, quin Deo innocentia ipsorum & vita, quæ labe & macula caret, grata sit, etiam si nec his, nec illis cætibus, à quibus animæ suæ contagium metuunt, sese jungant, aut externo istius Religionis exercitio careant.

Objectio Sexta, ad quam respondet Capellus, ab eo proponitur hunc in modum:

Cum, inquit, ita se habeant quatuor de Prædestinationis objecto Sententiæ, ut tres primæ sese mutuo ferant, cur non etiam quartam tolerare possint? Respondet autem, Omnino Belgæ potuissent eam, ut in alijs, sic in Arminio tolerare, si simpliciter eam in medium protulisset Arminius, ut Melancthon in Locis communibus & alij quidam: Sed cum ita propugnata[m] voluerit, ut tres priores, eoque duas Confessiones in Belgio publicè receptas, non modò falsi damnarit, sed & impietates horrendas in se continere dixerit,

rit, ipse sibi præclusit aditum ad Tolerantiam illam.

Responsio hæc lubrica est & inepta. Lubrica, quia non dicit. 1. Quod Sententia illa in se tolerabilis sit; sed quòd eam Belgæ potuissent tolerare. Non caret autem mysterio, cum Belgas solos nominat, eosque Sententiam istam tolerare potuisse dicit. 2. Nec dicit, quid illud sit, si simpliciter eam protulisset. 3. Nec explicat quâ de Tolerantiâ agat; quia dicit, potuissent Belgæ tolerare eam in Arminio, sicut in alijs. Qui enim sunt alij isti? Et quomodo Belgæ eam tolerant in alijs? Sed esto, intellexerit, ut voluerit, hanc periculum Capellus; inepta tamen est ejus responsio. 1. Quia Arminius ita propugnatam non voluit Sententiam suam, uti Capellus ait; Sed cum celare amplius eam non posset, cum accusaretur, quòd eam clare satis non explicaret, cum juberetur à Magistratû supremo Sententiam suam rotundè atque ingenuè dicere, dixit eam & propugnavit pænè invitatus, ac nolens; quia in Synodo eam dicere maluisset. Deinde 2. Posito, quòd eam ita propugnatam voluisset; hæc tamen justa satis causa non erat, ut nō toleraretur: Ratio est. Quia authores triū istarum Sententiarū idem faciunt. Quilibet eorum

eorum Sententiam suam non modò non propònit simpliciter, sed ita eam propugnât, ut, qui tertiam tenet, primam & secundam non modò falsi damnet, sed etiam impietates horrendas in se continere dicat; Quippe per primam Deum injustum, tyrannum, authorem peccati fieri: per secundam Deum (absit blasphemia) insipientem aut fatuum reddi: Et tamen hæ tres Sententiæ se mutuò ferunt, non obstante istâ propugnatione. Quid catissæ est, cur hæc propugnatio Tolerantiam non impediât in his tribus, & in quartâ Sententiâ impediât? At, inquit Theſ. xv. *Neutra alteram adeò præcisè simpliciterque damnat, sed ex harum Sententiarum assertoribus quidam putarunt, suam ijs nitî fundamentis Sententiam, ut eam alteri damnare non possit, quin incidat ipsa in periculosam aliquam Syrtem.* Atqui, Capelle, hoc non est solvere argumentum, sed obscurâ quadam locutione responsionem involvere, ut intelligi non possis. An non satis damnant, iudicio tuo, Sententiam, qui ex ea sequi dicunt, Deum esse authorem peccati, Deum esse injustum, Deum esse Tyrannum, Deum esse insipientem? Quid crudius, quid atrocius, quid damnabilius dixit Arminius? Absurda hæc sunt atrocissima, quibus Sententia aliqua gravari potest. *At putârunt authores*

authores earum, inquit Theſ. xii. *Tres iſtas inter ſe conciliari poſſe.* Citius quis aquam igni conciliabit, quàm hæc tam longè diſtantia & tam contraria placita. Qui came-
 los iſtos tolerare imò deglutire poteſt, is certè culicem percolat, quando Sententiam Arminij ferre ſe non poſſe proſitetur: Nul-
 lum enim absurdum eſt, quod ex Arminij Sententiâ deducitur, quod cum illis abſur-
 dis vel conferri meretur. Deinde ſi autho-
 res trium iſtarum Sententiarum, qui ſe invi-
 cem ferunt, iſtis conſequentijs atque abſur-
 ditatibus alter alterum premit ſine crimine
 aut offeſſâ; Cur Arminio crimini datur,
 quòd iſſdem conſequentijs atque abſurdi-
 tatibus Sententias ipſorum gravavit? Et cur
 ob hoc, quod Arminius fecit, neceſſarium
 fuit Sententiam definitivam de re totâ fer-
 re, & cum Authores primæ, ſecundæ, terti-
 æque Sententiæ idem fecerint, faciantque,
 imò pejus quam Arminius; neceſſarium ta-
 men non fuit definitivam Sententiam ferre?
 Glutino opus habebit Capellus multo, ut
 hæc conciliet. Si id omninò fieri poſſe cre-
 dit, tantummodo loquatur ut intelligi poſ-
 ſit.

Tranſeamus ad Objectionem Nonam,
 in quâ novum Argumentum orditur Capel-
 lus, videlicet, *An ij, à quibus damnati ſunt in*
 P Synodo

Synodo Dordracenâ Arminiani, in hac causâ judices idonei fuerint, aut esse potuerint? Negant id Arminiani: Capellus affirmat, & respondet ad argumenta quædam, quæ in contrarium ipsi facere videntur, & ab Arminianis adferri adfirmat. Videamus, an rectè & solidè.

Primum, inquit, dicunt Arminij Sectatores, eos, à quibus damnati sunt in hac causâ, judices idoneos nec fuisse nec esse potuisse, quòd scilicet eorum interesset, ut eam, quam tulerunt, Sententiam ferrent. Argumentum agnosco solidum & AKATEGORETON: In formâ ita habet:

Quorum interfuit, ut eam, quam tulerunt, Sententiam ferrent, illi non fuerunt nec potuerunt esse idonei causæ istius Iudices: At eorum, à quibus damnati sunt Remonstrantes, interfuit, ut eam, quam tulerunt, Sententiam ferrent: Ergo.

Minorem hujus Syllogismi aut præterit Capellus, aut concedit, eo quòd eam veram esse credidit. Ad Majorem tantum respondet, quæ tamen omni exceptione major est, uti statim apparebit. Negat, in eo, qui idoneus judex causæ alicujus est futurus, requiri ut ejus non intersit, quam ferat Sententiam. *Si Christianus*, inquit, *es, si Dei filius es, interest tuâ, quid de Deo quisque sentiat.*

sentiat. Itane Capelle? Interestne honoris, existimationis, status, utilitatis, commodi alicujus mei, judicare quid de Deo quisque sentiat? An ut favorem & gratiam populi consequar, ut divitias, opes, honores acquiram, judicare teneor, ut hoc, non illud, quis de Deo sentiat? *At,* inquires, *interest conditionis & officij tui, ut hanc non illam Sententiam feras.* At, inquam ego, quando controversia est, & controversia adhuc pendet, utrum hæc an illa Sententia vera sit: quomodo officij mei interest, ut hanc non illam Sententiam feram? Officij aut conditionis nostræ non interest, ut feramus sententiam hanc aut illam, priusquam præcedente justo examine prehensum fuerit, hanc esse veram, non illam. Interest nostri officij, ut non feramus Sententiam, nisi quam veram esse judicamus: Sed & interest officij nostri, ut, cum de re & causa aliquâ controversia adhuc pendet, ita ut examine accurato opus sit, non judicemus peremptoriè, antequam res diligenter ex omni parte examinata fuerit. Quando itaq; Synodus convocatur eum in finem, ut in ea expendatur & judicetur in timore Domini, utrum hæc aut illa Sententia, de quâ controvertitur, falsa sit; utique qui ad eam accedit eo animo, quòd interesse sua putet,

ut hanc sententiam; non illam ferat, quas-
 cunque demum rationes in contrarium ad-
 ferri in Synodo audiat, is idoneus Senten-
 tię istius iudex non est, nec idoneus iudex
 esse potest: iudicium enim præcipitat ante
 debitum examen, & iudicavit peremptorię
 causam, antequam eam examinavit, aut ex-
 aminari audivit eā mente, ut iudicare vel-
 let pro eā parte, pro quā rationes maximę
 militaturę essent. Quomodo autem ju-
 dex idoneus esse potest quis, sine idoneo
 & iusto causę examine? Iustum autem ex-
 amen non est, quod quis apud seipsum so-
 lum facit, sed quod quis facit ita, ut fieri
 debet, audiendo & expendendo quicquid
 ad causam facere potest, idque ibi, ubi ju-
 dicium deinde faciendum est. Res hæc
 est ita plana, ut non possit esse planior.
 Sed posito quod interesse huiusmodi non
 impediatur, quo minus quis idoneus causę
 alicujus iudex sit; manet nihilominus vis
 Argumenti. Argumentum enim agit, non
 de interesse officij, sed de interesse statūs,
 aut commodi alicujus privati, quo carere
 aliquem necesse est, nisi sententiam hanc,
 non illam præcisę ferat, & quo certissimę
 quis gavisurum se sperat, si hoc, non illo
 modo iudicet. Sensus enim Argumenti est,
 eos non posse esse idoneos iudices, qui non
 possunt,

possunt, salvo honore atque existimatione suâ, sine periculo maximo, sine certissimo damno Imperatorum adeoque ambitorum commodorum suorum, aliter quàm damnare Sententiam, de quâ controversia est, an damnari, an absolvi debeat. Quis hanc tam manifestam Propositionem negare auserit? Capellus certè audent: *Ne quidem*, inquit, *si tuâ privatim inter sit, quam sententiam feras, continuo spoliari omni jurisdictione.* Si filius, inquit, patri convitium fecerit, si Prætori jus dicenti, si Pastori concionanti protervè contumeliosèque quispiam obstrepat & obmurmuret, num propterea peribit illi omne jus suum?

At, inquam ego, de eo non quæritur, an jus suum alicui pereat puniendi eum, à quo læsus est, quando puniendi jus habet, & de facto læsionis planè constat; sed de eo, an jus alicui competat non absolvendi, sed damnandi aliquem, eo quòd ipsius inter sit, ut is non absolvatur, sed damnetur, & quidem quando res facti aut juris in quæstionem venit? Pone itaque, Patrem dicere convitium sibi factum à filio, & filium id negare; Prætorem crimen aliquod tale, quale dicis, impingere alicui, & hunc item id negare. An interesse Patris putabis, ut filius, qui convitium se fecisse negat, convitium

P 3

fecisse

fecisse credatur? ut Pater filium damnet, quia Pater est, & jus habet in filium, sive verum sive falsum sit, quod filius ipsi convitium fecerit? *At*, inquires, *Pater scit rem ita se habere, quod videlicet convitium filius fecerit.* Rectè, si rem ita se habere sciat, ita ut de eo, quod factum est, dubitari non possit; jam non judicat eum puniendum esse, eo quod ipsius intersit ut puniatur, sed eo quod puniri mereatur. Punit autem eum, eo quod intersit ipsius ut puniatur, qui meruit puniri. Aliud est judicare, aliquem puniri meritò posse; aliud punire eum, qui meruit puniri. Ut judices puniri aliquem meruisse, tuâ interesse non debet; ut punias, tua sæpe interest, id est, officij tui. Quando itaque Pater certus est ea certitudine, quæ ad judicium faciendum requiritur, quod videlicet filius ipsius convitium ipsi fecerit, jam judicium Patris ad eò legitimum est, ut magis legitimum esse non possit; ac proinde interest officij paterni, ut filium castiget. At pone casum, Patrem affirmare, sibi in cætu hoc aut illo convitium factum à Filio; Filium autem id negare, & orare Patrem, ut cætum istum audiat, paratum se penam subire, si rem prius diligenter inquisiverit. Quid? an privatum Patris interesse dices, ut vi-

ut videatur hoc verè factum esse, ut jurisdictione sua utatur in Filium, antequam in cætus istius sententiam exquisiverit? Non opinor. In Prætoꝛe & Pastore res est manifestior. Pone Prætoꝛem civi honorato impingere, quod ipsi jus dicenti convitium fecerit: Pastorem Seniori aut Diacono imponere, quòd concionanti ipsi protervè obmurmuraverit: Civem autem & Seniore[m] negare factum. Pone rem in judicium adduci: an existimas, Prætoꝛem & Pastorem idoneos istius causæ judices sedere posse, quamdiu interesse sua privatim credunt, ut accusati credantur fecisse id, quod in quæstionem venit an fecerint; aut ut damnentur ij, quorum causa in judicium adducta est? Totum mundum refragantem tibi habebis Capelle, nec dubito quin te ipsum tibi, si in judicio tali, non Prætoꝛis, sed civis; non Pastoris, sed Senioris loco comparandum tibi esset. Quocirca, Majorem Propositionem tanquam indubitatam statuendam esse, colligo. Minorem verò quia non negat Capellus, sed tacitè concedit, probari non est necesse. Res plana est. Intererat enim pænè omnium, qui in fæderato Belgio ad Synodum Nationalem convenerant, ut non aliam quàm eam, quam tulerunt, Sen-

tentiam ferrem. Nempe, jam ante damnaverant eam in Conventiculis & Coitionibus suis, additâ manuum suarum subsignatione: damnationem factam secessione & schismate aperto ratam & testatam publicè fecerant: Tempa, loca publica, contra Edicta, obsistentibus Magistratibus, per vim invaserant, ut Magistratus, quos exauthori privilegia Patriæ vetant, de statu suo deturbarentur, & in eorum locum adscisceretur, quos sibi addictos noverant, operam dederant: fama Principis Aurantiæ, qui schismati jam se miscuerat, & eorum omnium, qui mutationis illegitimę authores fuerant, in Belgio laborabat, si aliam quàm damnationis Sententiam ferrent: Iam ingentia stipendia, lauta Ministeria & imperturbatam quietem spe præceperant, & tantum non devoraverant. Interfuit itaque multis modis eorum, à quibus damnati sunt Arminiani, ut non aliam quàm eam, quam tulerunt, Sententiam ferrent.

Objectionem Decimam non capio, nec scio unde eam depromserit Capellus. Credo eum umbram aliquando pro argumento sumere, & Andabatarum more pugnare.

OVK IDEN, ALL' EDOKESEN IDEIN DIA
NVKTA SELEENEEN.

Obiectio Undecima habet vim & colorem,

rem, si rectè proponatur; sed ita frigide & dilute eam proposuit Capellus, ut studio vim & ictum ejus declinasse videatur. Ita enim ait: *Omnes aut plerique, qui Arminij Doctrinam damnarunt, multis modis Sententiam suam patefecerant, eoque partes fecerant.* Quis enim nervus in hoc Argumento est? quod robur? Qui sententiam suam patefacit, non excidit propterea potestati judicandi, neque sententiam suam patefaciendo statim partes facit. Puer hæc videret. Argumentum in robore si velit Capellus, hunc in modum formandum fuerat:

Qui antea, nullo ordine Ecclesiastico servato, suâ propriâ sponte & privatâ authoritate, contra expressa Magistratus supremi Edicta, conventicula fecerunt, in quibus absentes, inauditos, indefensos Arminianos subscriptione manuum suarum damnarunt: Qui schisma absque ulla præeunte Classicali aut Synodali legitimâ Sententiâ, inauditâ & indictâ adhuc causâ, aut fecerunt, aut factum approbârunt, ita ut manu sua testarentur, se ex officio teneri Arminianos agnoscere pro ijs, cum quibus licitum ipsis non esset conventus ullos celebrare, eoque pro membris cætuum suorum habere: Qui schismatis istius ope Synodum sibi procurârunt, in quâ

P 5

ij ipsi,

rentiam ferrem. Nempe, jam ante damnaverant eam in Conventiculis & Coitionibus suis, additâ manuum suarum subsignatione; damnationem factam secessione & schismate aperto ratam & testatam publicè fecerant: Tempa, loca publica, contra Edicta, obsistentibus Magistratibus, per vim invaserant, ut Magistratus, quos exauthori privilegia Patriæ vetant, de statu suo deturbarentur, & in eorum locum adscisceretur, quos sibi addictos noverant, operam dederant: fama Principis Aurantiæ, qui schismati jam se miscuerat, & eorum omnium, qui mutationis illegitimę authores fuerant, in Belgio laborabat, si aliam quàm damnationis Sententiam ferrent: Iam ingentia stipendia, lauta Ministeria & imperturbatam quietem spe præceperant, & tantum non devoraverant. Interfuit itaque multis modis eorum, à quibus damnati sunt Arminiani, ut non aliam quàm eam, quam tulerunt, Sententiam ferrent.

Objectionem Decimam non capio, nec scio unde eam depromserit Capellus. Credo eum umbram aliquando pro argumento sumere, & Andabatarum more pugnare.

OVK IDEN, ALL' EDOKESEN IDEIN DIA
NO NVKTA SELEBENEEN.

Obiectio Undecima habet vim & colorem,

rem, si rectè proponatur; sed ita frigidè & dilutè eam proposuit Capellus, ut studio vim & ictum ejus declinasse videatur. Ita enim ait: *Omnes aut plerique, qui Arminij Doctrinam damnarunt, multis modis Sententiam suâ patefecerant, eoque partes fecerant.* Quis enim nervus in hoc Argumento est? quod robur? Qui sententiam suam patefacit, non excidit propterea potestati judicandi, neque sententiam suam patefaciendo statim partes facit. Puer hæc videret. Argumentum in robore si velit Capellus, hunc in modum formandum fuerat:

Qui antea, nullo ordine Ecclesiastico servato, suâ propriâ sponte & privatâ authoritate, contra expressa Magistratus supremi Edicta, conventicula fecerunt, in quibus absentes, inauditos, indefensos Arminianos subscriptione manuum suarum damnarunt: Qui schisma absque ulla præeunte Classicali aut Synodali legitimâ Sententiâ, inauditâ & indictâ adhuc causâ, aut fecerunt, aut factum approbârunt, ita ut manu sua testarentur, se ex officio teneri Arminianos agnoscere pro ijs, cum quibus licitum ipsis non esset conventus ullos celebrare, eoque pro membris cætuum suorum habere: Qui schismatis istius ope Synodum sibi procurârunt, in quâ

ſi ipſi, qui damnationem iſtam præviã aut fecerant, aut approbaverant, ſoli ſederent Iudices, ſi non poſſunt eſſe idonei aut legitimi Iudices in cauſſâ iſtâ, nec jure ullo citare poſſunt ita à ſe illegitimè prædamnatos, iſque imperare, ut damnatores & ſchiſmaticos iſtos pro legitimis cauſſæ iſtius iudicibus agnoſcant:

At ſi, à quibus damnati ſunt Arminiani, vel omnes, vel plerique ſaltem, iſta omnia ante fecerunt. Ergo.

Minorem hujus Argumenti, ſi quis fortè de eâ dubitet, ſolennibus Actis ipſorum Contra-Remonſtrantium, multisque alijs documentis probatû videre poterit in Actis & Scriptis Synodalibus Remonſtrantium, pag. 42. 43. 44. 45. Partis primæ: Neque diffitebitur eam, quiſquis rerum Belgicarum cognitione vel levi imbutus eſt.

Itaque ad Argumenti Majorem etiã tantum reſpondet Capellus: *Conſequens illud ego pernego*, inquit. At quo jure? *Damnarit*, inquit, *Prætor Titium: num propterea non licebit Prætori in conſimili cauſſâ de Sempronio ſententiam ferre?* Non agitur hîc de ſimili, ſed de eâdem cauſſâ. 2. In eâdem cauſſâ ut ſententiam bis ferat Prætor, ne jura quidem ſinunt. In appellationibus res eſt manifeſta. 3. Poſito quòd id bisliceret Prætori, certè
non

non liceret tamen, nisi antea legitimè sententiam tulisset. At damnarit Prætor Titium inauditum, indefensum: damnationem ejus obreptitiè & subreptitiè procuraverit: extra ordinem & confessum Iudicum sententias eorum ambiverit, prensaverit ipsos Iudices, ut non judicarent aliter quàm contra Titium: tribunal erexerit, ut in eo sententia clam lata executioni mandetur; conqueratur de eo Titius, doceatque rem ita gestam Argumentis omni exceptione majoribus: Quid? an Prætorem ejusmodi idoneum Titij Iudicem dices? Non crediderim. Quod si Prætor ejusmodi judex esse non possit idoneus in causâ ullâ, licet minimâ, quæ sæpe pretium exiguæ pecuniæ non excedit, quomodo Pastor, qui istorum omnium reus est, judex idoneus sedebit in causâ, quæ Deum, conscientiam, salutem nostram, & Ecclesiæ pacem spectat? Quicquid hîc operose responderet Capellus, id omne est extra hunc casum, & proinde ad rem nihil facit. Damnare potest Prætor in consimili causâ Sempronium, qui damnavit antea Titium, si legitimè damnavit. Sententiam potest ferre Pastor in pari causâ imò centies & millies, si modò ante legitimè sententiam tulit, & sine adfectu. At si illegitimè antea damnavit, idoneus

doneus toties est iudex , quoties sententiam in causa ista fert. Quare ineptum & impertinens planè est, quod de Alexandro in causa Arrij allegat. Damnaverit um Alexander in Synodis Ægyptiacis aliquoties , ut Capellus ait, utique non nisi legitime damnavit , ex animi sui sententiâ , in conventibus legitimis rogatus , jussu & ordine inter cæteros damnationem dedit. Nec excepit Arrius unquam , quod scio, contra Alexandrum eo nomine, quod clandestinis machinationibus , secretisque coitionibus , damnationem ipsius procuravit Alexander : Omnia ordine & ritè facta sunt, & ita facta esse narrat historia. Etiam si enim non defuerint postea ex Arrianis , qui Alexandro æmulationem & invidiam objecerint , quod Arrium præferri sibi videret; nemo tamen ex ijs Alexandrum illegitimi judicii postulavit. At in nullâ Synodo justâ damnati antea fuerant Remonstrantes. In conventiculis prohibitis cum importuno & illegitimo schismate, indictâ causâ, imò cum tolerantia à Magistratu supremo usque ad Synodi tempus aliquoties solenniter sancita esset , damnaverant eos illi ipsi , qui postea judicium in Synodo Nationali de causâ eorum sibi arrogarunt. Pone idem factum antea ab Alexandro contra

contra Arrium ; dicam Alexandrum inidoneum & incompetentem Arrij judicem fuisse & Arrium illegitimè ab eo damnatum fuisse. Idem dico de Ofio & de Afris atque Italis , in caussa appellationum transmarinarum. .

Objectio XII. planè est aliena ab hoc argumento. Non enim quæritur , an Synodus non possit esse idoneus Iudex suarum confessionum, & quæ earum genuina sit Sententia statuere ac pronunciare : Absit; Contrarium professos semper esse etiam ipsos Arminianos, id unum abundè docet, quòd in Synòdo revisionem Formularum istarum fieri posse ac debere judicaverint, ac defenderint. Sed quæstio , quam hîc movet Capellus , alterius planè generis est. Querebatur in Conventu præparatorio, An, quia iudicium de controversiis in Synodo Nationali erat faciendum juxta purum putum Dei verbum, si quando controversia movenda esset de ipsis Ecclesiarum Formulis, anne videlicet ubique verbo Dei consentanea continerent, ij, qui juramento Formulis istis obstricti atque obligati, & in Synòdo illa iudices sessuri erant, durante isto actu judiciali , ab obligatione & juramento illo absolvendi non essent? Asserebat id Arminius & tres alij, qui ad
Con-

Conventum istum evocati erant. Reliqui negabant. Rationes, quas pro parte suâ adferebant Arminius & qui cum ipso sentiebant, tam sunt graves & solide, ut hactenus nihil viderim, quod vel probabiliter illis reponi possit. Sed Quæstionem illam hîc non tracto. Sufficit mihi, si ostendam Capello, diversam esse hanc Quæstionem ab istâ, de quâ hoc loco agitur, eumq; METABAIN EINEIS ALLO GENOS. Itaq; totû illud, quod Thesisibus 22. 23. prolixè adfert, huc non quadrat. In exemplo, quod ipse adfert, rem claram facio. *Si quis palam iniquitatis damnet leges publicas*, inquit, *in quarû verba juravit Magistratus, num spoliabitur jure suo?* Non Capelle. Sed si Magistratus ipse censeat leges publicas, in quas ipse juravit, examinandas & revidendas esse, anne videlicet leges illæ, in quas juravit, sint leges, quæ verbo divino aut rectæ rationi sunt cōsentaneæ: anne existimas, Magistratum, cum examen istud instituit, legibus illis obstrictû manere, ita ut eas pro legibus justis, juxta juramenti sui formulam, habere teneatur, & interim idoneum ejus rei judicem esse posse, an illæ justæ sint? Certè nemo potest rei istius judex esse, cui aliquomodo obstrictus est. Iudicij enim actus est actus juris & potestatis superioris in illud, de quo judicium est

est faciendum. Et hæc caussa fuit, cur Protestantes olim judicaverint necessarium habendo Concilio œcumenico, ut Pontifex Romanus Episcopos, Prælatos & Antistites Ecclesiarum, quotquot fide datâ & jurisjurandi vinculis obstrictos sibi habebat, ijs vinculis primum solveret, & juramenti gratiam omnibus faceret. Similiter Neostadienses monent, ut ad Synodum non veniant jurati in ullam Confessionis particularis aut privatæ formulam. Quicquid itaque extra hunc controversiæ statum adfert Capellus, id extra oleas est.

Objeçtio XIII. non continet Argumentum, aut quicquam, quod justæ rationis vim habet, sed tantum circumstantiam, quæ ad illustrandam rationem aliquam, eamque probabiliorem faciendam AVXESIOS causlâ adferri solet. Nemo tam ineptus est, ut velit eum, qui judex sententiæ alicujus est futurus, ita liberum esse à judicio omni, ut de re istâ, quæ in controversiam vocatur, judicium nullum unquam apud se formaverit. Absit. Quis enim ita vacuum, ita indifferentem animû in hoc mundo reperiat? Tantum requiritur ad hoc, ut quis sit idoneus judex controversiæ alicujus, ut animû non adferat, ita ad unam controversiæ partem determinatum, quin rationes ex alterâ parte

parte positas ex æquo & bono examinare velit. Et hoc est præjudicium illud, quod abesse debet ab omni justo ac legitimo iudicio. Itaque non voluerunt Arminiani, ut ad Synodum venirent, qui neutrius partis sententiæ addicti essent: sic enim se ipsos excludere opus habuissent: tantum dicebant eos, qui Sententiæ suæ ita se addixerant, ut nollent in animum inducere aliam ullam veram esse posse, idoneos Iudices Sententiæ istius, quando ea in controversiam venit, esse non posse. Quare omnes eos, qui se Sententiæ suæ actu aliquo illegitimo ante iudicium obstrinxerunt, aut qui signo aliquo testati sunt, se à Sententiâ suâ recedere nolle, aut se sententiam suam ita certam credere, ut nullam rationem opponi posse persuasum habeant, ad iudicandum in idoneos iudices esse habendos censebant. Et cum huiusmodi essent omnes aut plerique Provinciales, qui ad Synodum convenerant, idque Argumentis sole clarioribus Remonstrantes demonstrarent: quomodo fieri poterat, ut eos causæ suæ iudices agnoscerent? Ineptum autem est, quod Capellus ait, *Si quis vehementior justo fuerat, & ultra quàm par esset progressus, qui tamen ad Synodum missus fuerat, id si planè ab Arminij doctrinæ fautoribus fuisset propositum*
his

his Synodus satisfacere potuisset. Quasi verò ea Synodi cura fuerit. Canat Capellus hanc fabulam alijs. Norant se mutuo damnatores isti, & mulus mulum scabebat: Non agebatur de uno atque altero: Plerique erant, quos citati nominatim omnes digito designare poterant, qui turbarum omnium authores & incentores fuerant. Acta privata & publica eorum ad manum habebant, quæ Belgium totum jam menses & annos aliquot oculis suis legerat: Schismata eorumque authores, præcones, vindices, non in Hollandiâ tantum, sed in Provincijs cæteris omnibus tam erant notorij, tam manifesti, *Quam solis esse radij olim cum sudum est solent.* Nec sciebant hæc tantum, sed & probare in se recipiebant, idque Synodo in os dicere non reformidabant: Si quid frontis habuissent, plerique conscientia suæ morsum tegere non potuissent. Sed sedebant Patres, non ut accusatores sui audirent, sed ut alios pro arbitrio suo judicarent. Itaque hæc surdis dicebantur.

Objectio XIV. Etiam ij, qui schisma non fecerant, ab alijs factum probabant. Ita est. Quid hic respondet Capellus? *Non est necesse,* inquit, *singula secessionum istarum momenta perpendere.* Imò verò, mi Capelle, id omnino necesse est, quia ex istis bene

Q

per-

perpensis pendet tota juris hujus quæstio. *Longius*, inquit, *nos abduceret hæc facti quæstio*. Imò verò hæc facti quæstio recta te-
ducet ad quæstionem juris intelligendam. Si enim factum est ab ijs, qui in Synodo se-
derunt, id, quod factum ab ijs esse asserunt Arminiani : jam ij, qui in Synodo sede-
runt, causæ illius, de qua quæstio fuit, le-
gitimi judices esse non potuerunt. Si factū
id ab ijs non est, nega, aut da ijs, quæ facta
sunt, colorem.

*Juris quæstionem quod attinet, hoc affirma-
re possumus*, inquit, *non idem heterodoxis ad-
versus orthodoxos licere, quod orthodoxis ad ver-
sus heterodoxos*. Esto. Quid inde? An
propterea secessionem ab Arminianis face-
re licuisse dicēs adversarijs Arminianorum,
non vice versa? Quo jure? *Quod isti*, inquit,
orthodoxi essent, hi heterodoxi. Atqui, Ca-
pelle, quo judicio judicati erant orthodoxi,
qui Arminianorum erant adversarij, Armi-
niani autem heterodoxi? In qua Synodo?
in quo conventu legitimo? Docce id Ca-
pelle, & profer tabulas. Si id non potes,
uti revera non potes, vide annon ipse te
tuopte gladio lædas. Arminiani non e-
rant judicati heterodoxi ullo judicio publi-
co ac legitimo in Ecclesia, & tamen erant
ejusdem cum cæteris Ecclesiæ membra:
Cæteri

Cæteri secesserunt ab Arminianis : utri ergo orthodoxi ? Verbis tuis utar. *Cuiusquam Pastori licuit impune facere schisma ?* Si nulli impune licuit schisma facere , utique qui schisma fecerunt, in noxa & culpa sunt, non Arminiani, à quibus schismatici isti secesserunt. Illi itaque turbatores & heterodoxi, non hi. *At heterodoxus Pastor, aut Doctor nescis, duo requiruntur. 1. Ne quid doceas contra Dei verbum 2. Ne quid contra Fidei Formulas in Ecclesiâ, cujus membrum es, receptas.* Esto ; procedat etiam hæc definitio : quanquam ineptus est Capellus, cum heterodoxum non esse , confundit cum orthodoxum esse. Fieri enim potest, ut Formulæ in Ecclesia receptæ repugnent verbo divino. Quid itaque ? An, ut orthodoxus Pastor sis, requiritur, ut ne doceas contra Formulas istas , quomodo itaque docebit quis ita, ut non doceat contra Dei verbum, si non doceat contra Formulas illas, quæ repugnant Dei verbo ? Sed transeat hoc etiam SPHALMA. *Heterodoxus ut sis, sufficit ut in alterutrum pecces.* Et hæc definitio transeat. At hic jam ipsissima nascitur quæstio Capelle. Si inter duos Pastores non heterodoxos , id est, qui ambo videri volunt non docere quicquam contra verbum Dei , nec quicquam contra re-

Q 2

ceptas

ceptas in Ecclesia Formulas, controversia oriatur, eo quòd hic existimet, illum esse heterodoxum, id est, vel contra Dei verbum, vel contra receptas Formulas, vel contra utrumque simul sentire ac docere; ille verò hunc: uterque tamen ex Dei verbo & Formulis Ecclesiæ Sententiam suam propugnet. Uter horum erit idoneus causæ hujus judex? Neuter, inquam ego; quia uterque altera pars litis est. Quod si verò, Capelle, inter plures Pastores Doctoresq; eadem lis oriatur, quis eorum judex erit? Synodus, inquires fortasse. Rectè. Quid si pars eorum una id agat, ut cõitione facta, antequam Synodus haberi possit, partem alteram prædamnari curet, actuque prædamnet; quid si pars eadem Synodum convocari faciat, ita ut pars altera in totum ab eâ exclusa sit, quod ad judicandi actum attinet, ipsique qui jam multo ante prædamnârunt suos adversarios, soli in eâ judices sedeant? Quid? an partem istam partis alterius legitimum judicem dices? Hic vertitur ipsissimus cardo quæstionis, quem jam sæpe indicavi, & quem tamen Capellus aut per incuriam nunquam tangit, aut consultò semper dissimulat. Quare cum dicit: *Etiam si publicæ fidei Formula laborarent aliquo vitio, non continuò licet publicè doctri-*

nan

nam ijs adversantem docere ; ut ut verum sit, planè est APROSDIONUSON. Sed nec unquam Arminiani aliter aut senserunt, aut egerunt, uti in præcedentibus planissimè ostensum est. Nec ad rem facit, quod de exceptione addit Thes. xxvii. *Eam justam esse, quando tormentis silentium alteri parti imponitur* (quanquam ineptus meritò videri debeat Capellus, quòd solam tormenti exceptionem liberam relinquat). Quis enim nescit, alia esse, quæ viro bono tormento quovis graviora esse debent, & quæ non pauci plus quàm tormenta ulla metuunt? Et quando unquam in Concilio Tridentino tormentis silentium alicui fuit impostum? Quod verò Thes. xxvii. adfert, id non modò alienum est ab hoc proposito, sed contra Capellum ipsum directè facit. Populus enim Romanus, qui Fælicem Arrianum audire recusabat, idcirco id faciebat, quia fidem illam, quam Fælix sequebatur, in Synodo Nicæna legitimo iudicio damnatam esse credebatur. At qui in Belgio secessionem fecerunt, ij eam fecerunt, antequam Synodus ulla legitima habita esset, in quâ Sententia eorum, à quibus secessionem faciebant, damnata fuerat. Schismatici itaque veri erant, ac proinde incompetentes causæ istius, quæ in con-

troversiam veniebat, judices.

Objectio XV. *Qui potuimus, inquiunt, ritè condemnari, quum ne convicti quidem fuerimus?* Quis tam stolidus, Capelle, qui ita argumentetur? Plus per Dei gratiam sapiunt Arminiani, quàm ut pro tam justa causâ ineptijs ejusmodi pugnent. Verba ipsorum, quæ citas, tam apertè alium sensum continent, ut palpari possit. Ita enim inquiunt: *Convictos nos pronunciare Synodus ausa fuit. Itane ergo &c.* Negant Arminiani in Præfatione, non quòd ritè condemnari aliquis possit, nisi fuerit ante convictus; sed quòd convictus aliquis errorum dici possit, cui nullæ rationes ad errorem demonstrandum idoneæ sunt propositæ. *Ejecit nos Synodus, inquiunt, confessu suo: Conferre nobiscum recusavit, quia ad judicandum, non ad conferendum se venisse dicebat: Rationes nostræ Sententiæ audire noluit: rationes contrarias dare renuit, aut saltem non dedit; solo imperio egit omnia. Quomodo itaque nos convictos pronunciat?* Hoc Argumentum quâ verisimili exceptione eludi potest?

Sed respondet nihilominus ad rem Capellus: *Omninò, inquit, convicti fuistis tam solidè, tam legitime, quàm ullus unquam hæreticus in ullâ Synodo.* Itane Capelle? Quando? Quomodo? Quibus argumentis? Ne dispu-

disputatum quidem fuit unquam de veritate & errore. Quotiescunque citati petebant, orabant, supplicabant, ut rationibus ageretur, & error ipsis ostenderetur, toties frustra fuerunt. Collationi statim in ipso limine spes omnis intercidebatur. Quomodo itaque fuerunt convicti; quomodo convicti solidè? quomodo convicti legitimè? quomodo tam solidè, tam legitimè, quàm ullus unquam hæreticus in ulla Synodo? Certè si minus solidè adhuc convicti sunt, quotquot unquam fuerunt heretici, ego ausim dicere, nulli unquam hæretico à Synodis, à quibus damnatus fuit, datam fuisse causam discedendi ab errore suo; imò causam justissimam fuisse datam in eo permanendi & moriendi, quantum ad Synodos attinet.

Atqui, inquit Capellus, ad legitimam convictionem non ea, quæ volunt, requiruntur. Atqui, inquam ego, quænam sunt illa, quæ requirunt ad convictionem? *Confessionem,* inquit Capellus. Quod si Remonstrantes eam omnino requisivissent in materiâ Religionis & conscientie, fortasse nõ omnino à veritate aberrassent, saltè dixissent id, quod quisque in causâ suâ, cum ab alio convictus solidè esse dicitur, dici ac credi cuperet; ac proinde quod alteri

eodem & pari jure concedere deberet. Sed
 & falsum est, eos ad convictionem requi-
 rere Rei confessionem : Nullum ejus rei
 vel levidense est indicium in verbis alle-
 gatis: Tantum dicunt, eum, qui convictum
 aliquem pronunciat, jure id pronunciare
 non posse, nisi prius ei, quem convictum
 pronunciat, rationes & argumenta propo-
 fuerit, quæ vel convincendo ipsi idonea
 putavit, vel actu convicisse credit : Ubi
 id non fit, ibi convictionem locum habere
 posse negant; saltem ibi pronunciari jure
 posse non existimant; quòd quis convictus
 sit. Enimverò satis non est ad hoc, ut quis
 convictus pronuncietur, ut is, à quo con-
 victus dicitur, rationes justas se habere sibi
 persuadeat, quibus ipsum convinci posse
 credit: necessum est ut is, qui convictus di-
 citur, rationes illas audiat & examinet, ut
 si vel omninò nihil reponat, vel quod re-
 ponit tale sit, ut planè sit frivolum ac dilu-
 tum, convictus deinde dici aut credi possit:
 Alioquin, si ad convictionem satis est, ut
 is, à quo aliquis convictus dicitur, rationes
 satis graves se habere credat, quas ad con-
 vincendum aliquem credit sufficere; jam
 etiam errorum convicta dici potest Syno-
 dus à Remonstrantibus; imò majori jure
 ab ijs convicta, quàm Remonstrantes con-
 victi

viâi dici possunt à Synodo. Remonstrantes enim non tantum obtulerunt Synodo, sed ad rationes dandum paratos esse, sed etiam dederunt scripto consignatas rationes suas Ordinum Deputatis, à quibus Synodus eas habuit & legit : At Synodus rationes suas nunquam dedit, aut dare voluit Citatis, ut eas examinarent aut expenderent.

Objectione XVI. non continetur Argumentum novum, sed carpitur tantum lacinia quædam Præfationis, quam Actis & Scriptis suis Synodalibus præmiserunt Remonstrantes. Nullo jure. Scopus enim loci istius & pæne Præfationis totius est, ostendere, si quando quæstio aliqua de rebus fidei, non præcisè creditu, factu, aut speratu necessarijs, incidit in Ecclesia, operam dandam esse ante omnia, non ut statim, quoquo modo lis ista terminetur & decidatur in alteram partē, uti Synodus Dor-dracena alięque plures sæpe fecerunt, sed ut terminetur eâ viâ, quę cum minima partium offensione conjuncta est, & quam equitas & mansuetudo Christiana dictant optimam esse : Breviter, quam ipsi nos iniri optaremus, si propria nostra causa ageretur. Eam viam esse duplicem, ut vel placidis gravibusque rationibus veritas errantibus persuadeatur: vel, si id primâ instan-

tiâ, alterâque aut tertiâ fieri non possit, via quædam media queratur, qua partium offensio vitetur, litium periculo obex ponatur, & commodè interim occasiones, ad veritatis amicam persuasionem; aperte liberèque relinquuntur. Quid poterat rectius, placidius, aut utilius dici ab ijs, qui Deum in his terris iudicium nullum ordinarium reliquisse credunt, ex quo omnes Christianos pendere necesse sit, & veritatem simul atque pacem in Ecclesia Christi conservatam cupiunt? Nimirum, contrarium passim in orbe Christiano fieri observabant. In Synodis omnibus id tantum agi videbant, ut externæ quieti consulatur, & simul atque aliquis litem aliquam novam movere incipit, unde pax ista turbari videtur, statim de authore ejus opprimendo cogitur: non tam spectari errantium instructionem, quàm destructionem, non tam errorum solidam & amicam confutationem, quàm superbam & magistralem damnationem: nec tam dissentientium pacem & conciliationem, quàm divisionem: atque inde odia & schismata atrocissima nasci, quæ plurimorum malorum causæ sunt. Quid ad hæc Capellus regerit? Sarcasticè tantum ait: *Nempe, nisi Synodus tamdiu disputandi licentiam faciat, donec utraque*
pars

pars satisfactum sibi profiteatur, nihil egit pie; victoriam non veritatem quæsit. Sed nec hoc dicit Præfatio; tantum dicit, eam esse Synodorum veram atque unicam gloriam, quando in id vlribus omnibus incumbunt, ut utrique parti satisfiat, & non tantum id operâ dant, ut quovis modo judicio aliquo peremptorio enatas controversias, veluti in herbâ, opprimant aut sopiant. Sic enim non tam veritati studeri, & mutux paci, quàm externe tantum & imperturbatæ unius partis quieti, quæ nil nisi carnalis quies est, & plerumque cum partis alterius offensione conjuncta est. Dicit autem hoc Præfatio, ut ostendat, quàm longè à rectâ viâ deflexerit Synodus Dordracena, quæ non ad conferendum, sed ad judicandum se congregatam dicebat, & tantopere sollicita fuit de opprimendis ijs, quos errare credebat, ut de ijs instruendis ne cogitare quidem voluerit, nihilque ægrius tulerit, quàm quod judicio isti remora injiceretur ab ijs, qui collationem offerebant; imò qui orabant supplices, ut vel persuaderi ipsis posset veritas, si errarent, vel via inveniri ad mutuam pacem & concordiam. *Ecquæ verò Synodus*, inquit, *unquam id fecit?* Imò verò, inquam ego, *ecquæ fuit unquam pia Synodus, quæ id non fecit?* Quotquot
unquam

unquam habitæ fuerunt, (factiosas & LEE-
 STRIKAS semper excipio) ex , si quando
 inter ipsos Episcopos controversia aliqua
 nata esset , quæ prioribus sæculis definita
 non erat , & quæ fundamentum fidei præ-
 cisè atque immediatè non tangere credebatur,
 istam , quam diximus , viam semper in-
 stiterunt. Nunquam progressæ sunt ad de-
 cisiones : Apparuit id in materia de Præ-
 destinatione , quam ipse Capellus fassus est
 nullis unquam Synodis definitam fuisse , &
 de quâ placidè interim atque amicè adeò
 semper inter Episcopos velitatum est , ut
 Cælestinus Papa in Epistola ad Galliæ E-
 piscopos hac de re consultus , hac conclu-
 sione uti non dubitaverit : *Profundiores
 verò difficilioreſque partes intercurrentium
 Quæſtionum* (difficillima autem erat ea de
 Prædestinatione) *quas latius pertraxerunt,
 qui hæreticis restiterunt, sicut non audemus
 contemnere, ita non necesse habemus adstruere:
 Quia ad conferendum gratiam Dei, cujus operi
 ac dignationi nihil penitus detrahendum est, sa-
 tis sufficere credimus, quicquid secundum præ-
 scriptas regulas Apostolicæ sedis nos Scripta do-
 cuerunt, ut prorsus non opinemur Catholicum,
 quod apparuerit præfixis Sententijs esse contra-
 rium.* Eodem modo semper actum , eti-
 am cum primùm controversia incideret de
 ca

ea re , quam ad fidem pertinere postea iudicatum fuit. Ipsa Synodus Tridentina, quicquid eam tyrannicè supra alias omnes egisse velit Capellus , istius tamen æquitatis fuit retinentissima. Quæcunque Sententia in quæstionem veniebat, ea publicè & palam diu multumque agitabatur ; & quia nulla fere erat , in qua non diversi à se invicem abibant Episcopi , Doctores & Magistri, nihil aliud pæne agebat Synodus , sæpe mensibus aliquot, quàm ut aut rationibus , quæ præponderare videbantur, dissentientes in unam atque eandem Sententiam adduceret ; vel , si id fieri non poterat , leni aliqua conciliatione eos inter sese conciliaret ; vel , si nec hoc fieri poterat , libertas sua cuicque sentiendi concederetur , atque ita pax & concordia retineretur. Et quid aliud fecit ipsa Synodus Dordracena , postquam fores publicas claudere cæpit , & secretò quæ inter Doctores Pastoresque erat non levis dissensio , componere studuit? Quomodo egit cum Gomaro, cui cum persuadere non poterat, ut in eam, quæ communis omnium esse videtur , Sententiam de Predestinationis Objecto (quanti autem momenti ea sit in antecedentibus clarum fecimus) descendere: An non concordie & pacis

pacis retinendæ causâ viam mediam quæsi-
vit, id est, protestationem ipsi suam liberam
reliquit, & ut ea in Actis publicis exstaret
permisit? Quomodo cum Martinio egit, qui
Sententiam suam de morte Christi ita dixit,
ut cum Remonstrantium Sententiâ ad un-
guem conveniat? Annon persuadere ipsi
sunt conati sententiam suam, & cum id non
possent, viam mediâ repererunt, & isto mo-
do Articulos suos concinnarunt, ut ille sine
ullâ protestatione ijsdem se bonâ conscien-
tiâ subscribere, & nihilominus propriam
suam Sententiam retinere posse crederet? Et
quamdiu, quàm operosè, quàm prolixè eâ
in re sese occupavit Synodus? Quod si hac
in re à Synodo rectè ac piè actum vult Ca-
pellus, cur ægrè fert, quod eandem æquitatè,
eandem pietatè requisiverint in causâ sua ijs,
qui Coëpiscopi, Sympresbiterique erant
eorû, qui in Synodo iudices sedebant? An-
non gloria Synodi Dordracenæ hæc vera
atque unica fuisset, si cum ijs eodè modo e-
gisset, & ad non necessariâ decisionem, sine
ullâ collatione, aut saltem sine ullo conci-
liationis studio non profiluisset?

*At, inquit Thes: XXXII. Dordracenis
Patribus id in votis fuit vel maximè, ut Armi-
nianos pondere rationum suarû ad frugem revo-
carent. At, inquâ, si in votis id ipsis fuit, cur
quæso*

quæso detrectârunt collationem? Cur se nō ad conferendū, sed ad judicandum convenisse dicebant? Cur, cum rationibus secum agi, & conscientijs suis satisfieri orarent Citati, imperio, edictis, decretis statutisque tantum egerunt?

Sed id ab illorum pervicaciâ non poterant impetrare, inquit. At quæ, obsecro, pervicacia ipsorū, non dico fuit, sed esse potuit, quando rationibus non agebatur cum ipsis, sed jussibus? An in eo quod optarent, orarent & supplicarent identidem, ut rationibus secum ageretur, pervicaciâ eorum sita fuit? Jubentur Synodum agnoscere legitimum judicem; non possunt per conscientiam: rationes adferunt, & ad eas ut sibi satisfiat petunt: Non dantur, aut si quæ dari videntur, idque obiter, non permittitur illis respondere, sed jubentur parere. Non cedunt, non quia non volunt, sed quia non possunt: Rationes obstant. Quid? an hæc pervicacia est, Capelle? Contrarium verum est: pervicaciæ rei coram Deo fuissent summo jure, si tam manifestis, quas habebant, rationibus non cessissent, aut tam iniquis jussibus Synodi morem gessissent. Similiter citati fuerant ad Synodum disertis & amplissimis verbis ab Ordinū Delegatis, ut
in eâ Sententiam suam (verba sunt literarum
 Cita-

Citatoriarum.) *de dictis quinque Articulis liberè proponerent, explicarent, ac quantum esse necessarium existimarent, defenderent.* Postquam propositionem fecerunt Sententiæ suæ, statim, quia credo liberè satis ea facta fuerat, interponit se Synodus, explicationem liberè eos facere non sinit, sed eos intra certa quædam interrogatoria, ad causam ipsorum odiosam reddendam & libertatem concessam penitus tollendam, pædagogico quodam ritu, puerorum aut potius servorum instar, concludit: ad ea ex tempore eos jubet respondere, & quidem singulos, ut nimirum concordēs divideret. Manifestè iniqua hæc erat agendi ratio & literarum Citatoriarum tenori repugnans. Parere tamen se nihilominus velle profitentur, si modò quod ipsis literæ Citatoriæ concedebant, liceat ipsis deinde liberè Sententiam propositam explicare & defendere, quantum ipsi necessarium judicarent: Hæc enim sunt ipsissima verba literarum Citatoriarum. Negat Synodus: ad interrogata respondere eos singulos jubet, & sententiam suam explicare ac defendere, *non quantum ipsi, sed quantum Synodus necessarium esset judicatura, ad Dei gloriam, suam instructionem, Ecclesiæ edificationem & conscientiarum tranquillitatem.* Quis
hîc

hîc non videt, Synodum utrâque manu subtrahere & subducere ijs voluisse id, quod liberaliter literæ Citatoriæ concedebant? Non poterant Citati bonâ conscientia, sine divinæ gloriæ, sine veritatis præjudicio, sine Ecclesiarum offensâ, libertatem hanc Citatis omnibus jure communi debitam, & ipsis speciali literarum Citatoriarum beneficio concessam, deferere, aut ex adversariorum suorum, à quibus jam ante damnatos se sciebant, arbitrio causam suam agere. Itaque non cedunt, sed jus suum sibi concessum ac debitum postulant. An hîc pervicacia locum habet? Iudicet quisquis animum judicio liberum habet: Ponat se loco nostro, & an aliter agendum sibi putaret apud animum suum statuatur.

Quod Capellus Theſ:XXXVIII.dicit, Citatos negasse, se ad suæ Sententiæ defensionem accessuros, nisi sibi permetteretur libertas refutandi quævis *Contra-Remonstrantium, sive viventium, sive pridem defunctorum, super eâ re scripta*, id plane falsum est. Nunquam petierunt istam libertatem sibi concedi. Vide sis Acta in lucem edita, & falsitas apparebit. Sed posito, quod eam petijssent, eo quod judicarent absque ea Sententiam suam liberè explicari & defendi non posse, quantum necessariû esset; quid? an iniquum

R petijssent?

petijſſent? An jure illud negare ijs potuiſſet Synodus , ſi modo Scripta iſta modèſtè ſe citaturos & intra præſcriptum tempus ea ſe refutatu- ros promitterent? Quam cauſſā ha- buiſſet Synodus id iſtis denegandi, cum ex- preſſè eos citaviſſet, ut Sententiā ſuam de- fenderent, quantum iſti, non Synodus, ne- ceſſarium eſſe judicarent; &, etiamſi ita non citaret, Citatis omnibus jure communi cō- cedi debeat , ut ſententiā ſuam tueantur ac defendant, prout iſti neceſſarium judicant? Concludo itaq; & retorqueo Argumentū: Non modò nō habuerunt Dordraceni Cal- viniſtæ cauſam juſtam , cur ſilentiū Citatis imponerent & diſſenſioni finem impone- rent; ſed cauſam habuerunt Citatis ſatisfa- ciendi, priuſquam judicarent.

Atqui, inquit Capellus Objecti. XVIII. iſti Citati fatentur in Præfatione jam alle- gatā: *Quæcunque hætenus effugia aut ſophiſma- ta ſpecioſa à Contra-Remonſtrantibus adducta eſſe obſervavimus, aut adduci poſſe verifiſimiliter iſti judicavimus, ea, quantum per tempus licuit (durante ſcilicet Synodo) curſim & ſtriſtim ex- aminavimus, ac pro virili noſtrā deteximus &c.* Hæc cum ita ſint; quid tandem obtendere poſ- ſunt, quo minus dicantur auditi quàm patientiſ- ſimè? Adeoque rogare velim, ecquæ Synodus unquam Citatos patientius & diutius audi verit, iſſque

ijſque plus temporis dederit. ad rationes ſuas, tam
 KATASKEUASTIKOOS , *quàm* ANASKEU-
 ASTIKOOS enarrandas?

Reſp. Atqui eo ipſo, quòd verba iſta al-
 legas, & deinde id quæris, inſcitiã tuã pro-
 diſ. Nam. 1. Synodus nō dedit Citatis tem-
 pus illud: jam eos ejecerat, & ſe cum illis
 commune quicquam habere amplius nolle
 pronunciaverat, antequã Scripta iſta Citati
 inchoarent. Deputati Ordinum hanc ipſis
 gratiã fecerunt, ſive quòd æquiores videri
 vellent Zelotis iſtis Synodalibus, ſive quòd
 ex tã iniquã & irrationabili actiōne Synodi
 indelebile infamiam metuerent, ſive quòd
 ita convenerat cum Synodo, ut interea ſe-
 creti licentiã fueretur Synodus, ejectis ijs,
 qui rationum ſuarum claritate iniquas ejus
 actiōnes Belgio conſpiciendas dabant. 2.
 In ijs ipſis verbis, quæ citas, vides eos de
 temporis anguſtiã diſertè conqueri. Et
 ita certè res ſe habebat: Media hieme, u-
 rente frigore, de graviffimis rebus jubeban-
 tur ſepe conſignare & parata habere ſcri-
 pta ſua intra 7. 8. 9. dies, quę vix interea
 deſcribi niſi per complures Amanuenſes
 poterant: ſaltem ad quæ dignè meditanda
 & conſignanda menſiū aliquot ſpatio opus
 fuerat. Videantur eorum ea de re que-
 relæ, quas Deputatis & ipſis Ordinibus

non unâ Epistolâ notas fecerunt. 3. Posito tamen etiam, quòd temporis satis habuissent, quòd patientissimè auditi fuissent, quid hoc ad rem fecisset? Nihil unquam reponi istis audiebant: nullas rationes in contrarium à Synodo allatas viderunt, unde, quid in Scriptis istis desideraret Synodus, intelligere aut accuratè perpendere poterant. Atque hinc est quòd dicant, se opus habuisse ut refutarent, quæ ipsi suo pte ingenio judicarent verisimiliter à Synodo in contrarium adduci posse. Nihil itaque causæ habuerunt, unde convincerentur de errore suo: neque ratio fuit, cur convicti de errore suo pronunciari potuerint. Orationes quædam recitabantur ex chartâ aliquando, quibus carpi videbantur lacinix quædam Scriptorum istorum, sed ex sæpe ita frigida erant & jejuna, ut quibus argumentis pugnarent intelligi non posset. 2. Ijs interesse Citati prohibebantur. 3. Earum apographa Citatis, quum humiliter & reverenter sibi dari orarent ab ijs, qui eas recitaverant, ex professo negabantur. 4. An Synodus tota istarum Orationum fundamenta & argumenta pro suis agnosceret, incertum erat. Denique erant istæ Orationes fere Exterorum, qui satis demonstrabant, se in istis Controversijs tractandis ita hospites

tes esse, ut sæpe Controversiæ punctum & præcipua difficultatum momenta ne quidem attingerent, uti non rarò fatebantur ij ipsi, qui cū ipsis alioquin sentiebant. Nempe pro formâ & dicis causâ omnia ista fiebant, ut Theologos Exteros HOMODOXOUS esse (quasi verò de eo quisquam dubitaret) omnibus ista ratione innotesceret.

Atqui tamen Episcopus pag. 34. *de Exteris melius se sperare dicit, quàm de Provincialibus.* Ita est, & meritò. Neque enim ij secessionem aut schisma fecerant, factòve ullo, quod Citatis constabat, illud approbaverant; etiamsi non ignorarent, eos omnes contrarię Sententię non tantùm addictos, sed & defensores illius esse satis acres. Non multò post tamen frustra se illud sperasse intellexit, cum de schismate ageretur, & Citati schismatis istius authores facerent plerosque Provinciales. Tum enim, priusquam adhuc de Quęstionibus agi ceptum esset, priusquam Synodus Sententiam suam dixisset de Controversijs, schisma illud fieri jure potuisse dixerunt, eo quòd Arminiani à veritate ipsa primi secessionem fecerant. Et fuisset hæc una omnium Exterorum vox, nisi Helvetij judicium istud immaturum correxissent, & damnationem præcipitari, antequam examen causę

R 3

factum

factum esset, monuissent.

Atqui secessionis hujus damnant Arminiani non primos tantum ejus authores, sed etiam approbatores. Rectè. Quid ni Capelle?

At cum Magistratus eam non impediret (quod de Deputatis Ordinum, qui exhortationes factas à Synodis approbabant, adjungit Capellus, huc non facit: id enim alterius generis quæsitum est) *inter approbatores numerari poterat. Resp. At ut Citati hos etiam schismaticos dicerent, opus non habebant: nec enim ij sedebant Iudices in Synodo, sed tantum inspectores: neque post latam Sententiã Iudicium suum unquam dicere voluerunt, sed tantum quid actum esset referre se dixerunt. 2. Eos nominatim semper distinguebant ab Ecclesiasticis. 3. Quid si idem dixissent, an fallum dixissent, Capelle? Certè si Ecclesiastici schismatici revera erāt, certè, quisquis schisma illud probabat, atque imprimis is, qui schismaticis istis judicandi potestatem dabat de ijs, à quibus ij secessionē illegitimè fecerant, ij crimen & culpā istā nullo juris titulo evadere poterant. Sed quid hoc ad re faciebat, sive id credere se diceret, sive nō? Ad invidiã eorū augendā id tantū pertinebat, quasi non satis malorū sustinerent, quod corā tam iniquis Iudicibus, tam capitalibus inimicis,*

inimicis , juberentur causam suam dicere, non aliter quàm rei & pænè è vinculis.

Sed mentiebantur apertè, cum dicebant , aliquos è suis exauctoratos nullo præeunte judicio Ecclesiæ. Bona verba, Capelle. 1. non dicunt id , sed dicunt se & suos HOMOPSEPHOVS omnes ex albo Ecclesiæ expunctos fuisse à Contra-Remonstrantibus , eo ipso quòd Contra-Remonstrantes secessionem ab ijs fecerant , & quidem in forma hac, *Quòd non agnoscerent ipsos, cum quibus licitum ipsis esset conventus ullos celebrare, aut eos pro membris suorum Cætuum habere.* Quid ? an non hoc est expungere nomina eorum ex albo Ecclesiæ ? Si mentiti hîc sunt , Capelle , quod id nullo præcedente judicio Ecclesiæ factum sit ; da igitur judicium illud, quod in legitimo cætu factum est. Si non potes hoc dare, fatere igitur te, si non mentitû esse, ne jure talionis tecum agam, sed mendacium aut saltem falsum dixisse.

Objectio XIX. *Ecclesiasticos plerosque Provinciales schismatis reos jure diximus : testantur id ipsum diremptæ in duas partes Hollandicæ, Ultrajectenses, Gallicæ & Transisulanæ Ecclesiæ, idque Contra-Remonstrantium studijs.* Quid ad hanc Capellus? *Ut id demus, inquit, Belgij ceteræ Provinciæ, quæ tale nihil admiserāt, quo jure quatuor istis accensentur?* Ad hoc jã

responderunt Citati : eas schismati fovendo sedulam operam commodasse. Vin' fidem tibi fieri de Frisijs ? ipsum tantum Synodi Præsidem intuere, & quid Hagæ schismati authorando fecerit vide. Actiones ipsius loquuntur, & quæ non in angulo (Deus has & non pauci alij norunt) sed quæ coram sole gestæ sunt. Vin' de Zelandicis? Fiduciarias tantum earum literas, quibus ad Synodum suos Delegatos instructos voluerunt, consule, & intelliges, eas in mandatis dedisse Delegatis suis, ut ne in tolerantiam mutuam unquam consentirent. Vin' Groeninganas Ecclesias ? respice tantum earum deputatum Hillenium, & videbis schismatis antesignanū & primipilum. Plura non allego, ne claritudinem solis lumine candelæ adjuvare velle videar. Cætera, quæ sequuntur, aut jam in præcedentibus sunt refutata, aut nihil habent, quod non potius malevolum Capelli animum, quàm judicium examine dignum, arguit. Nempe non satis fuit illi damnasse Remonstrantium Sententiam : quicquid vel à Synodo, vel à Delegatis, contra eos actum actitatumve est, id omne ad usque minimum quemque apicem, cum elogio superlativo, pro more suo, laudat. Detentionem Citatorum in urbe Dordracenâ factam contra omnia liberę Synodi

Synodi jura, contra fidem datam, contra naturę, sanguinis & conjugij leges, contra omnem rationem, tanquam opus justissimũ prædicat & extollit : Pænâ dignos fuisse censet, quos conscientia ipsorum non sinebat aliter facere. Credo, si eos vivicomburio aut laqueo adjudicassent Proceres, venalem ad idem prædicandum linguam suã, venalem calamum fecisset. Ego nihil aliud opto, quàm ut Deus ipsi ignoscat tantam inclementiam, & non in eas angustias eum venire sinat, ut experiri opus habeat, quàm sit grave conscientię suę satisfacere, & propterea tamen pænâ dignum censeret. Dic enim, obsecro te Capelle, cur pænâ ista eos dignos fuisse censes? An propter contumaciam? Ita videtur. Sed quæ contumacia in libera Synodo locum habet, ubi rationes obtenduntur, ubi Sententiam cuique suam liberè dicere licet? Quis in ea cedere cogitur, qui se per conscientiam cedere non posse profitetur? qui rationes adferri orat, quibus, licere sibi ut cedat, persuadeatur; paratus, ubi id fit, statim cedere, & cui tamen rationes nullæ dantur? Si dicas, conscientia prætexebatur, jam eos necesse est ut facias impios, & Dei Numinisque omnis contemptores, & quod culmen est profanitatis, ΑΡΕΕΛΓΕΕΚΟΤΑΣ, ut contumaces eos


dicās. Quod quo jure facias cogita.

At hæc qualiscunque punitio eò potissimum spectabat, ne possent ante Synodum solutam turbas edere, quæ Synodi consilia frustrarentur. At cum Synodus sententiam nondum dixisset, cur puniebantur? An non satis apertè significas Synodum punivisse eos, & doctrinam eorum turbationis causam judicasse, antequàm de ea ad huc statutum esset, an vera esset, an falsa? Deinde, non obscurè fateris, Synodum totam eo tantum fine convenisse, ut eos damnaret; citasse eos, ut eos urbi isti veluti caveæ includeret, &, absentibus illis, Ecclesias eorum, tanquam possessionem vacuam, invaderet? Sed non opus est, ut hoc te significare voluisse judicem: res ipsa id testatum fecit, à principio ad finem usque. Denique, si omninò impedire voluissent Citatos, ne turbarent, quàm multa ad manum erant remedia, quibus uti potuissent Procures, ut sua Synodo libertas inviolata nihilominus mansisset. Sed concilia omnia aliò spectabant: Mutationi Reipublicæ, secessioni in Ecclesia, color deërat: fæditas utriusque nimis patebat: vi persequendum erat incæptum, &, ne omnis color deëset, Synodi Sententia requirebatur, ut non Regionis, sed Religionis negotium agi videretur. Ea simul atque

atque pronunciata, atque octavo mense in lucem edita fuit, protinus sanguine optimorum Civium ei parentari cæptum est. Nempe vitalis non solet esse partus, qui octavo mense editur. Concludens itaque dico, me libenter piorum omnium iudicio relinquere, an ea, quæ Capellus attulit, talia sint, unde appareat. 1. *eam fuisse Arminij Doctrinam, ut multo satius fuerit eam damnare, quàm tolerare.* 2. *eas fuisse artes Sectatorum Arminij, ut necesse fuerit ijs obviam ire.* Denique. 3. *eam fuisse Dordracenorum Patrum æquitatem, ut (vide hyperbolen & mirare) post Apostolorum obitum Synodi nullius exstet memoria, quæ citatos (nota præjudicium) hæreticos patientius audiverit, moderatius tractaverit, & sanctius judicaverit.*

FINIS.

INDEX



I N D E X

Rerum Principalium.

A.

Absurda aliquot Reprobationis subnixæ lab-
 su Adami. Pag. 97.

Adfectus quomodo Arminius & Remonstrantes
 Deo tribuant. 55.

Ambrosij Sententia de Electione. 76.

Anthropomorphitæ qui. 30.

Argumenti suasiui vis à Capello et suis eliditur 66.

Argumentorū ab Absurdis usus & necessitas. 22.

Arminius vindicatur à calumnijs Capelli. 15. &

seqq. 29. 32. 71. 111. 113. 120. Quomodo statuat,
 multos Dei conatus ab homine superari posse.

105. Quem satisfactioni Christi effectum adsi-
 gnet 79.

Augustinus liberum arbitrium agnovit. 73. Ejus

Sententia de Electione. 75. Pelagianus est se-
 cundum Capellum. 78.

Author peccati quis dici possit. 91.

C

Capellus quo studio Quæstiones suas proposuerit.

184. Tribuit Deo cum suis Voluntatem simu-

latam, quando reprobos vocat. Item, fædas af-

fectiones. 64. Ex sua hypothese est Pelagianus

& Anthropomorphita. 64. Statuit cum Cal-

vinistis, Deum velle plurimos perire 64. Ejus

& suorum Sententia de Tolerantia. 168. 188.

Inepta disputandi ratio. 176. Mala fides. 79. 94.

Inscitia in rebus Belgij. 5. 123. 134. 259. Teme-

ritas & supina ignorantia. 111. Inclementia. 265

Calvinus & Beza in adversarios suos maledicen-

tissimi. 28. Cal: statuit Deum præscire futura,

quia antea ordinavit, ut ea fierent. 90.

Calvi-

I N D E X.

- Calviniani Augustanæ Confessioni subscribunt. 31.
 Eximunt Deo adfectus perfectionis. 40. 52. Tri-
 buunt Deo actiones vitiosas. 43. Plus sibi indul-
 gent in affricanda alicui hæresi, quàm Roma-
 nenses. 46.
 Cœtus plures unum templum Dei esse possunt. 150
 195. Cur quis se huic & non illi Cœtui adjun-
 gat. 150.
 Cœtus separati fieri possunt, salva commnitione
 principali. 195.
 Cognitio Dei necessaria in quo præcipuè ponatur
58. Perfecta Dei cognitio præmium erit nostræ
 obedientiæ. 57.
 Convictus ut quis dici possit quid requiratur. 248.
 Considerationes super Formulis quare exponere
 recularint Remonst. 131.
 Confusio & offensio in Ecclesia quomodo vite-
 tur. 167.
 Concordia quæri aliquando potest cum dispendio
 Veritatis non necessariæ. 173.
 Contra-Remonst: dissensio circa Objectum Præ-
 destinationis non est levis. 88. 224.
 Consilium conjungendis animis & auctiori sen-
 tentiarum discriminum averruncandæ. 196.
 Confessionem quâ occasione ediderint Remon-
 strantes. 33.
 Confessioni Augustanæ non convenit cum reliquis
 Confessionibus Harmoniacis. 30.

D

- Daniel Tilenus cur exauthoratus. 6.
 Delfensis conventus cui fini servierit. 134.

E

- Error duplex 161. circa non necessaria citra dispen-
 dium veritatis tolerari potest. 173. Non est vo-
 luntarius. 155.

Fran-

I N D E X.

Franciscus Auratus quare exauthoratus. **6.**

G.

Genevæ nulli sectæ morari, & ne privato quidem heterodoxo domicilium figere licet. 171.

Glória Dei in quo consistat. **59.**

Gratiam ab Arminio extenuari mirificè probat Capellus. **85.**

Gratia quomodo cum Natura confunderetur à Pelagio. **87.**

H.

Hæresis articulum necessarium evertit. **62.** Quæ Apostolo intelligatur Tit. **3.** 1. Cor. 11. p. 145.

Hieronymus Electionem ex Fidei præscientia statuit. **76.**

I.

Iudex judicandæ rei non debet esse obstrictus. 238

Iunij Sententia de Prædestinatione. 114.

L.

Libertatem prophetandi qualem urgeant Remonstrantes. 151.

Liberum Arbitrium agnoverunt Veteres. 103.

Lites terminandi duplex ratio. **249.**

M.

Malorum, quæ Christianos turbant, origo & medicina. 197.

Massilienses quare non audierint hæretici. 48.

Meritum non reponunt Remonstr. **99.**

O.

Ordines quâ occasione consuluerint, ut suum cuique templum adsignaretur. 201.

P.

Patrum Sententia de Gratia datione **74.** De Electione **75.** De perseverantiæ certitudine. **211.**

Patres gratia regenerantis plenum effectum aliquatenus pendere voluerunt à libera hominis voluntate. **73.**

Pax

I N D E X.

Pax Ecclesiæ in quo consistat & quomodo promoveatur. 166.

Peccatum Originis ab Arminio tolli, quomodo probet Capellus. 82.

Pelagianum est Capello tribuere homini vel minimum sui conversionem impediens. 104.

Perseverantiæ certitudo qualis. 212.

Potentia Dei in hominis conversione ordinaria non semper sortitur effectum 105. Nihil ei derogatur, cum statuitur, hominem ei consentire vel dissentire posse 106. Tantum moralis est. 107.

Poloniæ Rex quo fundamento tot sectas toleret. 191.

Professores Theologiæ non agnoscunt dissensionem fundamentalem inter se propositâ Arminij Sententiâ. 118.

R.

Remonstrantes non recusarunt Sententiam suam aperire 127. Non postularunt suum cuiq; Templum. 200. Quos partem adversam vocarint. 129. Non possunt se conjungere cum damnatoribus suis, nisi aliam viam ineant. 185. Scopus eorum quis fuerit. 147. Dogmata eorum Pelagiana non sunt 49. Quid eos maxime urserit in Prædestinatione adversariorum. 98.

S.

Schisma Calvinistarum. 205.

Synoditæ Provinciales incompetentes Iudices. 226. 242. 264. Exteri in controversijs Belgicis hospites 261. schisma approbant 261. Præcipitant iudicium ante examen. 261.

Synodus Dordracena non damnavit eam sententiam, quam damnassee videri voluit. 96.

Synodi Dordracenæ iniquitas. 246. 251. 256.

Synodi Tridentinæ æquitas. 253.

Synodorum unica gloria, 251.

Tolerantia

I N D E X.

T

Tolerantia quid. 181. Duplex est. 150. 157. Quo
usque extendenda **162.** Quando locum habeat
149. Quomodo eam promoverint Remonstr. 150
Non orarunt eam ab adversarijs suis. 152. Quo-
modo eam Ordines sanciverint. 216.

Tolerantiæ distinctio Calvinianorum excutitur.
188.

Tolerare quas ob causas alterum quis possit in
eodem imperio. **190.**


V

Vorstius hæreseos non est convictus. 145. Inaudi-
tus damnatus est. 146.

Verbum Dei ordinarium Regenerationis medium
107.

Veritas omnis eodem loco non est **habenda, 9.**

F I N I S.



9-3-3.

